

MARK

Lat Inan Mark.angan Ump

Ka'athamana Nil John.angan Wik God.antam Thoo'ath Pam Wanchantan

¹ Inaniya wik min-minam paththam Jesus Christ.antaman, nhengk God.antaman. ² Aak keenkanamana pam Isaiah alangana lat ngench thayanangan ump, nunangan waa'a, nil wik yimanangan ump wik God.antam anangana:

“Ngay ngul kuchāng wik thoo'iy ngatharamana keenk iyy-iiyow nungka.

An ke' nilanweya woyan min-min yumpow nungkar, nilaniya thaa'-aath-aathow pam wancha.

³ A' niliya aak pintalang iyy-iiyow, wik pech-pechow, 'Niiy woyan min-minam kan yumpān nungant Lord.antana!

Koochanam yumpān nunganta! ”

Nil pam Isaiah.angan wikana yimanangan ump.

⁴ Anpalan-a, nil pam John.an aak pintalangan iyy-iiy aak Judea.angan, a' nil kan-ngul waa'-waa' wik God.antaman, a' nil puth pam wanch anangan kootra ngakang kuungk-kuungk thanang. Nil thaw thant, “Way niiyan yumpaniya niiy kan-ngul wantāna! Niiy palaman weentān God.antan! A' ngay anpalana kootra ngakan-gan kuungk-kuungkāng niiyang, a' nil God.angan ke'-ngul ngaantam-ngeeyow way yot niiyan yump-yumpan.”

⁵ Pam wanch yot wampin nungant than yipam wik ngeeyayn nunang, aak Judea amanam a' putha aak Jerusalem amanam wampin nungant. Than waa'in thanttakam John.antan way thanan yump-yumpin, a'

putha nil kootra kuungk-kuungk thanang ngul punth Jordan.angan.

⁶ Ngook nil John.angan ngoonch-a, minh camel thu-u'am, a' ompam kath nungantakam minh pe'anang. May at mungk a' minh pongkok mungk. ⁷ Nil thaw thant pam wanchantan, "Pam thonangan ngul wampowa, mangk ngatharangana, puth nilaniya ep-paththama pam wuut pi'an paththama, ngay ya'a, ngay pam many paththam. Ngayana ke' pekaman thuchinga, tha' murrukan tha-pathing tha' nungantam amanamana ya'a puth ngay pam pi'an ya'a. ⁸ Ngay ngakang thonakam kuchek kuungk-kuungkang niiyang, puth nilaniya Ngeen-Wiy Min God.antaman ngul kuchow niiyant, ngangkangan ngoonchow niiyantangan."

John.angana Kootra Kuungk Nunang Jesus.aniy

⁹ Ngul-ngulaniya nil Jesus.ana aak Nazareth anpalan wamp aak Galilee.ang anman, ngak punth Jordan aakanakan. A' nil John.angan kootra ngakangan kuungk nunang ngak punth Jordan angmana. ¹⁰ Nil Jesus.an ngakaman pent-a, a' nil um keny thath yuwan ya'ik, a' nil Ngeen-Wiy Min God.antaman thath nunang pal kenya uk-uk nungant ke' minh kolat yimanangan wamp nungant. ¹¹ A' wik inpal kenyan thaw, "Nint nhengk ngatharama! Ngay kaangk paththam wunang nungkar. Ngay ngangk min-minam paththam wunang nungkar." ¹² A' an paththam yaam ke'anam Ngeen-Wiy Min God.antam alangan kuch nunang aak pintalakan. ¹³ Nilana yaam wun-wuna, kinchiya forty.akam, a' nil oony wayan wamp-wampant yipam thaachow nunang wayan yumpow. Puth nil ke'am wik ngeeyan wayan yumpow ya'a. A' putha minh kulliy yot thama angman

wun-wunina, puth thana ngaantiyongk anangan wampin nungant a' ma'-aathin nunang.

Nil Jesus.angana Pam Ko'alam Anangan Ump Thanang Monkan-Wakayn Nunang

¹⁴Than John.an kanan thenchin nunang jailangan-a, nil Jesus.ana aak Galilee.akan iiy, a' wik min God.antaman waa'-waa' thant pam wanchant. ¹⁵Nil thaw thant, “Aak nil God.angan mi'-a, an kan wampa! Aak anan thinth ngul kan wampana nil God.angan ma' nungantangan pam wanch yot ngulan pi'ow. Niiy wayan yaam ke' iiy-iiyāna, niiyan woyan min God.antamakan kan weentāna! A' wik min nungantaman ngangkang pi'-pi'āna!”

¹⁶Anpalana, nil Jesus.an iiy-iiy thomp wonk wakan wak-waka kookam pi'an Galilee anangan, nil pam kucham thath pulang ma'-kuuncham anangana, namp pulantaniya Simona a' Andrew. Puth pul al-alangan minh nga' mam-mampul punththamanangan. ¹⁷Jesus.an thaw pulant, “Nip pal ngatharang iiyowa! Nipaniya minh nga'akam iiy-iiyuwwey ey? Puth inpalan ngula, ngay puth thaa'-aath-aathāng nipangweya a' nipaniya iiy-iiyow, pam wanch yota yal-yalmathow thanang ngathara.” ¹⁸Pul ma'-kuunchamanganiya punththamanan erkam wantpulweya a' puth iiypul ngul Jesus.antangana.

¹⁹A' Jesus.ana thaa' puyam ngul iiy-iiya a' ma'-kuuncham thon ngul thath, namp pulantaniya James a' John, pul puk wuut pam namp Zebedee alantaman. Pulaniya chukkun thanttamangan nyiinpul, pulan puth min-minam yumppul punththaman anangan minh nga'akana iiyayn. ²⁰Nil Jesus.angan thath pulang-a, nil ump pulang nungantangan iiyowpul. Pulaniya piip-kunch wantpul nunang a' pam anangan workan iiy-iiyin nungant, than thampang puth chukkunang workan iiy-iiyin.

Pamangan Oony Wayan Ngangkangan Pi'-Pi'

²¹ Anpalana, nil Jesusa a' putha than ngurp nungantam anangan aak town many Capernaum.ak wampin. Aak Saturday ngulan wun-a, nil Jesus.ana church thantam Jews al-alantaman angan ngoonch a' kan-ngul wik God.antaman thaa'-aath thanang pam wanch anangan.

²² Than pam wanchang wik nungantaman ngeeyin-a, than yotaman thaa'am ikin, nilan puth wik ke' pam wiy al-alangan wik Moses.antaman waa'-waa'in, an yimangan ya'a. Puth nil Jesus.ana wik thaw-thawa ke' pam God.angan kuch nunang, wik min anman waa'-waa' thant.

²³ Yaam ke'an-a, nil pam oony way ngangkang pi'-pi'-a, anan ngoonch churchangan a' othamayan paththam pech pam weenth ananiya, ²⁴ “Ayyang, Jesus-ang! aak Nazareth anpala wampan ey! Nint pal ngeenak wampan ngant e? Nint yipam nganang pam wanch yotaman mulathān ey? Puth ngay nintang mee'miya — nint in pam ngench thayana, nil God.angan kuch nintang!” ²⁵ Nil puth Jesus.angan oony way anan thaa'-thayanam wak nunang, pam alantangan ngangkangan wun-wun, “Nint appapa! A' pentān nungantam ngula pam nalantamana!”

²⁶ Amanaman-a, nil paman kemp akangam than-than, oony way alangan wunyathana. Anpalaniy-a, nil oony wayana othamayan pecha, a' pent ngul pam alantaman.

²⁷ Than pam wanch churchangan nyiin-nyiin-a, an than thaa'am ikina, a' than kan-ngul thaw-thawin thanttakamana, “Ayyang, in wanttak e? Nil pam inana wiy-wiyama! nil ke' than wiyangan thaa'-aathantan yimangan ya'a! Apey! Nil oony way anangan kenthan thanang, thanan putha wik ngeeyin nunang!”

²⁸ A' anpalaniya than pam wanchangan wik thoo' Jesus.antaman puy-puyam we'-we'arathin, aak angman pungk-pungkalang Galilee wakan.

Nil Jesus.angan Pam Wanch Yot Miyalath Thanang

²⁹ Amanamaniy-a, Jesus-a, a' ngurp nungantam anangan churchaman pentin a' than aawuch Simon.antam pulantam Andrew.antamakan yuurpam iyyin, Jesus-a, James-a, John-a, a' ngurp nungantam wiy anangan thamp. ³⁰ Piny-kench Simon alantamana bedang wunwun, weech-weechan nunang, ngunthamang uwan, kemp nungantamana karkan pey. Nil Jesus.an wamp-a, thanan waa'in nungant. ³¹ Anpalaniya, nil Jesus.ana wanch alpan alantan iya, a' ma' maman nunang, a' ma'-aath nunang ekow. A' nil erkam miyal ngul wun, kemp karkanamana ya'-ngula. Anpalana nil may ngul aath-aath thanang.

³² Ngul-ngulaniy-a, kinchan uk-a, ngaa' kan-ngulan chint-a, pam wanchangan kampan thanttam anangan wamp-wampathin thanang nungant Jesus.antan, puth thanangan weech-weechan a' wiy anangan wampathin nungant than anangan puth oony way ngangkangan pi'-pi'in. ³³ Pam wanch ma'mangkam aak town anpalan karpam yalmathwin thanttakam aawuch Simon.antamang angman, yoon than-thanin. ³⁴ Nil Jesus.angan pam wanch anangan nguntham wiy-wiyam thakan uwin-a, miyalath thanang, a' nil oony way anangan kenth thanang ngangk pam wanchantam anpalan. A' nil thaw thant oony way al-alantan appap wunayna, puth thanan kan mee'miy an nil Christ.ana, God.antaman wamp. Puth than oony way anangan nath ngul mo'in.

Nil Jesus.angan Wik Min God.antaman Waa'-Waa' Thant

³⁵ Ngaa' thonangana, aak ngaa'angan yippakan wunwun-a, nil Jesus.an ek a' aawuchana want ngul. Nilan aak town anpalan iyy aak enyanakan, aak pam wanch ke'angana, a' nil angmana mee'-wuthanama. ³⁶ Puth

nil Simon Peter.ana, a' ngurp nungantam wiy anangan thanan wenk-wenkin nungant. ³⁷ A' thanan uwin nunang a' thawin nungant, “Ayyang, than pam wanch yotama wenk-wenkantan nungkara!” ³⁸ Nil puth Jesus.an thaw thanta, “Ngamp mak iyy-iiyāmp villages thon-thonakana yam-yaman than-thantana. Ngay pam wanch wiy anangan thamp thaa'-aathāng thanang, wik min God.antaman waa'āng thant. Ngay puth ke'-paal aak iikanakan ukang pal ken yana.”

³⁹ A' anpalana, nil Jesus.an village thon-thonakan iyy-iiy aak Galilee angman. Nil church thon-thonangan wik min God.antaman waa'-waa' thant, a' oony way anangan kenth thanang ngangk pam wanchantam yotam alantaman.

Nil Jesus.angan Pam Thonaman Miyalath Nunang

⁴⁰ Nil pam thonam aak angman wun-wuna, pam inaniy-a, wenchangam makan iyy-iiy kemp wakanangana. A' nil Jesus.ant wamp, a' pungkang nyiinant. Nil thaa'-mamanang thaw nungant puth ma'-aathow nunang. Nil thawant, “Ayyang, Moom-ang! Nint kaangk nathweya min yumpin ngayangan-a, ngay puth kan mee'miy nintang nint minam yumpin ngayangana.” ⁴¹ Nil Jesus.angan ngangkwey mam nunang, a' nil ma' ongkaram, a' paman mam nunang, a' thaw nungant, “Ngay kaangk inman miyalathāng nintangweya, nint kemp min ngul iyy-iiyāna!” ⁴² A' wenchan erkam wuthanam nungant, ya'-ngul ween. ⁴³⁻⁴⁴ Anpalaniy-a, Jesus.an wik thayan thawant, “In ngeeya! Nint ke' waa'ān thant wiy alantan ngayan nintang miyalathangan. Nint kan erkam iyyān pam priest alantan, nil yipam nintang thathow kemp min ngulan, wenchan ya'-ngul weena. Anpalana, nint minh thakan kalān aak ngench thayanakan, a'

angan thaa'-kuumpān nunang, piip God.an. Puth wik Moses.angan anman waa'. Anpalan-a, pam wanch yotang ngul thathayn, a' thiichayn nintang kemp min, wench ke'anang ngulana." A' nil Jesus.an kanan wik thawant-a, nil kuch nunang ngula.

⁴⁵ Puth nil paman-a, iiya, a' wikan pal-puy waa'-waa', yotangam ngeeyin wik inan Jesus.antaman. Nil pam alangan wikan puy-puyam ngul waa', yaa, anpalaniya, nil Jesus.an ke'am ngul townakan ngoonch, mee' yotan-tangan. Nil aak enyanang wun-wun, a' pam wanch yot anangan aak nath-nathpalan wampin nungant.

2

Nil Jesus.angan Pam Alpanan Miyalath Nunang

¹ Nil Jesus.an ma'-ko'alam paanth aak enyanangan, a' koyam ngul wamp aak Capernaum.ak. Than pam wanch al-alangan thathin nunang wampan-a, wik thoo' we'arathin thanttakam. ² Anpalan-a, pam wanch yot wampin nungant aawuchang nilan wun. Yot anangan aawuchang ngoonchin, aakana thupam ngath ngul. Nil yoonan yim-yimanang yot anangan than-thanin thaa' aawuchang angan. A' nil Jesus.angan wik minan waa' thant. ³ An-aniyangan-a, pam ko'alamang pam kun-pwey wampathin, nil pam alpanan pengkarang wun-wunwey, makar ya' yalamant, ke'-paal nilan ke'am iyy-iiy. ⁴ Than ke' pek kaliythan nunang Jesus.antan-a, puth ya'a, puth aak thaa'-thupam ngath, pam wanch yota! Than wanttak ngoonchathiythan nungant Jesus.antana? A' puth than aawuch keny matathin nunang roofak, a' roof wiyan thapathin pal kenyan nil Jesus.an than-than. Kanan thapathin-a, than pam alpanan pengkarang ukathin nunang Jesus.antan. ⁵ Nil Jesus.angan thath

nunang-a, nil kan mee'miy thanang pam ko'alam anan-ganiya kan-kanam paththam minam ngaantam-ngeeyin nunang nil ngul miyalathow nunang pam alpanan, a' nil thaw pam alpan alantan, “Ayyang, nhengk ngatharam-ang, way nintan yump-yumpan-a, an ya'-ngula, ngay ke'-ngul ngaantam-ngeeyānga, ya'a!”

⁶ Than pam pi'-pi'anam wiy anangan wik thayan thaa'an-aath-aathin thanangan-a, angman nyiin-nyinin, thanan ngaantam-ngeeyin thanttakaman, ⁷ “Nil inan Jesus.an wanttake? Nil ke' God.an waa'-waa'an nungan-takamana! Nil God thonakaman ep thawiy ngampar nil ke'-ngul ngaantam-ngeeyow way ngampan yump-yumpampa, pam wiyān ke' thawiythana, nil epa!” ⁸ Nil puth Jesus.angan erkam thiich thanang than want-wantakan ngaantam-ngeeyin thanttakaman. Nil puth thaw thant, “Niiy ngul ngeenak ngaantam-ngeeyaniy yimanangana? ⁹ Ayyang, in ngeeyāna! Ngay nyiingan yimanangan thawang pam alpan alantan, ‘Ngay ke'-ngul ngaantam-ngeeyāng way nintan yump-yumpana.’ Yaa, niiy wanttak ngaantam-ngeeyaniya? An work pi'an paththam ey? Nath ya'a, nath work many way-wayang, engkanang ey? Ngay nath wik inangan thawing alpan alantan, ‘Kan eka! Pengkar nungkaraman maayāna! a' iiyān ngul aak nungkaramakan.’ An work pi'an paththam ey? Nath ya'a, nath work many way-wayang engkanang ey? ¹⁰ Yaa, ngay in kan meenathāng niyant nil God.angan kuch ngayang, yipmam ngay thawāng thant pam wan-chant, ‘Ngay ke'-ngul ngaantam-ngeeyāng way niyan yump-yumpan. Ngay puth pam inman nil God.angan kuch.’” ¹¹ Anpalana, nil Jesus.an thaw pam alpan alan-tan, “Ngay inan thawāng nungka, kan ekāna a' yuk pengkar nungkaram nanan-a, maayān, a' kan-ngul iiyān aak nungkaramakan!”

¹² Than yot al-alangan thath-thathin nunang pam alpanan, a' nil paththam erkam ek, than ngul, a' pengkar nungantaman wow maay, a' iiy ngul aak nungantamakan. Than pam wanch yot anangan ngangk ikin thathinan nunang a' thanan thaa'-kuumpin nunang piip God.an. A' thanan thawin, “Ngan puth keenk work min yimanangan ke' thathan, ngan in-ngulan thathana.”

Nil Jesus.an Levi.ant Thaw Monkan-Wakow Nunang

¹³ Amanamaniya, nil Jesus.ang want thanang, a' nilana koyam kan-ngul iiy kookam pi'an aakanakan, Lake Galilee.an waa'antan. A' pam wanch thaa'-wantanam wampin nungant, a' nil wikan kan-ngul thanang thaa'-aath-aath. ¹⁴ A' nilan iiy-iyy-a, pam namp Levi anan thath nunang, pam nilaniy wukalan yal-yalmath Government.antan, nilaniya, office.ang nyiin-nyiin. Pam Levi inana, puk nhengk nungantam, pam namp Alphaeus.antom. Nil Jesus.ana ang wamp nungant, a' thawant, “Awey, nint ngayang monkan-wakāna.” A' nil Levi.ana erkam ek a' monkan-wak Jesus.an.

¹⁵ Anpalaniy-a, nil Jesus.angan may mungknungantang, Levi.antang aawuch. Pam wanch yot wampin, thanan puth monkan-wakin nunang Jesus.an — wiy anangan-a, ke' Levi yimanangana wukal yal-yalmathina Government.anta, wiy anangan-a, pam wanch kaangk-ke'anang anangan. Than tham karpam nyiina, a' may mungkn thanttang, Jesus.antang, a' ngurp nungantam al-alantang. ¹⁶ A' than pam teachers wik thayanan thaa'-aath-aathin Pharisees al-alangan thathin nunang Jesus.an nyiin-nyiin thanttangan, pam wanch kaangk-ke'anangantang. A' thanan mepin thanang ngurp Jesus.antom anangan, “Nilan ngul ngeenak may mungkn pam wanch way al-alantanga?”

¹⁷ Nil Jesus.angan ngeey thanangan-a, nilan thaw thant, “Than pam wanch ke'aman weechanan thanang-a, an ke'am iyyantan nooyananta, ya'a. Pam wanch weechanan thanang-a, an ep iyyantan nooyanant. An ngayan yimanangana. Ngay ke'am wampanga yipmam pam wanch anangan umpāng thanang than minan waa'wuntan, ya'a. Ngayan ep wampanga yipam pam wanch way anangan umpāng thanang thanan yipam ngayang monkanwakayn.”

Nil Jesus.angan Wik Kath Waa' Thant

¹⁸ Ngaa' thonan-a, than ngurp John.antam anangan a' puth ngurp thanttam Pharisees al-alantamana, thanan kinch ongan may ke'am mungkin, mee'-wuth-wuthanamin anman. A' than pam wanch wiy anangan wampin nungant Jesus.ant a' thawin nungant, “Ayyang, nint kan waa'ān nganta! An wanttak aa? Than ngurp nungantam John.antamana a' ngurp Pharisees al-alantaman thanana ma'-yotam may ke' mungkantan. Puth ngurp nungkaram nanangana, than kaangk may anman mungk-mungkayna. An ngeenaka?” Thanan yimanangan thawin. ¹⁹ Nil puth Jesus.an thaw thant, “Niiy kan wik kath inan ngeeyāna! Pul pam wanch nath ngentuwpul-a, thanan nath may pi'an yumpayn wedding party aakanakan. Niiy ngul thawin thant ey? pam wanch kampan pulantam anangan may ke'an mungkayn ey? an ya'a, nil pam kompan wanchan ngentow-a, nil angman thintham iyy-iiyow thanttang, a' thananiya karpam may mungkayn. ²⁰ Puth aakan ngul wampowa, than pam wiyangan pam kompan nath kalayn nunang aak thonanganakan, kampan nungantam al-alangan ke'-ngul thathayn nunang. Puth aak an-aniyangan-a, than may thanttaman too ngul wantayn, a' mee'-wuthanamayn.”

²¹ Nil wik kath inan waa' thant, “Nil wanchang kulich kath ikanam pi'-pi'iywey-a, an ngul nilan ngook nyi- ingkanam manyan ikathiy ey? Puth ngook kathan ik- a, angan wakiy ey? An ya'a, puth ngook nyiingkanam manyam kenyam yalamiy, a' puth-putham ngul ikiy, yu- utamp pi'anana ngul wuniya.”

²² Anpalaniya, nil Jesus.angan wik kath thon ngul waa' thant, wik kath minh pe'an sheepantaman, puth aak thant wun than ngak wine.an yeech-yeechin minh pe'an sheepantamang ke' nga'alangk wun yimanangana. A' nil Jesus.an thaw ngul, “Than pamangan wine nyiingkana- man pe'an kath al-alantangan ke'am yeech-yeechin. Nil pe'an kathaman angman yeechiywey-a, puth pe'anan ikiy a' wine.an ya'-ngul wuniy, pe'anan way paththam ngul wuniy. Nil pamangan wine nyiingkanaman pe'an nyi- ingkanamang yeechow yipam minam wunow wine.aniy.”

Aak Kinch Thonam Wun Thant Ngench Thayan

²³ Nanpalaniya Jesus-a, ngurp nungantam anangana than woyan wakin, aak may wheatan kaampin. Aak anana Saturday. Aak thanttam Jews.antaman yimanangan wuna, than aak Saturday.ana work ke'am iiy-iiyin. Than iiy-iiyin-a, than ngurp Jesus.antamangan may wheat thuthin mungkanakan. ²⁴ Than pam Pharisees al-alangan thathin thanang a' than thawin nungant Jesus.antan, “Ayyang, than pam nal-nalangan may wheatan ngeenak thuth-thuthantan e? Aak in Saturdaya! Aak ngampar wuna ngench thayanant e! Than wik ngench thayanan pip-pipantan ey?”

²⁵ Nil Jesus.ana thaw thant, “Niiy ngul wik inan ke'am ngeeyan ey? Nil David a' pam nungantam anangan may ke'anangan wunin ey? an-aniyangan nil Abi- athar.an moom pi'anan churchakan iiy-iiy. Than mee ch

wun-wunina. ²⁶ Nil David.ana churchak iiy, aawuch God.antamak, a' angana ngoonch a' may bread ngench thayanan maay, thanana mungkin ngul. In wik thayan ngamparamana yimanangan wunan thanam priests al-alangan thonakaman may breadan mungkayna, — ngul nil David.angana ep mungk ey! a' putha pam nungantam al-alantan thee' thant.”

²⁷ A' nil Jesus.ana putham thaw thant, “Nil God.angan aak Saturday.an yumpa aak min wunow pam wanchantan. Nil ke'ama yump aak Saturday.ana pam wanchangan wik thayan anman ngaantam-ngeeyayn, aakanakan ya'a. ²⁸ Puth ngayana, pam inan nil God.angan kuch ngayang niiyant, ngayam thonakam ep thawanga than pam wanch want-wanttakan iiyayn aak Saturday.ana, puth ngay inana moom pi'an niiyantama, Saturday.akan thampa.”

3

Nil Jesus.angan Pam Ma' Makar Wayanang Miyalath Nunang

¹ Anpalaniya, nil Jesus.an koyam ngul iiy aak church Jews.antamakan. Nil aak angmana nil pam inan ma' makar ya' yalam nungant, nilan angman nyiin-nyiin. ² Than pam wanch wiyangana Jesus.an thath-thathin nunang nil nath paman ma' min yumpowa, nath ya'a, puth aak anan Saturday, aak ngench thayan wun thanta. Thanana mee'angam kalin nunang, than puth kaangk wik aak-ya'angan waa'-waa'ayn nunang wiyantan.

³ Nil puth Jesus.an pam alantan thawa, “Nint pal ingan iiyāna yotangan yipam thathayn nintang.” ⁴ Anpala-a, nil thaw thant pam wanch al-alantan than churchangan nyiin-nyiin, “Ayyang, niiyalang! Kan niiy in ngeeyāna, nil wik thayan ngamparaman wanttak thawana e? An ngul kan ey? Ngamp ngul min anman kaangk iiyāmp

thant pam wanchantan aak Saturday.angan ey? Ya' nathweiy-a, ngamp nath kaangk way anman iyy-iiyāmp thantwey ey? Puth ngamp kaangk pam wanch anangan kaa'-piichanathāmp thanang ey? Ya' nathwey-a, ngamp kaangk nath wayathimp thananga.” Puth thanan angman ngul nyiin-nyiin, popam. ⁵ Nil Jesus.an weent a' pal-puy thath-thath thanang, a' nil man kul wamp thant pam wanch al-alantan puth nilan ngangk way wun thant puth thanan kuchek-thayan anman iyy-iiyin, wik min-minam ke'am ngeey-ngeeyin nunang. Anpalana, nil pam alantan thaw ngul, “Ayyang, nint ma'an ongkarathāna!” Nil puth pam alangana ma'an ongkarath, a' ma'an minam ngul wun. ⁶ Than puth Pharisees al-alangan churchan erkam wantin a' yalmathwin thanttakam ngurp Herod.antam al-alantangan. Thanan wik yumpin thanttakaman Jesus.an yipam mulathayn nunang.

Pam Wanch Yot Nath-Nathpalan Wampin Nungant Jesus.antan

⁷ Nil Jesus-a, putha ngurp nungantam anangan than kan-ngul iyyin kookam pi'anak Galilee.aka, a' pam wanch thaa'-wantanamang monkan-wakin nunang — pam wanch aak nath-nathpalan wampin Jesus.antan — aak Galilee.ama, putha aak Judea.ama, ⁸ a' aak Jerusalem anpalana, putha aak Idumea.ama, putha aak anpalan Jordan River wonk pal kaawangka; a' puth aak towns Tyre-a, Sidon anpalan. Than pam wanch aak anpalman wampin nungant Jesus.antan puth thanan wik thoo' ngeeyin nungantam nil miyalath thanang pam wanch yotama.

⁹⁻¹⁰ Anpalan-a, nil Jesus.angana pam wanch alpan yot anangan miyalath thanang wayaman, a' anpalana than wiy anangan puy-puyam tha'-tha'win nungantang wakan

than yipam ma'ang mamayn nunang Jesus.ana a' miyalamayn yipam. Pam wanch thaa'-wantanam aak anganiy a! Jesus.an thaw pam ngurp nungantam al-alantan chukkun pal thinth-thinth wichayn nungant keenk wunowanta nil yipam angan nyiinow thanan ke' yipam wuthanathayn nunang. ¹¹ Puth pam wanch angan thampa oony way anangan ngangkangan pi'-pi'ina. Than Jesus.an thathin nunang-a, thanana umangam aakang keekin nungant a' othamayan pechin nungant, “Nintiya puk nhengk God.antam ey!” ¹² Puth nil Jesus.an thaa'-thayanam thaw oony al-alantan ke'an wiy al-alantan waa'ayn nilana nhengk God.antaman.

Nil Jesus.ang Ngurp Nungantaman Mi' Thanang

¹³ Amanamaniy-a, nil Jesus.ana yoykang mat, a' nil pam wiy anangan mi' thanang, a' ump thanang wampayn nungant. ¹⁴ Than kanan wampin nungant-a, nil Jesus.angan pam al-alantamana pam twelve mi' thanang nungantangan iiy-iiyayn, nilan yipmam kuchow thanang work nungantan iiy-iiyayn ngula. Nil thaw thant, “Ngay niyang kan mi'angan niy yipam ngatharangan iiy-iiyān. Ngay niyang ngul kuchāng wik min ngatharaman waa'-waa'ān thant pam wanchantan, ¹⁵ a' ma'-kunch yumpāng niyang, a' ma'-aathāng niyang, puth niyaniya yipam oony way anangan pam wanchantaman kenthān thanang.”

¹⁶ Pamiy namp inangan mi' thanang: Simona (ngul-ngulana Jesus.angana namp thon ngul thee' nunganta, Peter); ¹⁷ a' putha pul kuuncham James a' John, nhengk nungantam Zebedee.antam (ngul-ngulan Jesus.angana namp thon ngul thee' pulanta, Boanerges, wik yimanangan wun: pam ke' ngakan peeyana), ¹⁸ a' putha Andrew-a, a' Philip; puth Bartholomew, a' putha Matthew, a'

puth Thomas, a' puth James-a, nhengk nungantam Al-phaeus.antama, a' putha Thaddeus; a' putha Simona thanan waa'-waa'in nunang Patriot, nil puth aak nungantamakana kaangk wun paththama, ¹⁹ a' puth Judas Iscariot. Nil pam ilangaman ngulan ma'angan thee'ow nunangan Jesus.an pam soldiers al-alantan mulathaynan nunang.

Than Waa'in Nunang Nil Jesus.angan Oony Wayan Ngangkang Pi'-Pi'

²⁰ Amanaman-a, nil Jesus.ana aakak iiy. A' pam wanch yotangan putham ngul wuthanathin nunang Jesus.ana, puth than yotweya! Nil Jesus-a, putha ngurp nungantam anangan than ke' may mungkiythan-a, puth ya'a, yot wampin thanta. ²¹ Puth kampan nungantamang wik inan ngeeyinan-a, thananiya iiyin nungant yipam kalayn nunang thanttang, than puth pam wanch anangan thaw-thawina, “An nil weenth-weenthamana!” ²² Than pam puungk wiy angman thampa, than anangan teachersa wik thayanan thaa'-aath-aathinana aak Jerusalem anpalaan wampina. Thananiy thaw-thawina, “Nil oony way pi'an ngangkang pi'-pi'an nunang a! Beelzebul.ana!” Puth puungk wiy anangan pam wanch thawina, “Nil oony way pi'an alangana pam Jesus inan ma' nungantang pi'-pi'an nunanga a' ma'-kunch yump-yumpun nunang, ke'-paal nil oony way anangan kenthān thanang pam wanch al-alantamana.” ²³ Yaa, nil Jesus.angana pam wanch anangan yota ump thanang nungant angan wampayn a' nil wik kath ngul waa'-waa' thanta. Nil puth ke'am wik engkanangan waa' thant, ya'a. Nil wik yimangan thaw, “Ngaywey nath kan-kanaman iiy-iiying ma' oony way alantangan-a, ngayan puth want-wanttaka oony wayan kenthāng nunangane? ²⁴⁻²⁵ Yaa, kan in ngeeyāna: than kampanam nathwey pek-pekwiythan-a,

a' thaamp-thaampwiythan thanttakamwey-a, yaa, than minam ke' pi'wiythan thanttakaman ya'a, aak thanntamana thayanam ke' pi'iythan, ya'a. ²⁶ Nil oony way alangan nathwey oony way wiy anangan piik-piikiy thanangan-a, pek-pekwiyan thanamana, thanan tham-pang aak thanntaman wayathiythan, minam ke' pi'iythan, ya'a. Thanan puth karangk ke'-ngul iiyayn, ya'a.

²⁷ "A' putha niy in thampan ngeeyāna: nath wee'weya aawuchang pek wupam ngoonchiy aawuch pam karangk alantamangan-a, a' ma'-kuchathiy way min mininiy nungantaman-a, yaa, puth nil ka'athaman-a, pam karangkana kuuyang kathow nunang, a' nilana kan-ngul ngoonchow aawuch nungantamangana. Nil ke'wey kuuyangan kathiy nunangan-a, yaa, nil puth pam karangkan kul thawiy nungant aawuchangan ke'an ngoonchow.

²⁸ "Inan ngaantam-ngeeyāna! Than pam wanch wiy al-alangan nath way yot yumpiythan-a, a' puth wik way thakan waa'iythan-a, an ep nath kon-ngathiy nunang piip God.an way thanan yump-yumpin, waa'-waa'in thakan. Nungkway than ma'-yotaman way yumpiythan, waa'iythan thakan-a, nath kon-ngathiy nunang, piip God.an. ²⁹ Than puth wee'-wee'anangwey wik way thakan waa'-waa'iythan nunang Ngeen-Wiy Min God.antaman-a, nil puth God.aniya ke' kon-ngathiy nunang thanan way waa'-waa'in ya'a, anman konangam pi'-pi'ow aak umpuyam." ³⁰ (Nil Jesus.an wik yimanangan thaw puth anpalan than wiy al-alangan waa'in nunang nil oony wayan ngangangan pi'-pi' nunang.)

Kaath-Kunch-a, A' Puth Kuunch-Kunch Wampin Nungant

³¹ Anpalaniy-a, kaath Jesus.antama puth kuunch nungantam anangan wampin a' yoon angman than-thanin.

Than wik kuchin nungant pentow thantana. ³² Pam wanch yot anangan thintham nyiin nungantangan-a, than thawin nungant, “Ayyang, kaath nungkarama puth kuunch nungkaram nan yoon than-thantan nungkara, than kaangk wik thawayn nungkar.” ³³ A' nil puth Jesus.an thaw thant, “Kaath ngatharaman puy wee' e? Puth kuunch ngatharam thamp puy wee' e?” ³⁴ A' nil thath thanang pam wanch yot anangan nungantangan nyiina, a' thaw, “Ayyang, in ngeeyiy a! Than inangana ke' kaath ngatharama putha than ke' kuunch ngatharam thampa! ³⁵ Than wee'-wee'ananganweya natha piip ngatharam in kenya wik ngeey-geeyiythan nunangan-a, an than ke' kampan ngatharam yimanangana, kaath-a, kuunch yimanangan iyy-iiyantana.”

4

Wik Kath Inan May Kaanchantam

¹ Anpalaniy-a, nil Jesus.an koyam iyy kookam pi'anakan, Lake Galilee.an, a' aak angan-a, nil putham ngul thaa'-aath-aath thanang pam wanch anangan. Pam wanch thaa'-wantanaman yalmathwin nungant, wuth-wuthanathin nunang. Yaa, nil puth Jesus.angan-a, chukkun thath, ngakangan than-than a' nilan aakanakan iyy, chukkungan chang pey, a' angan nyiin. Than pam wanch yot anangan-a, thomp wonkangama than-thanin, ngeey-geeyin nunang. ² Nil wik kath waa'-waa' thant, nil koochanam ke'am waa' thant, ke' wik kath anman waa'-waa' thant. Nil wik kath inan waa' thant:

³ “Niiy kan in ngeeyāna: nil pam thonaman iyy-iyy may kaanch manyiy aakangan thee'-thee' thanang palam puyam yipmam may anangan emayn. ⁴ Nil may kaanch anangan ma'ang thee'-thee' thanang-a, wiy anangan-a, woyan wakanang keek-keekin. Anpalan-a,

minh panch anangana aakang ukin a' mung্ক-mung্কin thanang. ⁵ Puth may kaanch wiy anangan-y-a, aak kunttowthiyang angan keekin, aak ngaanhan manya. Yi-ikan anangan-a, erkam pentin, puth aak ngaanhan many kenyangkaniya. ⁶ Ngul kinch keny ngulan wun-a, pung karkanang wuk-wuk thanang a' than erkam akaramin, ngeenama, puth yuk thinka pek kech ke'am kuch, ya'a, puth aak ngaanh manya, aak kunttowthiy. ⁷ May kaanch wiy anangan-y-a, aak waakamthiy angan keekin, yiikan anangana a' putha wak wayananganiya than karpam pentin, emin ngul. Ka'athamaniy-a, yuk minam emin, amanamaniya, wak way al-alangan mulathin may min anangana, mayana ke'-paal ke'am kalin. ⁸ Puth may kaanch wiy anangan-y-a, aak minang keekin. Than yi-ikanana pentin, a' ep minam em-emin, a' ngul-ngulan-a, may yot kalin thanang. Wiyang may kootra chil yot kalin, thirty, wiyangan-a, sixty kalin, wiyangana may yot kalin thanang, one hundred kalina, thaa'-wantanam. Anman kan.” ⁹ A' nil Jesus.an thaw thant ngul, “Niiy wik ngatharam kanam ngeeyan ey? Yaa, niiyiya konangam pi'ān thanang.”

Thanan Engkin Nungant Wikan Koochanathow

¹⁰ Ngul-ngulan-a, nil Jesus.an pokkap ngul nyiin. Ngul than wiy anangan wampin nungant, ngurp nungantam anangan-a, a' puth pam wanch wiy anangan thanan wik kath may kaanchantaman ngeeyinana, than anangan wampin. Than engkin nungant wik kathan koochanathow thant. ¹¹ Yaa, nil Jesus.an thaw thant, “Nil God.anganiy-a, kaangk wik nungantaman engkanang wunow niiyant, niiyan yipam mee'miy wik ngench nungantam anangana, wik inangana: nil pam wanch yot anangan ngul pi'-pi'ow ngampang ma' nungantang. Puth

ngay pam wanch wiy al-alantan wik koochanam ke'am waa'ang, ngay wik kath anman waa'ang thanta, ¹² yipam, 'Thanan thath-thathayn ngayang, a' puth ngeey-ngeeyayn ngayang, puth wik kathaniy-a, wik wuthanang wunow thant, wik God.antaman ke' yipam thiichayn, ya'a. Than nath wik nungantaman minam ngaantam-ngeeyiythanwey-a, an than woyan way anpalana weentiythana, woyan God.antaman ngul wakiythan, nil yipam ke'-ngul ngaantam-ngeeyow way thanan yump-yumpin.' ”

Jesus.angan Wik Kath Koochanath

¹³ Anpalaniya, nil Jesus.an thaw thant, “Niiy wik kath inan ngayan waa'ang niiyant engkanang ke'am ngeeyan ey? ya' ey? Niiy want-wantak ngul wik kath wiy anangan minam ngul ngeeyāna? ¹⁴ Yaa, in ngeeyān al Ngay wik kathan koochanathāng niiyant. Nil pamangan-a, may kaanchan aakang thee'-thee'anan-a, an ke' nil pam anan wikan waa'-waa'an God.antamana. ¹⁵ Pam wanch wiy al-alangan wik God.antaman ep ngeeyantan, ngul yaam ke'anangan-a, nil oony wayan wampan thant, thawan thant wik ke' ngeeyayn. Ngul thananiy-a, oony wayan ngeeyantan nunang, ke'-ngul God.an monkan-wakantan nunang. Inaniya, ke' may kaanch anangan woyan wakanangan keekin, a' minh panchangana mungkin thanang. ¹⁶ Pam wanch wiy ananganiy-a, ke' may kaanch anangan aak kunttowthiyangan angan keekinwey. Than il-ilangan wik God.antam ngeeyantan, a' erkam ngangk min wun thant, ¹⁷ puth yaana manyamweya, than puth yaam ke'am ngangkang pi'-pi'antan wik anangan, ya'a. Than wiy al-alangan nath way yumpiythan thantweya, nath thaa'-thengkathiythan

thanangweya, puth imanama than wik God.antaman nganggang pi'-pi'antan, thananiy-a, woyan nungantaman erkam wantantan, wik nungantaman kon-ngathan ngul thanang. ¹⁸ Pam wanch wiy ananganiy-a, ke' may kaanch anangan aak waakamthiy angan keek-keekin. Than il-ilangana wik God.antaman ngeeyantan. ¹⁹ Puth amanamaniya, than ngaantam-ngeeyantan thanttakaman than want-wanttakan ma'mangkiy iyyiyan a' putha want-wanttakan may thakan piy-piyayn, a' kuchek way wunan thant. A' than thanttakaman ngaantam-ngeeyantan than ngangk min yipam wunayn, ma'-mangkiyan yumpwuntan, puth woyan God.antaman konngathan thanang ngula, ngul anpalaniy-a, than wayamantan, min paththamana ke'-ngul yump-yumpantan, ya'a. ²⁰ Puth pam wanch wiy ananganiy-a, ke' may kaanch anangan aak minangan keek-keekin. Than il-ilangan wik God.antam anangan ep minam paththam ngeeyantan a' nganggang pi'-pi'antan. Than woyan God.antaman wak-wakantan, a' min yumpantan. Wiyanganiy-a, chil min yumpantan, wiyanganiy-a, min paththam yumpantan, ke' may kaanch anangan aak minangan keekin yimanangan, wiyang may kootra chil yot kalin, wiyangan-a, yota, a' puth wiyangan-a, thaa'-wantanaman kal-kalin thanang.”

Nil Jesus.angan Wik Kath Thonangan Ngul Waa' Lanterna-man Waa'

²¹ Amanamaniya nil Jesus.angan wik inan waa' thant ngul, “Nil pamang nath lantern pathathiywey-a, an nganthan yuk paathangan kangiy ey? Ya'a! An ke' kangiy! Ya'a! Nil nath yuk wurp pek-pekam wunpiy ey? An ya'a! An ke' wunpiy, ya'a. An nil keny achantang waanchana yipam nganthangan aakan thathayn. ²² Yaa,

in ngeeyāna, ngay inan thawang niyant: than pam wanchang ka'athaman wik mup thanttakaman pi'-pi'iythana, ngul-ngulana thananiya wik engkanang ngul pentathayn. An yimananga — wik ngatharam anangan thenchanam wun-wunan yippak wiyantam — ngul-ngulana an ep-paththam than ngul thiichayn. ²³ Niiyan wik minminaman ngeey-ngeeyān ngayang ngayan waa'-waa'ang niyant.”

²⁴ Nil Jesus.an wik inan thamp thaw thant, “Yaa, niiyan wik ngatharaman minam ngeeyāna! Niiy nathiywey way waa'in wiy anangan-a, yaa, nil God.angan putha way waa'ow niiyang ke' niiyan waa'aniy thanang, an nilana way ep-paththam waa'ow niiyang. ²⁵ Yaa, in ngeeyāna: nil pam alangan wik min-minan ngeeyow ngayang-a, yaa, ngayan ngul ma'-aath-aathāng nunang nil yipam minam anman ngaantam-ngeeyow. A' puth thoniya, nil pamangwey ngaantam-ngeeyiy nungantakaman nilan wik kanaman thiich-a, puth nil ke'aman wik ngeeyiy ngayang-a, yaa, ngayan puth ke' ma'-aathing nunang, a' wik anangan-a, kon-ngathow nunang ngula.”

Nil Jesus.angan Wik Thee', Koochanam Ke'am Waa'

²⁶ Nil Jesus.aniya wik thonangan ngul thaw-thaw, “Aakan ngul wampow nil God.angan pam wanch yot pi'-pi'ow thanang ma' nungantangan. In ke' aak yimanangan wunana, ke' inana wik kath waa'āng niyant may kaanch alantamana. Nil pamangweya may kaanch cornantama aak gardenang pal-puy thee'-thee'. ²⁷ Ngaa' thon-thonan weepaman eka, a' nil aak-aakanakaman iiy-iyy gardenak. Aak ngutang ngulan-a, nil weep ngul wun, nil yimanamana. Aak an-aniyangan-a, yiikan anangana pent-pentin ngul aakamana, em-emin-a, pi'an ngul weenin. Nil

puth pamaniya ke'am mee'miya yiikan anangan want-wanttakan pentin, emin thakana. ²⁸ Kaanch manyiy anangana than-thanam ngul pentin aakaman. A' puy-puyam ngul ongkaman, em-emin ngul, a' may ngul pi'ow, a' may paththam yotam ngul pi'a. ²⁹ May polpeyan ngulan-a, yaa, nil pamana nhengk-peempan thampana kan-ngul iiy, puth aakan kan wampant mayan umpow thanang mungkanakan.”

³⁰ A' nil Jesus.an thaw, “Aak ngul-ngulan-a, nil God.angan pam wanch yot ma' nungantangan pi'-pi'ow thanang. Aakan wanttak nath wunowa? ³¹ Yaa, ngay kan wik kath inan waa'āng niyant. Nil pam thonamangan-a, may kaanch thonam many pattakam kal a' garden nungantam angan kaampa. ³² Amanamaniya yiikanan ngul penta a' em-em ngul yuk pi'anakam. Minh panch yota nath-nathpalan mo'-mo'in yuk aakanakamana a' wurp yumpin ngul thanttakaman yuk angman.”

³³ Nil Jesus.angana wik kath yot yimanangan waa'-waa' thant pam wanchant, wik nungantaman thaa'-aath-aath thanangana. Nilana wik many-many kuyam waa'-waa' thant than yipam pam wanchangana minam ngaantam-ngeeyayn kuchek thanttamangana wik nungantam anangana. ³⁴ Nil wik kath anman waa'-waa' thant. Than Jesus-a, ngurp nungantam wee'anangana, than-thanam ngulan nyiin-nyininan-a, an ep-paththam nil wik ma'mangkam anangan engkanang ngul waa'-waa' thantana.

Inan Wik Kath Yeelal Pi'anan Ek A' Wunt Pi'anan Wunp

³⁵ Nguta-ngutang ngulana, aak ngaa' ngulan wun-a, nil Jesus.an thaw thant ngurp nungantam al-alantan, “Ayyang, ngamp wo'uwaynak mo'āmp a!” ³⁶ Yaa, than chukkunang chang peyin, chukkun angman nil Jesus.an keenkan nyiin-nyiin. Chukkun yot thaman ngakang

angman than-thanin. Than pam wanch yot anangan want thanang, a' than karpam ngul mo'in. ³⁷ Anpalaniy-a, wunt pi'an wunp a' yeelal pi'-pi'anam ek-ekin ngul, a' ngakan kan thaa' maay-maay chukkunanganiy. ³⁸ Nil Jesus.ana weep thayan wun-wun, kuchek pillow maak-maak, chukkun koy-koyyuw wun-wun. Than ngurp nungantam al-alangan weepam ekathin nunang, a' thawin nungant, "Ayyang, moom-ang! Nint ngul wanttake? ke'am ngaantam-ngeeyangan ey? ngamp ngul yotam inangan thuchāmpwey ey?" ³⁹ A' nil Jesus.an ek, a' wik pi'an thaw wunt alantan, "Kana! Appap ngula!" A' nil yeelal alantan thaw, "Kana! Enyan ngul wunāna!" Ananiy-a, wunt pi'an ya'-ngul weem, a' yeelal pi'anaman-a, ngakan enyan ngul ump, ya'-ngul. ⁴⁰ Amanamaniy-a, nil Jesus.an thaw thant ngurp nungantam al-alantana, "Niiy ngul ngeenam winyngang mo'aniy e? Niiy God.an ke'am ngangkang pi'-pi'aniy ey?" ⁴¹ Puth thananiy-a, ngangk ikin, winyngang mo'in, a' thanan thawin thant-takaman, "Apey, nil ngul in wanttake? In nil pam wiy-wiyam ey? Wunt-a, puth yeelal alantan wik pi'an an thaw-a, pulan-a, appap paththam wunpul, ana aak ya'-ngul enyan paththam ween."

5

Nil Jesus.angan Paman Miyalath Nunang Oony Way Ngangkangan Pi'-Pi'

¹ Nil Jesusa puth ngurp nungantam anangana, wo'uwayn peyin chukkun thanttamang aak Galilee.am anpalaan, aak pam wanch Gerasenes al-alantamakan. ² Aak angana nil pam wun oony way ngangkangan pi'-pi'. ³ Nil aak kunttowangan wun aak than pam mul anangan kaamp-kaampin thanang, awar pi'anangan wun-wun, nil thonakam, pam wiy-wiy ya'a, puth nil

pam weenth, ke'-paal awarangan wun-wun. ⁴ Than pam wiyangan ma'-yotam chainsangan ma' kathin nunang, puth ya'angam, nil chains anangan thuth-thuth, a' than yuk chainsangan tha'angan kathin nungantang, puth ya'angam, nil ya' nhandhath chainsana. Pam weenth anman an karangk paththam ween, than ke' mamiythan nunang nochathiythan nunang-a, popam pi'iythan nunang-a, puth ya'angam ey! ⁵ Kinchanga puth ngutang nil pam weenth anman pal-puy iyy-iiy, graves wakanang iyy-iiy, a' puyam keny ngul yoyk wakanang iyy-iiy. Nil wik othamayan pech-pech a' putha kunttow pepanang thak kemp nungantakaman ump-ump.

⁶ Than Jesus wee'ang wo'uwayn kanan wampin-a, than chukkun amanam ukin. Nil pam weenth alangan kecham thathan Jesus.an, a' nil aak kunttow amanam pent a' umang kamp othamayan mo' nungant Jesus.antan, a' pungkang thuch nungant. ⁷⁻⁸ A' nil Jesus.an thaw oony way alantan, “Nint kan pentān pam ilantamana.” A' nil pam weenthana wik othamayan pech, “Jesus ey! puk nhengk pam ngench wuut pi'an alantaman ey! puk nhengk God.antum nintiya! Nint ngul ngeenak wampan ngathar e? Nint ke' wayathān ngayang! Nil God.angan ngeeyan ngayang ngay inan thawang nungk,” paman thaw Jesus.antan. ⁹ A' nil puth Jesus.ana engk nungant pam alantan, “Namp nungkar wanttaka?” Nil paman thaw nungant, “Namp ngathiya, inana Moba, puth ngan yota!” ¹⁰ Pam weenthana putham thaa'-mamanang thaw-thaw Jesus.antan, “Nint oony way yot anangan ke' kuchān thanang aak inpalan.”

¹¹ A' minh nhinthan yot anangan kech ke'an iyy-iiyin may mungk-mungkin, aak achantang kaa' um pek kech wo'uwakan. ¹² A' than oony way yot anangan thaa'-mamanang thawin nungant Jesus.antan, “Nint nganang

ang kuchān minh nhinthanantang ngoonchān thant-tanga.” ¹³ A' nil Jesus.an thaw thant, “Kan iyyāna!” Amanamaniya, oony way yot anangan pol-pol pent-pentin pam alantaman, a' minh nhinthanantangana wupam ngoonch-ngoongchin ma'mangkamantang minh nhinthan yot thaa'-wantanama two thousanda! Minh nhinthan anangan kamp othamayam mo'-mo'in a' kaa' um pek keekin ngakangan a' mul wunin ngul.

¹⁴ A' than pam anangan minh nhinthan anangan pi'-pi'in-a, than kamp mo'-mo'in, wikan pal-puy waa'-waa'in pam wanch wiy al-alantan, aak townsang angan wun-wunin a' puth thant aak farmsang angan wun-wunin thamp. Than pam wanchangan aak thanttaman too wantin, a' aak-aakanakaman iyyin Jesus.antan yipam thathayn wanttakan nathan yump. ¹⁵ A' than Jesus.antan wampin a' than thathin pam oony way yotan ka'athaman ngangangan pi'-pi'. Nil angman nyiin-nyiin minam ngul Jesus.antang, ngook thampa, a' kuchek min ngul, ke'am ngul weenth-weentham ya'-ngul. Than pam wanch yot anangamana winyngang ngul mo'in. ¹⁶ Than pam wanch mee'miy al-alangan waa'-waa'in thant wiy al-alantan than ke'aman thathin Jesus.angan oony way yot kuch thanang minh nhinthanantang ngoonchin ngul. ¹⁷ A' than yotana kan-ngul thaw-thawin nungant Jesus.antan, “Nint kan-ngul aak inan wantāna.”

¹⁸ Yaa, than Jesus a' putha ngurp nungantam anangan kan-ngul wo'waynakan mo'in. Nil Jesus.an ke' chukkungan peyiy-a, nil pam anman Jesus.angan miyalath thaa'-mamanang thaw nungant, “Ngayang ke' wantāna, ngay puy nungkarang iyyāng wo'waynakan.” ¹⁹ Puth nil Jesus.an thaw pam alantan, “Ya'a, nint pal ngatharang ke' iyyān. Nint paththam koyam iyyāna a' waa'ān thant kampan nungkaramantan, nil piip God.angan miyalath

nintang, kuchek wayamana min ngul yump nintang, nil piip God.ana min-minam paththam iyan nungkara.”²⁰ A' pamana koyam ngul iiy kampan nungantamak, a' nil aak thon-thonang iiy-iyy aak towns yotang tenang, nil waa'-waa' thant nil Jesus.angan miyalath nunang. Than yotamang wik inan ngeeyina ana than mee'am ikin.

Inan Wik Kath Kucham: Jesus.angan Puk Many Mulaman Ekath Nunang, A' Putha Nil Wanch Thaman Miyalath Nunang

²¹ Anpalaniy-a, nil Jesus.an koyam wo'uwayn mo', thaa' kuuwama. A' ngul pam wanch yot anangan yalmath-win nungantang. ²² Anpalana, nil pam namp Jairus.an wamp, nil pam inman pam pi'an churchakana. Nilan thath nunang Jesus.an-a, nil pungkang thuchant um nungantang, ²³ a' thaa'-mamanang thawant, “Ayyang, puk nhengk ngatharaman way-wayam wun-wunana, wanch manya niliya. Nint ke' iyyin nungant ey? ma' ke' wunpin nungantang ey? ke' yipmam uthamowa, puth kemp miyal koyam wunow.” ²⁴ Nil Jesus.ana kan-ngul iiy nungantang Jairus.antangan, puth pam wanch yotangan angman wuthanathin nunang, Jesus.ana, pam wanch thaa'-wantanama!

²⁵ Nil wanch thonam angmana, nilan wewmang want-want nunang kaap twelve.akam. ²⁶ Nilaniya wukal ke'anang ngul puth nil wukal ma'mangkam thee' nooyan al-alantan. Puth thananiy wanchana ke'am miyalathin nunang, ya', puy-puyam weechan nunang. ²⁷ Nila wanch alangan wik thoo' ka'athaman ngeey Jesus.ana, nil puth koy-koyyuw iiyant Jesus.antan. ²⁸ Nil nungantakam ngaantam-ngeey, “Ngay nath ngook nungantaman mamingwey-a, ngay kemp miyal koyam ngul weemānga.” ²⁹ A' nil ngook Jesus.antaman mamantam. Anpalaniya, wewmangan ke'-ngul want-wantan. Nilana kemp nungantaman ngeechan ke'-ngulan wewmangan

want-wantowana, miyal paththam ngeechan ngul. ³⁰ An-aniyangan-a, nil Jesus.angan kemp ngeechan nungamang nilan wee'-nathan miyalathana. Nil erkam weent thant a' thaw thant, “Ayyang, ngook ngatharaman wee'ang mamar?” ³¹ Than ngurp nungantam anangan thawin nungant, “Ayyang, nint thathān thananga! Inan puth pam wanch yota tha'-tha'wuntan nungkarang wakana! Ngul nint wanttak thawin nil wee'ang mam nintang a?” ³² Nil puth Jesus.angan yotantan puyam thath-thath wee'ang mam nunang. ³³ Nil wanchana kan ngaantam-ngeey nungantakaman nil Jesus.angan koyaman min kan yump nunang, nil puth winy-winyang iyy Jesus.antan, a' pungkang thuchant um nungantang, a' waa' nungant nilan kan-kanam ngook nungantaman mam. ³⁴ Nil Jesus.ana thawant, “Ayyang, nhengk ngatharam-ang, nint kan-kanam ngaantam-ngeeyan ngayangan, ngayan miyalathāng nintang. Anpalana, ngay kan-kanam puth miyalathang nintang. Nint kan-ngul ngangk minangam iyyān aak nungkaramakan, a' kemp min anman iyyāna.”

³⁵ Nil Jesus.an wik inangan thaw-thaw yippak-a, than pam anangan wampin aawuch Jairus.antaman anpalana. Than thawin nungant Jairus.antan, “Puk nhengk nungkaram kanam uthama. Ke' thawān Jesus.antan aawuch nungkaramakan iyyowa. Nil aak-ya'ang ngul iyya, pukan mul ngula.” ³⁶ Than nungkway thawin nungant-a, nil Jesus.an ke'-ngoongkam iyy-iiy, nil puth Jairus.antan thaw, “Nint ke'a kuchek wayamāna, nint ngayangam anman ngaantam-ngeeyāna, ngayan ngul miyalathāng nunang.” ³⁷ A' nil Jesus.an iyy ngul Jairus.antang. Nil pam ko'alam al-alantan thaw thant kuy thee'ayn nunang; Peter-a, a' puth pul kuuncham, James a' puth John. Nil wiyantan thaw ke' iyyayn nungantang. ³⁸ Than kanan wampin aawuch Jairus.antam angan-a, nil Jesus.angan

wik wolmp ngeey, pam wanch othamayanan peey-peeyin. ³⁹ Nil pek ngooncha, a' thaw thant, “Niiy in ngeenak wik wolmp pi'-pi'aniy a? Othamayan peey-peeyaniy thakana? Niiy ke'a! Nil wanch manyan ke' uthama, ya', nil weep thonakama wun-wunan.” ⁴⁰ Puth pam wanchangan thaa'-thengkathin nunang Jesus.an. Nil puth Jesus.angan-a, kenth thanang, yoon kuch thanang. Nilan kaath-kunch a' piip-kunch a' ngurp nungantam ko'alam anangaman ep kal thanang pek ngoonchin puk manyan wun-wun. ⁴¹ A' nil Jesus.an puk many alantan iiy, a' ma' mam nunang, a' thawant wik nungantamangan, “Talitha koum.” Wik ngamparamanganiya, “Ayyang, wanch manya, ngay thawang nungka, ekāna.” ⁴² A' nil wanch manyana erkam paththam ek, a' kan-ngul iiy-iiy. (Nil puk komanana kaap twelve wun.) Than inan thathin-a, than ya' paththam mee'am ikin. ⁴³ Nil puth Jesus.an thaa'-thayanam thaw thant, ke' waa'ayn wiyantaniy. Anpalana, nil thaw thant may thee'ayn nungant.

6

Nil Jesus.an Koyam Iiy Aak Nungantamakan

¹ A' nil Jesus.angana aak anana want ngul a' nil iiy ngul koyam aak nungantamakan, ngurp nungantam anangan-a, karpam iiyin nungantangwey. ² Aak Saturday ngulan-a, aak thant ngench thayanan wun-a, nil Jesus.angana kanngul thaa'-aath-aath thanang pam wanch anangan aak churchangan. Pam wanch yota angman churchangana, than wikan ngeeyin nunang Jesus.an-a, than yot anangana mee'am ikin, a' thawin ngula, “Nil pam inana nil wik inangan want-wanttak thiich e? Nil inan wanttinpal kuchek waap minaniy uw e? A' puth nil work pi'-pi'anam inangan want-wanttak yumpan e? ³ Pam nil aawuchan kaach-kaachan ya' ey? Puk otham Mary.antamaniy ey?

Nil puth anman ey! Pam kuunch nungantama inanganante! — James-a, Joseph-a, Judas-a, a' Simon, a' putha wanch kuunch nungantam inangan wuntan e!” Than wik yimanangan thawin, thanan puth kaangk ke' wik ngeeyayn nunang Jesus.ana. ⁴ A' nil Jesus.an thaw thant, “Nil wee'angan nathweya wik God.antamana waa'-waa'iy kampan nungantamakaniy-a, than anangan ke'-ke'am nungantama, puth ke' wik ngeeyiythan pam alantama, pam wanch wiy nath-nathan wuntan-a, than ep wik nungantaman ngeeyantan.”

⁵ Nil Jesus.angana pam wanch alpan ko'alam al-alantan thonakama ma' wunp thant a' miyalath thanang, nil work pi'-pi'anam yota ke' yumpiy thant aak angana, ya'a. ⁶ Nil puth mee'am ika, than puth pam wanch aak anangan wun-wunin-a, ke'am ngangk thee'in nungant, ya'a.

Jesus.angan Ngurp Nungantam Twelve Anangan Kuch Thanang Nath-Nathangan Iiyayn

Nil Jesus.ana aak angman pal-puyam iyy-iiy, aak village thon-thonan uw, a' kan-ngul pam wanch thaa'-aath-aath thanang. ⁷ A' nil pam ngurp nungantam twelve anangan karpam yalmath thanang a' thaw thant kuch-kucham iyy-iiyayn pam wanchant, wik minan waa'ayn thant. Nil thaw thant a' puth thayanam yump thanang yipam oony way anangan kenth-kenthayn pam wanch al-alantaman ngangkangan pi'-pi'inwey. ⁸ A' nil wik thayan thaw thant, “Niiy ma'lip iyyāna, yuk pil thook thonakama kalāna. Niiy may breadana ke' kalāna, a' niiy bag ke' kalān mayakan. A' niiy wukal ke' kalān. ⁹ Niiy tha' murrukana ngoonchāna, a' putha niiy ke' kalān ngook kuchamana, thonam anman ep kalāna.” ¹⁰ A' nil wik inangan thaw thant, “Niiy nathwey aak townang kanan ngoonchān-a, a' than wiy

anangan umang iyy-iyyiythan niyantwey, a' ngangk minangan ngoonchathiythan niyangwey aawuch thanntamakan. Yaa, niyaniy-a, aak angman wunān aawuch thanntamangan a' anpalman ngul iyyān aak thonak ngulana. ¹¹ Niiy nathwey aak town thonak ngulan wampān-a, a' than umang ke'wey iyyiythan niyantaniy, a' puth than wik kaangk ke' ngeeyiythan niyantam. Yaa, niyaniya aak anana too wantāna, a' tha' wook wunyathān, puth anpala than kaangk ke' wik niyantaman ngeeyayn. Than thathayn niyang yimanangan yumpān-a, thanan nath ngul ngaantam-ngeeyayn thanntakaman than waywayam paththaman iyy-iyyantan.” Nil Jesus.an wik yimanangan thaw thant ngurp nungantam al-alantan.

¹² Amanaman-a, than kan-ngul iyyin, a' wik minan kangul thaa'-aath-aathin pam wanchana, woyan wayan ke' wakayn, woyan min anana wakayn. ¹³ A' oony yot anangan kenth-kenthin pam wanchantamwey ngangkangan pi'-pi'in, a' putha yuk olive oilan yeech-yeechin thanntang al-alantangan weech-weech thanangan, a' amanamaniya than miyal ngul wunin.

Nil John.an Mul Wun, Pam Nilan Kuchekan Kuungk-Kuungk Thanang

¹⁴ Anpalana, nil King Herod.angana wik ngeey Jesus.antamana puth wik thoo' kanam we'aram nungantam work pi'-pi'anaman nilan yump-yumpan. Pam wanch wiy anangan thaw-thawin, “Nil pam nanman John.an ey? kuchekan kuungk-kuungk thanang ey? Nil mulan kan ek ey? Nan nilama, nil ke'-paal work pi'an nanangan yump-yumpana! Ngananiya ke' nunang thathathanana.” ¹⁵ Puth wiy anangan thawin, “Nilana Elijah paththama!” A' wiy anangan thawin, “Nilana pam prophet ey? ke' pam prophets keenkanaman wunin ey?”

¹⁶ Nil Herod.ang wik inangan ngeey-a, nil thaw, “Nil pam nanman John.ana! kuchekan kuungk-kuungk thanang! Ngay ka'athangaman thawangan thant kuchek nungantaman thalokang umpayn, puth nil mulaman koyam ek ey!” ¹⁷ Nil puth King Herod.ana ka'athangaman thaw thant pam nungantam al-alantan workan iiy-iiyin nungant, “Ayyang, niy pam nanan John mamān nunanga!” A' thananiya mamin nunang, a' thap-thapam kathin nunang, a' kalin nunang jailak. Nil Herod.angan puth kaangk ke' ngeeyow nunang John.angan wak-wakow nunang wanch nungantam alantaman, nil puth wanch pont-kunchan ma'am piiyan Philip.anweya, nil ngul wanch nungantakam maayana, wanchaniy nampa Herodiasa. ¹⁸ Puth nil John.ana nathpalman thaw-thaw nungant, “In min ya'a nint wanch nalantangan wunwunangana. An wanch nungkar ya'a! An wanch pont nungkaram alantamana! Nint wik thayan God.antam pipipangan ey!”

¹⁹ Nanpalaniy-a, nil wanch Herodias.angana ngangk-wayang kal-kal nunang, John.an, nil kaangk mulathow nunang, puth ya'a, ²⁰ nil puth Herod.an winyayang mo' John.antaman, nil mee'miy nunang pam min-minam paththam, nil ke'-paal week nunang wiyangan ke' yipam mulathayn nunang. Nil ngeey-geey nunang wikan waa'-waa'-a, kuchek way wun nungant Herod.antan. Puth nungkway kuchek way wunant-a, nil kaangk ngeeyow nunanga!

²¹ Nil wanch Herodias.angana ngaantam-geey nungantakam nil John.an wanttakan mulathow nunang, nil puth kuup-kuup yippaka. Ngul anpalaniya, aakana kan wamp King Herod.antamakan birthday wun. Nil Herod.an thaw thant may pi'anant yumayn thant moom pi'-pi'anant al-alantan, Government anangan-a, a' puth

thant moom thanttam soldiers al-alantaman, a' puth pam wanch pi'-pi'anam aak Galilee anpalman wampina. ²² A' nil puk otham Herodias alantaman ngoonch-a, nil-nilam kee'-kee' mee' yotantangana. Nil Herod.ana a' pam wanch yotam anangana puth ngangk min wun thanta, nil puth King Herod.an thaw nungant wanch koman alantan, “Ngay inan kan-kanam thawang nungkara. Nint ngeenakan kaangk thawān ngath-a, an ngay thee'āng nungkaran.” ²³ Nil ma'-yotam thaw nungant nil kan-kanam kaa'ngak nunang, “Ngay inan kan-kanam thawang nungkar. Nint ngeenakan kaangk thawān ngath-a, an ngay erkam thee'āng nungka. Nintwey thawān ngathwey-a, nint aak wiy anangan ngatharamana kaangk pi'ān thanang-a, an ngay puth thee'āng nungk.” ²⁴ Nil wanch komanana kaath-kunchant iiy, Herodias alantan, a' thaw nungant, “Ngay puth ngeenak thawāng nunganta?” Nil kaath-kunchan thawant, “Nint thawān nungant kuchek John.antaman thee'ow nungkara.”

²⁵ Nil wanch komanan erkam koyam iiyant King Herod alantan a' thawant, “Ayyang, nint ngathar kuchek John.antaman inman thee'ān ngatha! a' plate.ang pal kalāna!” ²⁶ King Herod.antan-a, ngangk way wunanta, puth nilan kaangk ke' mulathow nunang pam John.ana. Nil puth ke' wik pipiw wanch koman alantan nilan thaw nungant kon yotantangana kuchek John.antamakana, ²⁷ yaa, nil thaw nungant pam soldierantan kuchek John.antaman pal kalow. Nil pam soldieran iiy a' John.ana mulath nunang, kuchek nungantaman thalokang ump, ²⁸ a' pal ngul kal-kal yuk plate.ang wanch koman alantan. A' wanch koman alanganiya kaath-kunchant ngul thee', kuchekana. ²⁹ Ngurp John.antam al-alangan wik inangan ngeeyin-a, than wampin aak jailakan a' pam mulana maayin nunang, a' awarang kaampin nunang.

Nil Jesus.ang Pam Wanch Thaa'-Wantanam May Aath Thanang

³⁰ A' than ngurp nungantam ananganiya palam ngul wampin nungant Jesus.antan, nilaman kuch thanang wik nungantaman we'arathayn. Than waa'in nungant ngul than ngeen thakan yumpina, a' thaa'-aath-aathinan thanang thampa. ³¹ Puth than pam wanch anangana yota woonch-woonchin thanta. Than Jesus-a, puth ngurp nungantam anangana, than ke' may mungkiythan-a, puth ya'a, pam wanch yot an-anman kuyam wamp-wampin nungant Jesus.antan. Nil puth Jesus.ana thaw thant ngurp nungantam al-alantan, “Ayyang, ngamp puy iyyampa pokkapanga, aak enyanang puy nyiinampa, niiy yipmam ngangkang thee'anweya.”

³² Yaa, thananiya kan-ngul mo'in chukkunangan aak thonakan, than yipam aak enyanang nyiinayn than-thanama. ³³ Than puth pam wanch yotangan kanam thathin thanang, than mee'miy an thanamana Jesus a' ngurp nungantam anangan mo'in chukkunangan, than monkanam kuchin thanang aak wanttinakan mo'in — yaa, thananiya kan-ngul aak village thon-thonana want-wantin ngula, a' kamp-kamp ngul mo'-mo'in aak e' wakana. A' aakana keenk uwin, pam wanch yot al-alangan a' man umputh ngul kuup-kuupin Jesus wee'anangan thant. ³⁴ Nil Jesus.ana kanan chang pey chukkunaman-a, a' nil pam wanch yot anangan thath thananga, a' nil puth ngangk mam thanang, thanan puth ke' minh sheep yimanangan, than-thanaman iyy-iyyin, ke' moom ke'anang yimanangana. Yaa, nil Jesus.angana kan-ngul yot thaa'-aath-aath thanang, wik min God.antaman. ³⁵ Kinch-wayang ngulana, ngurp nungantam Jesus.antaman wampin nungant, thawin nunganta, “Ayyang, in kinch-wayang ngula, a' aak inan man-

kecha! ³⁶ Nint pam wanch anangan kuchān thanang than iiyayn aak farms aakanakan, a' puth villages aakanakan thinth-thinthan than-thantana, a' may piyayn thant-takaman.” ³⁷ Nil Jesus.an thaw thant, “Niiyam may thee'ān thant.” Than thawin nungant, “In wanttak ee? Ngan two hundred dollars mayak thee'ān ey? Ngan may yipmam aathān thanang ey?” ³⁸ Nil puth Jesus.an thaw thant, “Niiy may bread ngeen-geen pi'-pi'aniya? Niiy iiyān, thathāna.” Than iiyin, a' palam wampin waa'in nungant, “Ngan may bread five pi'-pi'anana, a' putha minh nga' kucham tham.”

³⁹ Anpalaniy-a, nil Jesus.an thaw thant ngurp nungantam al-alantan, “Niiy thawān thant pungk-pungkalang nyiinayn, wakang anangan, wak nyiinganamang.” ⁴⁰ A' than pam wanch yot anangan aakang nyiinin ngul, pungk-pungkalangan nyiin-nyiinin, fifty-fifty a' one hundred-one hundred nyiin-nyiinin.

⁴¹ A' anpalaniya, nil Jesus.angan-a, may bread a' minh nga' anangan ma'ang maay, a' mee' keny thath, a' mee'-wuthanam God.ant, thankyou thaw nungant may minh aakanakan. Nil may bread anangan pip-pip thanang, a' thee' ngurp nungantam al-alantan than yipmam kalayn pam wanch yot al-alantan. A' nil minh nga' kucham thaman pip-pip a' than thee'-thee'in thant. ⁴² Than pam wanch ma'mangkam al-alangan mungk-mungkin ngul, a' thip oth ngul wunin. ⁴³ A' than ngurp nungantam al-alangana may nhandh anangan yalmathin a' yuk basketang wunpin. May nhandh a' minh nga' nhandh al-alangan baskets twelve thaa' mul maay.

⁴⁴ Pam anangan than mayan mungkin-a, an yota, thaa'-wantanam, five thousanda!

Nil Jesus.an Ngak Pal Kenyuwan Iiy-Iiy

⁴⁵ Anpalaniy-a, nil Jesus.an thaw thant ngurp nungantam al-alantan chukkunangan chang peyayn a' wo'uwayn keenk mo'ayn aak Bethsaida aakanakan. Than kanan mo'in-a, nil Jesus.an pam wanch thaa'-wantanam al-alantan thaw thant aak thanttamak kan iiyayn. ⁴⁶ Nil kanan kuch thanang-a, nil-nilam aak yoykakan iiy, nil yipam mee'-wuthanamow piip nungantamantan. ⁴⁷ Anpalaan-a, ngaa' kanan ench-a, ngurp nungantam anangan angman chukkunang kookam pi'an angman puth nil Jesus.aniy-a, yoykang angman yippak pokkapang nyiin-nyiin. ⁴⁸ Nil thath thanang ench-enchin, wuntan thaamp-thaampin, an puth aak paanthanangan nil Jesus.an umang iiy thant ngul, ngak kenyangkan iiy-iyy. Nil ke' waank iiyiy-a, ⁴⁹ puth thanan thathin nunang ngak kenyangkan iiy-iyy. Than ngaantam-ngeeyin thanttakaman, "An oony ey?" a' than othamayan pech-pechin. ⁵⁰ Than thath-thathin nunangan-a, than yotaman ngangk ikin a' winyinyang paththam mo'in.

Nil Jesus.an erkam thaw thant, "Niiy ke' winyinyang mo'āna! In ngayam wampang niiyanta! Niiy ngangk thayanam ke' iyyin ey?" ⁵¹ A' nil chang pey chukkunangan thanttang a' anpalaniya wuntan enyan ngul, kan-ngul wun-wun. Than ngurp nungantam anangan-a, mee'am ikin, ⁵² than puth ke'am minam ngaantam-ngeeyin nil ngeenam mayan aath-aath thanang pam wanch thaa'-wantanam anangan, five thousand anangan, than puth ke' thiichiythana.

Jesus.angan Miyalath Pam Wanch Aak Gennesaret Angan

⁵³ Anpalaan-a, than wo'uwayn peyin chukkunangana a' aak Gennesaret.akan wampin. Chukkun thanttaman-a, angan muuntin. ⁵⁴ Than chukkun kanan wantin-a, pam wanch anangan wampin, thanana thiichin nunang pam

ngurp nilam Jesus.ana. ⁵⁵ A' thananiy pam wanch aak nath-nathpalana kamp mo'-mo'in nungant Jesus.antan; aak want-wanttingan nil-a, wik thoo'an ngeeyin, a' thanana iiyin nungant, pam wanch alpan anangan thaka pengkarangan wampathin nungant. ⁵⁶ Aak want-wanttinakan iiy-a, aak villagesak nath-a, aak townak natha, aak farmak nath iiy-a, than pam wanchangana pam wanch alpan anangan wampathin thanang nungant, a' wunpin thanang aak we'arang angan. Than pam wanch anangan thaa'-mamanang thawin nungant, "Ayyang, than alpan al-alangan kulich thaa'an nungkaram ke' mamiythan ey? miyal yipam wunayna?" A' than alpan al-alangan kulich thaa'an mamin nungant-a, an miyal paththam wun-wunin.

7

Than Pam Pharisees Al-Alangan Wik Min God.antaman Thaamp-Thaampin

¹ Than puungk wiy Pharisees anangan-a, a' putha pam pi'an wiy anangan thamp than wik thayanan thaa'-aath-aathin thanang, than puth aak Jerusalem anpalan wampin angman yalmathin nungantang Jesus.antangan. ² Than thath-thathin thanang ngurp Jesus.antam wiy anangan may thanttakaman mungk-mungkinan, than puth ma'an minam ke'am pungin, ke' than Pharisees anangan wik thay-thayanam thawin thant ma' min-minaman pun-gayna. ³ (Than puth Phariseesa puth Jews wiy anangan thama than woyan anman wakin wuut mangk thanttam al-alangana wantina; thananiya ma' min-minam kuyam pungin may mungkinanakana. ⁴ Puth than nath maywey piiiythan store.aman-a, ka'athamaniya mayan ngakang min-min pungina a' mungkin ngul. Puth wik thayan wiy

anangan thak monkan-wak-wakina wuut mangk thant-tam al-alangan wantin thant. Thananiya yuk cups, a' pots, a' bowls-a, putha wurp anangan thak min-min kuyam pungina.)

⁵ Yaa, puth than anangan Phariseesa a' pam anangan thana wik thayanan thaa'-aath-aathin thanang, thanan engkin nungant Jesus.antan, "Ayyang, Jesus-ang, an than ngurp nungkaram al-alangan kan kumin ey? aak ngamparam wuut mangk al-alangan wantin ey? Than may mungkanakan-a, thanana ma' min-min ke'am pung-pungantan ey?" ⁶ Nil Jesus.an thaw thant, "Niiy yaan muuk-muukamaniya! Aak keenkanaman-a, pam Isaiah alangana wik kan-kanam waa'-waa' niyanganiya. Nil putha piip God.angana wik inangan waa' nungant pam Isaiah alantan:

'Pam wanch than il-ilangan thaa'-kuumpantan ngayangana,

puth ngangkaman ke' thaa'-kuumpantan ngayang, ya' ey!

Than yaan muukamantana,

than kecham iiy-iiyantana ngatharamaniya.

⁷ Than aak-ya'ang thaa'-kuumpantan ngayang,

than puth wik thayan pamantamana thaa'-aath-aathantan thanang wik thanaman ngaantam-ngeeyantana,

puth wik inangan wik ngatharam ya'a,

than thawantan ke' wik minan waa'antan, nil ya'a,

yaan wik uuy-uuyamantan.'

⁸ Puth niyaniya wik thayan God.antamakana man-mangkam thee'aniy, niiy ke'am thak ngeeyaniy ya'a, wik pamantamana an ep-paththam niiy konangam pi'-pi'aniya."

⁹ Nil Jesus.an putham thaw thant, “Niiy wik thayan God.antaman epankathaniya niiy yipam wik thayan niyantam anman waa'-waa'ān wiyantana. Niiy ke' kuchek waap min ngaantam-ngeeyaniy niyantakamana, puth ya'a. ¹⁰ Nil puth Moses.an thaw, ‘Niiy ngangk minangam iiyān kaath piip niyantamakan. Niiy wik thanttaman erkam ngeeyān, a' ma'-aathān thanang.’ A' putha nilana wik inangan thamp thawa, ‘Nil wee'-wee'ananganweya kaath piip thanttamak thaa' poch-pochaman thawayn thant-a, koonhangan akayn thanang-a, an niiy mulathān thanang.’ ¹¹⁻¹² Niiy kaath piip niyantaman min-minam pi'āna, may thak aathān thanang, puth ya'a, niiyan thawaniy, ‘An min ngampar wik Corban thawimp thant kaath piip ngamparamakana, wik yimanangan, “Ngay ke'-ngul pi'ing nipangana, wukal inangana pi'-pi'ānga nungant, piip God.antan thee'āng, work nungantamak, nipar ya'a!” ’ An ya'a! Niiy wik yimanangan ke' thawān kaath piip niyantamakan. ¹³ Niiy wik yimanangan waa'-waa'aniy pam wanch wiyantan-a, an puth niiyan wik piip God.antamana thaamp-thaampaniya! A' puth niiy way ma'-yotam yimanangan yump-yumpaniya!”

Nil Jesus.angan Waa' May Ngench Thayan Alangan Way Ke' Yumpiy Ngampang

¹⁴ A' nil Jesus.angana pam wanch yot anangana ump thanang nungantangan thinth wampayn, a' nilan thaw thant ngul, “Niiy wik inangan ngeeyāna! kuchekangan pi'āna! ¹⁵ Nil pamang nathweya may ngench thayanan mungkiy-a, nil puth God.angana pam wayana ke'-ngul waa'owana may anpalmaniy. Puth nilwey pamang wik way anman ngangkangaman pi'-pi'iy-a, nilaniya wik way ngul thawiy, an puth nilana way paththam ngul weeniya. ¹⁶ (Niiy nath kon thampwey-a, niiy wik inan ngeeyāna!)”

¹⁷ Anpalana, nil Jesus.angan pam wanch yot anangan want thanang a' pek ngoonch aawuchangan. A' ngurp nungantam anangan engkin nungant wikan koochanathow thant. ¹⁸ Nil Jesus.an thaw thant, “Niiyant kuchek way ngul wunan ey? ke' pam wiy anangan ey? Niiy min-minam ke'am ngaantam-ngeeyaniy ey? Wik ngay nyiingkan waa'-waa'ang niiyantana, an yimanangan wunan. Nil pamang nathwey may ngench thayan anpalan mungkiy-a, nil puth God.angan pam wayana ke'-ngul waa'owan may anpalaniy, ¹⁹ puth mayaniy-a, ngangk nungantangan ke' wunan, ya'a, thipangan ep wunan, amanamaniya may ananganiya pentan ngul nungantam.” (Nil Jesus.an wik inangan thaw-a, nil wik inan waa': may yotam anangan min ngampar mungkanakana, ngench thayan ya'a.)

²⁰ A' puth nil Jesus.an wik inangan thamp thaw, “Puth nilwey pamang wik way anman ngangkangaman pi'-pi'iy-a, nilaniya wik way ngul thawiy, an puth nilana way paththam ngul weeniya. ²¹ Puth than pam wanchangana nath way anman ngaantam-ngeeyiythana, than puth way wiy-wiyam thakan yump-yumpantan ngula — thananiy-a, pam wanch wiyantama way min ma'-kuchathantan thanttakam a' puth pam wanch thak ngulan mulathantan, ²² putha maarich kee'antan; a' puth yangk iiyantana, a' puth way wiy anangan yumpantan; than wiy anangan mee' thenchantan; than ngaantam-ngeey-ngeeyantan maarich kee'anakan; than wiyantaman mee'-wuntana, a' puth pam wanch wiy anangan aak-ya'angan waa'antan thanang, a' puth than ulp-ulpanang iiy-iiyantana, a' puth weenth iiy-iiyantana. ²³ Than way paththam yimanangan iiy-iiyantana puth anpalan than ka'athangaman way pi'-pi'in ngangkangan, thananiy-a, way paththam ngul wuniythan.”

Nil Jesus.angan Puk Wanch Miyalath Nunang

²⁴ Anpalan-a, nil Jesus.angana aak anan want ngul, a' kan-ngul iyy aak thonak, aak Tyre thinthana. Nil aawuchang pek ngoonch, nil kaangk ke' pam wanch wiy al-alangan mee'miy nilan wanttina, an ya'angam, wikan pent. ²⁵ Wanch thonamangan wik thoo'an ngeey nungantam a' erkam wamp nungant, puth puk many nungantam alangana oony way pi'-pi' ngangkangan. Nil kaath-kunchan pungkang nyiin nungant, a' thaa'-mamanang thawant oony wayan kenthowan ngangk puk nungantam anpalan. ²⁶ Nil wanch inana, Jew ya'a, nil aak Phoenicia angan aak-ngeey, aak Syria angan. ²⁷ Nil puth Jesus.an thawant, “Ngay ka'atham may aathāng puk manyiy anangan. Ngaywey may puk manyiy anangan ma'am piying thanang ey? Ku'ant thee'-thee'ing ey? An ya'a! An min ngath ya'a!” ²⁸ Nil puth wanchana thaw nungant Jesus.antana, “Ayyang, moom-ang, puth ku' al-alangan may nhanth anangan mungkantana, table.aman keekina!” ²⁹ Nil puth Jesus.an thawant, “Nint wik min thawana. Yaa, nint kan aakak iyyāna, a' nint puk wanch many nungkaraman miyal ngul uwān nunang, kuchek minam ngul, oony wayana kanam pent nungantam.” ³⁰ Nil wanchan aak nungantamak iyy, a' puk wanch many nungantaman uw nunang bedang wun-wun; oony wayan kanam pent nungantama, miyal ngul ween.

Nil Jesus.angan Pam Weenthan Miyalath

³¹ Anpalana, nil Jesus.angan aak anan Tyre.ana kan-ngul want, a' puyaman ngul iyy aak Sidon aakanakan, anpalana, aak Decapolis anpalman pent, aak town yot than-thanin, anpalana, nil aak Galilee aakanakan ngul iiya.

³² Pam wanch wiyanganiya pam way alpan wampathin nungant, kon-wal weenth pam nilaniyweya, thaa' nganthaliy, nil wik pur'-pur' thaw-thawa, a' thananiya thaa'-mamanangwey thawin Jesus.antana ma' wunpow pam alantangan, miyalathow nunang. ³³ Nil puth Jesus.angana, pam weenthana pokkapang kal nunangweya, pam wiy al-alantamana, a' ma' puk nungantaman pam alpan alantangan wunpant konangweya, a' ma' thaa' theekang namp, a' thaa'nganth anan mamanta. ³⁴ Amanamaniya nil Jesus.anganiya um kenya ngul thatha, a' ngangk pi'an ngul thee' a' thawant pam alantan, wik nungantamangan, "Ephphatha." Wik ngamparamangan thawanampa yimananga, "Kon tho'anamow nungkaral!"

³⁵ A' ananiya, yaam ke'anam paththam-a, wik ngul ngeey-ngeey thanang pam wanch anangan, kon min ngul wunanta, a' puth thaa'nganthana yaal'athanta, wik ngul minam thaw-thawweya. ³⁶ Nil Jesus.angana wik thayanath thanang pam wanch anangan, than angmanan than-thanin, ke' wik waa'ayn thon-thonantan, wik thant-takaman mup-mupam pi'ayna. Nil puth-putham thaw thant, puth ya'angama, than puy-puyam waa'-waa'in, a' wik thoo'an ya' we'aram. ³⁷ Puth than pam wanch yotangan wik anan ngeeyin nungantaman-a, thanan mee'am ikin, a' thawin ngul, "Nil pam ilangan Jesus.angan min-minam wanttak yumpan! Nilaniya pam wanch weenth anangan-a, kon minam ngul yump thanang; putha pam wanch ke'an wik thawantan-a, an thaa'nganth yaal'ath thant a!" A' thanan thanttakam thawin, "In pam nil-niley!"

8

*Nil Jesus.angan Pam Wanch Thaa'-Wantanam Anangan
May Aath, Four Thousandana*

¹ Anpalman-a, puungk wiy ngul pam wanch yot wampin nungant ngula. A' anpalana, may ngul minch thant, pam wanchantan, a' nil Jesus.angan-a, ngurp nungantam anangan ump thanang a' thaw thant, ² “Ngayang pam wanch il-ilangan ngangk mamantan ngayangweya, puth thananiya ma'-ko'alam ingman ngatharanganim iyy-iyyin — puth thananiya may ke'anangwey wunwunin. ³ Puth ngaywey kuching thanangwey aakakan iyyayn-a, may ke' mungkanam-a, thanan puthweya chipchipamana ngul tha'-thayan keekiythan, thanan putha wiy anangan pam wancha aak kecham wamp-wampin.” ⁴ Ngurp nungantam anangan thawin nungant, “Ngamp may yota puth wanttinpala uwāmp thanta aak ingan pinalangan a? Ngamp yipama pam wanch yot thaa'-wantanam inangan aathāmp thanangwey e?” ⁵ Nil Jesus.an thaw thant, “Niiy puy may bread ngeen-geen pi'pi'aniy e?” Thanan puth thawin nunganta, “May bread sevena!”

⁶ Nil puth Jesus.an thaw thant pam wanch yot al-alantan aakang nyiinayn. Nilaniya may bread seven anangan-a, ma'ang maay, a' thankyou thaw nungant God.antan. Amanamaniy-a, may bread anangan-a, manya-manya nhandhath thanang, a' ngurp nungantamak ngul thee'-thee' pam wanchantan yipam yaarkathayn ngul. ⁷ Thanana minh nga' manya thampang, ko'alamwey. Nil Jesus.ana yimanangman thankyou thaw God.antan minhakan, a' nil minhan thee' thant ngurp nungantamakan a' than pam wanch yot al-alantan yaarkathin ngul. ⁸⁻⁹ Than pam wanch-a, a' puka manyiy yotam al-alangan mungkin a' thip oth ngul wunin — pam wanch puk anganiya four thousanda nil Jesus.angana may aath thananga! Maya a' minh kanan minchathin-a, than ngurp nungantam al-alanganiya

maya a' minh nhandh ananganiy-a, maay-maayin ngul a' seven baskets anangana thaa' mulakam piimpa. Nil puth Jesus.an-a, pam wanch yot al-alantan thaw thant kan iiyayn koyam aak thanttamakan. ¹⁰ A' anpalaniya nil Jesus-a, a' puth ngurp nungantam anangana chukkunang ngul peyin a' kan-ngul mo'-mo'in aak namp Dalmanutha aakanakan.

Than Pharisees Anangan Thawin Nungant Jesus.antan Work Pi'anan Meenathow Thant

¹¹ Anpalaniy-a, puungk wiy Pharisees anangan wampin nungant Jesus.ant a' than kul thawin nungant. A' thanan thawin nungant work pi'anan yumpow mee' thanttangan yipam meenathow thant nil God.angan ma'-kunch yump nunang. Thanan puth yaan thawin Jesus.antan wik yimanangan, thanan yipam thathayn nil nath work pi'an nath yumpow, nath ya'a, ke' yumpiy. ¹² Nil puth Jesus.an ngangk pi'anam thee', a' thaw thant, "Than ngul pam wanch anangan inangaman wuntan-a, ngeenak thaachantan ngayang ngay work pi'an mee' thantangan yumpāng a? An ya'a! Ngay work pi'an ke' yumpāng thant. Alangan meenathow thant nil piip God.angan kuch ngayangan, puth ngay ke' yumping thant, ya'a!"

¹³ A' nil Jesus.angan kan-ngul want thanang, nil-a, puth ngurp nungantam anangana chukkunangan chang peyin, a' kan-ngul ench-enchin aak wo'uwaynakan.

Than Ngurp Jesus.antum Al-Alangan Ke'am Yippak Minam Thiichin Nunang

¹⁴ Than ngurp nungantam al-alangan may bread yota ke' kalin, ya'a, kon-ngath thanang, thananiya may bread thonam anmana kalin. ¹⁵ Nil puth Jesus.ana wik thayan

thaw thant, “Niiy mee' yanth-yanth anman iyyān thant-tam pam Pharisees al-alantama a' putha pam Herod alan-taman thampa. Niiy wik way thanttaman ke' ngeeyāna, puth wik thanttam ananganiya, ke' may yeast anangana may breadan ulpathan.”

¹⁶ Than ngurp nungantam anangan kan-ngul wik thaw-thawin thanttakama, “Ngamp may bread ke'ananga, paal nil wik inangan thawa.” ¹⁷ Nil Jesus.angan kanam thiich thanang wik thanan thaw-thawin, a' nilan putha thaw thant ngul, “Niiy ngeenak thaw-thawaniy niiyantakamana ngamp ke' may bread ke'anangana! Niiy ngul mee'miy ya' yippak ey? ke' yippak ngaantam-ngeeyaniy ey? Niiy kuchek way thinhan yippak iyy-iiyaniy ey? ¹⁸ Niiy puth mee' thamp iyy-iiyaniya! Niiy ngul ke' thathin ey? A' putha, niiy kon thamp iyy-iiyaniya, niiy ngul ke' ngeeyin ey? Niiy ke' konangam pi'-pi'aniy ey? ¹⁹ Ngay ka'athamana may bread five.an many-many pip-pipangan a' pam wanch yot five thousand anangan aathangan thanang may five manyiy al-alantama. Niiy yuk baskets ngeen-ngeenang may nhanth ananganiiy maay-maayana?” Than ngurp nungantam anangan thawin nunganta, “Twelve!” ²⁰ A' nil Jesus.an thaw thant, “Ngul amanamana, ngayan may seven pip-pipangan, a' pam wanch yot four thousand anangan aathangan thanang may seven manyiy al-alantama. Niiy yuk baskets ngeen-ngeenang may nhanth ananganiiy maay-maayan a?” A' than thawin nungant, “Seven a!” ²¹ A' nil thaw thant, “Niiy min-min yippak ke'am ngaantam-ngeeyaniy ngayang ey?”

*Nil Jesus.ang Pam Ko'anchan Mee' Min Yump Nunang
Bethsaida Angman*

²² Amanamaniya, than Jesus a' ngurp nungantam anangan aak Bethsaida aakanakan iyyin ngul. Than pam wanch wiyangana pam ko'anch wampathin Jesus.antana, a' thanana thaa'-mamanang thaw-thawin nungant ma' wunpowant, mee'an minam yumpowan. ²³ Nil puth Jesus.angana pam ko'anchana ma' maman, aak townamana yoon kal nunang. A' nil thaa' theek ngul thee' mee' pam alantangan a' amanamana ma' ngul wunpantang pam alantangan. A' nil thaw ngul pam alantana, “Nint aak min-min kan thathangan ey?” ²⁴ Nil puth pam anana mee' ik, a' pal-puy thath-thath, a' thaw, “Ee'a, puth ngay mee' yiil yippaka, ngay manyam thonakam thath-thathang thananga, pam wanch anangan, ke' yuk yimanangan thath-thathang thanang iyy-iiyantana!”

²⁵ Nil Jesus.angan-a, putham ngul ma' nungantaman wunp mee' pam alantangan, a' nil pam alangana oth thath-thath, a' yaam ke'anama an minam ngul thath-thath, mee' min paththam ngul iyy-iiy, minam thath-thath pam wanch anangan a' yuk way min thakan. ²⁶ Nil Jesus.anganiya, koyam kuchan aak nungantamak ngul, a' thawnt, “Nint koyam ke'-ngul iyyāna, aak Bethsaida aakanakana, puth aak nungkaramak iyyāna.”

Nil Peter.angan Minam Ngaantam-Ngeey Nunang Jesus.an

²⁷ Anpalan-a, Jesus-a, puth ngurp nungantam anangan kan-ngul iyyin aak thonak, aak namp Caesarea Philippi.akan, villages yot anganiy wun-wunin. Than iyy-iiyin yippakan-a, nil thaw thant, “Niiyalang, kan niyy waa'iy ngathara. Than ngul pam wanchangan ngayangan ke' wee' yimanangan ngaantam-ngeeyantan ngayangananiya?” ²⁸ Thanan thawin nungant, “Than pam wanch puungk wiyangan ke' John waa'antan nintang, pam anana

kootra ngakangan kuungk-kuungkan thanang pam wanchana, puth puungk wiyangiy ke' pam Elijah waa'antan nintang, a' wiyangiy ke' pam prophet waa'antan nintanga.”²⁹ A' nil Jesus.an thaw thant ngul ngurp nungantam al-alantan, “Puth niya ngayangan wanttak ngaantam-ngeeyaniya ngay ke' pam wee' iniy e?” A' nil puth Peter.an thaw nungant Jesus.antan, “Ayyang, nint in ngeeya! Nintiya Christa, pam anan nil God.angan kaa'ngak ngulan kuchow nganta.”

³⁰ Anpalana, nil Jesus.an thaa'-thayanam thaw thant ngurp nungantam al-alantan, “Yaa, puth niyan wik inana ke' waa'ān paththam thant wiyantana.”

Nil Jesus.angan Waa' Thant Nungamang Nil Uthamowana

³¹ Amanamana, nil Jesus.angana kan-ngul thaa'-aath-aath thanang ngurp nungantam anangan, “Pam wanch wiyanganiya way-wayam anangan yumpayn ngathara, pam ngay inmana nil God.angan kuch ngayang. Than pam pi'an Jews.antam al-alangana man-mangkam ngul thee'ayn ngatharweya, than pam manth-thayan al-alangan a' puth than moom priestsantam al-alangan a' pam pi'-pi'anam wiy al-alangan thampa. Anpalaniya, than mulathayn ngayang ngula, puth kinch ko'alamang ngulan wantow-a, gaya mulaman koyam ekāng ngula.”³² Nil Jesus.angan wik inangan engk-engkanang ngul waa'-waa' thant ngurp nungantam al-alantan. A' puth anpalana nil Peter.angan pokkap kal nunang a' wak-wak nunang Jesus.anweya wik al-alantaman nilan waa'-waa' thant nungamangana.³³ Puth nil Jesus.ana weent ngul a' thath thananga ngurp nungantam anangana, a' wak nunang Peter.ana, “Nint puy iiyāna! Petera! Nint wik nanangan thaw-thawangan ke' oony way pi'an Satan

anana! Nan nint-nint kuchekangan ngaantam-ngeey-ngeeyangana, puth nila piip God.angana yimanangana ke'am ngaantam-ngeey-ngeeyan, ya'a!"

³⁴ A' nil puth Jesus.angana ump thanang ngul ngurp nungantam anangana, putha pam wanch puungk wiy anangana ang wampayn nungant, a' nilan thaw thant, "Nil wee'-nathweya kaangk ngatharanganiy iiyowweya, nilaniya ke' ngaantam-ngeeyow nungantakamana, ya'a. Pam wanch al-alangan nath mulathayn nunanga, ke' ngayangan mulathayn, yuk wuuyanangan waanchayn ngayang. Nungkway than wiyangana nath mulathayn nunang-a, nilana ngayang anman monkan-wak-wakow. ³⁵ Nil wee'angwey wantow ngayangana pam wanch wiyangan ke' yipam mulathayn nunang-a, yaa, nilaniya ke' wuniy aak ngatharamangan ya'a; puth nil wee'anganwey anman ngangk thayanangama monkan-wak-wakow ngayangan-a, a' putha wik min ngatharam anangan waa'-waa'iy thant wiyantan-a, nungkway pam wanch wiyangana thaa'-thengkathiythan nunang-a, nath mulathiythan nunang-a, yaa, an nil ngangk aak umpuyam puth wunow aak ngatharamangana. ³⁶ Pam wanch wiy anangan ma'mangkiy iiy-iiyant, way min yot-yotam pi'-pi'antan aak inganiya. Puth ngay nathwey ke' kaling thanang aak ngatharamakanwey-a, an way min yot anangan min thant ey? Ya'a! Way min yot-yotam al-alangan ke' ngangk min yumpiy thanang ya'a. ³⁷ Than ngul pam wanch al-alanganiya yuk way min thanttaman thee'iythan nungant piip God.antaniy ey? an nil yipmam kaliy thanang aak min nungantamakan ey? Ya'a!"

³⁸ A' nil Jesus.an wik inangan thamp thaw thanta, "Aak yimanang ngulana, pam wanch way ngul iiy-iiyant, a' piip God.ana too ngul wantantan nunang. Pam wanch puungk wiy anangana ngul-nyaa' wuntan ngatharam,

a' putha wik ngatharam anpalan, ngay pam inman nil God.angan kuchanya. Ngul-ngulana, ngay palaman ngul wampāng thanttang ngaantiyongk al-alantangan aak iikanakaman. Ngay pam pi'an paththam wampānga, ke' piip ngatharam anman God.an — aak an-aniyangana ngayaniya ngul-nyaa' thawāng thanttam pam wanch al-alantaman thamp than ngul-nyaa'an wun-wunin ngatharamana.”

9

¹ A' nil thaw thant ngul, “Ngay inan waa'āng niyanta: aakan ngul wampowa nil piip ngatharamangan pam wanch yot anangana ma'-thayanam ngul pi'-pi'ow thananga. Puth pam wanch wiy aak inman yippak wunaniy-a, man-yetham iyy-iiyān aak ngulan wampowa, niyy mee' niyamana ngul thathānweya.”

Than Jesus.an Thathin Nunang Kaa'Wal Nungantaman Ya' Park

² Aak kinch sixangan want-a, nil Jesus.angan ngurp nungantam ko'alam kal thanang yoyk achantangak, Peter-a, a' pul ma'-kuuncham anangan James a' John. Thanam anangaman keny matin. Than thathin nunang Jesus.an-a, a' kaa'wal nungantaman wiy-wiyam ngul ween. ³ Ngook nungantaman pach-pacham paththam weemant, ke' ngamp ngookan punganamp yimanangan ya'a, ngook nungantamaniya pach-pacham pi'a! ⁴ Anpalaniya, than ngurp nungantam ko'alam al-alanganiy-a, thathin pulang, Moses-a, puth Elijah anana angman Jesus.antang, wik thaw-thawpul nungant. ⁵ Anpalana, nil Peter.an thaw nungant Jesus.antan, “Lord-ang, an ngampar min ngamp aak inganiy wunāmpa! Ngay ngorkal ko'alam ke' yumping niyant ey? aak ingman ey? Thonama nungkara, a' thonaniya nungant Moses.anta,

puth thonaniya nungant Elijah.anta!” ⁶ Than Peter wee'anangan winyonyang paththam mo'in, thanan ke' ngaantam-ngeeyin wik want-wanttakan thawayn.

⁷ Anpalaniy-a, yuwan thanttang wakan thuuch, a' ngoyngk alangan thanang ya' kang, a' thanan wik inan ngeeyin yuw anpalan, “In puk nhengk ngatharama, ngay nunang kaangk paththama. Niiyiya puth wik anman ngeey-ngeeyān nunangana!” ⁸ Than ngurp Jesus.antam al-alangan-a, erkam pal-puy thath-thathin, puth pam wiy ke'am thathin, Jesus anman thonakam thanttangana.

⁹ Anpalan-a, thanan yoykam anpalan kan-ngul pek ukin. A' nil Jesus.an thaw ngul thant, “Niiy wik puy-puyaman ke' waa'ān niiy inan thathanana. Ngul-ngulan-a, ngay mulaman ekāng-a, an ep-paththam niiy waa'ān thant. Ngaya pam inman nil God.angan kuchanya.” ¹⁰ Than wik ngeeyin nunang, a' wiyantan putha ke'am waa'in thant a' putha than-thanaman ep thaw-thawin, “Nil wik want-wanttakan thaw-thaw thant, nil ke' mulaman ekowa?” ¹¹ Anpalan-a, than Jesus.an mepin nunang, “Ayyang, Lord-ang, than puth pam pi'an anangan wik thayan anangan thaa'-aath-aathantana, than ngeenak thaw-thawantan nil Elijah.an palaman wampow a' putha nil pam nil God.angan kaa'ngaka mangk nungantangan wampowa?”

¹² Nil puth Jesus.an thaw thant, “Pam ke' Elijah yimanangan wampowa pam wanch woyan wayaman koyam epankathow thanang woyan min God.antamak. Puth lat ngench thayan God.antamangan wik inangan ngeenak waa', ‘Pam wanch wayanang al-alangan wayan ngul yump-yumpayn ngathara, a' man-mangkaman thee'ayn ngathar, ngay pam inman God.angan kuchanya.’ ¹³ Ngay puth inan thawang niyant: pam ke' Elijah yimanangan kan wampa, puth than pam wanch al-alangan way

yumpin nungant, thanan kaangk way anman yump-yumpayn nungant. Lat ngench thayanang wik yimanan-gan waa'an thanan way yumpayn nungant.”

Nil Jesus.angan Puk Ngechwiyan Miyalathan Oony Way Ngangk Nungantamangan Pi'-Pi'

¹⁴ A' anpalaniy ngula, nil Jesus a' Petera, a' Jamesa, putha Johna, than koyam ngul iiyin ngurp thanttam wiy al-alantana. Than kanan uwin thanangan-a, thanan pam wanch thaa'-wantanam thathin thanang, ngurp thanttam al-alantangan angman than-thanin thanttanga a' puth than pam pi'an anangan wik thayanan thaa'-aath-aathin-a, thanan thaa'-thay-thayanamin thanttanga.

¹⁵ Than pam wanchangan Jesus.an thathin nunang-a, thananiya thaa'am ikin, a' thanan umang mo'in nungant.

¹⁶ Ngul anpalaniya nil Jesus.an thaw ngurp nungantam al-alantan, “Niiy ngeenam thaa'-thay-thayanamaniya thanttangana?”

¹⁷ Nil pam thonam inan angman than-than pam wanchantangana thaw nungant, “Moom-ang, ngay puk wuut ngatharam inan kalang nungkara, nil puth oony wayan ngangkang pi'-pi'ana a' nil ke' wik thawiy thampa. ¹⁸ Nil oony wayan wamp-wampan nungant-a, an aakang unchan nunang, a' nil thaa' theek ukanang wun-wunana, nil koonh thak path-pathan nungamanga, a' kemp ma'mangkaman thayan ngul weenana. Ngay ngurp nungkaram al-alantan kan thawangan oony wayan kenthayn nunang ngangk nungantam anpalana, puth thanan ke' kenthiythan nunang ya'a.” ¹⁹ Nil Jesus.an thaw than ngul, “Ngay aak nathpalman wun-wunangan niiyantanga, puth ya'angama, niiyan puth min-minan ke'am yippak ngaantam-ngeeyaniy ngayanga, ya'a. Ngay yaam

kuup-kuupāng niyant ey? Niiyan min-minan ngaantam-ngeeyān ngayangan ey? Puk ngechwiyan pal kalān ngath-ara!”²⁰ Than puk ngechwiyan kalin nunang Jesus.ant.

Nil oony way alangan Jesus.an thath nunangan-a, nil puk ngechwiyan aakang unch nunang a' nil thay-thayanama ngula, a' aakangan pal-puy thee'-thee' nungamang a' thaa' theek pi'an uk-uk nungantama.²¹ Nil Jesus.an piip-kunchant engk, “Aak ma' ngeen-ngeen nil yimanangan weena?” Nil puth piip-kunchan thawa, “Aak nathpalmana nil puk manyaman yippakweya.²² Ma'-yotaman nil oony way alangan ke' mul-mulathanakam nunangweya, nil ma'-yotaman thumang thak thee'an nunang a' puth ngakang thamp thee'an nunanga. Nint ke' ngangk mamin nganang e? Nint ep-paththam nath ma'-kunch-a, nganang yipam ma'-aathānwey-a, ma'-aathān nganang paththama!”²³ Nil puth Jesus.an thaw nunganta, “Nint ngeenak ngul wik yimanangan thawangan ngathara, ‘Ngay nath ep-paththam ey? ma'-kunch ey? ma'-aathāng nipangan ey?’ Nil wee'ang God.an kan-kanam ngaantam-ngeeyan nunanga nil thayan paththaman-a, yaa, nil God.angan ngul yot yump-yumpow nunganta.”²⁴ Nil piip-kunchan erkam paththam pecha, “Ngay kan-kanam God.an ngaantam-ngeeyang nil thayan paththama puth ngay min-minan ke'am ngaantam-ngeey-ngeeyang nunanga, ya'weya. Nint ke' ma'-aathin ngayang ey? Ngay min-min yipam ngaantam-ngeeyāng nunang God.ana.”

²⁵ Nil Jesus.angan thath thanang pam wanch yotangan ya'an wuthanathin thanangan, puth nilaniya wik thayanam oony way alantan thawa, “Ayyang, oony way-ang, nint puk ngechwiyan weenth a' puth wik ke'anang yumpan nunangweya. Ngay wik thayanam inan thawang nungka nint pentān puk nalantamana, a' koyaman ke'-

ngul ngoonchān nungantanganweya!”²⁶ Nil oony wayan wik othamayan pech a' nil puk ngechwiyan aakang unchanwey a' thay-thayanam ngula, ngul anpalaniya nil oony way alangan ya'-ngul wantan. Nil puk ngechwiyan ke' mul yimanang angman wun-wun, a' than yotam anangan thawina, “Nil kanam uthamweya!”²⁷ Nil puth Jesus.angan ma'-mamanang ekathan a' nil puk ngechwiyan than ngulweya.

²⁸ Than Jesus-a, ngurp nungantam anangana aakak kan-ngul iiyin, a' than pek ngoonchin ngul aawuchangan, than-thanam nyiinin. A' ngurp nungantam anangana engkin nungant, “Ngan ngul wanttaka oony way anangana ya'angam kenthān puk alantamana?”²⁹ A' nil Jesus.an thaw thant, “Niiy oony way anangan kaangk kenthān thanang pam wanchantaman-a, niiyiya mee'-wuthanamān piip God.ant, nungantakam thonakama. Wiy al-alangan ke' ma'-aathiythan niiyang kenthanakan thanang, ya'a, nilam epa.”

Nil Jesus.angan Putham Waa' Thant Nungamang Nil Uthamowana

³⁰ A' than Jesus-a, puth ngurp nungantam anangan aak anana wantin ngul, a' iiyin ngul aak Galilee wakan. Nil Jesus.an kaangk than mee'-thenchanam iiyayn, puth nilana kaangk pokkapang thaa'-aathow thanangana.³¹ Nil wik inangan waa' thanta, “Pam way al-alangana ma'am thee'ayn ngayanga pam wiy al-alantan, thananiya mulathayn ngayang, pam ngay inman nil God.angan kuchanya. Kinch ko'alamangan ngulan wantow ngayanga, ngayaniya mulaman ekāng ngula.”³² Puth ngurp nungantam al-alanganiya wik kumin nunang wik nilana thaw-thaw thanta, ke'am thiichin, ya'a, puth than

ke'am engkin nungant wik want-wanttakan nilaniy thaw-thawana, puth thanan winyonyang mo'in nungantama.

Nil Jesus.angan Thaa'-Aath-Aath Thanang

³³ A' than aak Capernaum.akan ngul wampin. Thanana aak aawuchang pek ngoonchin a' nil Jesus.an engk thant ngurp nungantam al-alantan, “Niiy ngeenam thaa'-thayanamaniy woyan wakanana?” ³⁴ Puth than wik ke'am thawin nungant ya'a, puth thanan woyan wakanangan thaw-thawin thanttakamana nil wee'-nathana thanttang pam meek pi'an an iiyow. ³⁵ A' nil Jesus.ana nyiin ngul, a' ngurp nungantam twelve anangana ump thanang ngul angman nyiinayn nungantanga, a' nil thaw thant, “Nil wee'-nathweya pam pi'an paththaman kaangk iiyow-a, nilaniya ke' pam meek ke' yumpow nungantakam, ya'a, nilaniya pam wanch wiy anangana ngaantam-ngeeyow thanang, a' minam pi'ow thanang, ma'-aath-aathow thanangweya.”

³⁶ A' nil Jesus.angan puk many uw a' ma' mamanang kal nunang a' aak umang thanath nunang. Nil puk manyan ompam kath nunang, a' thaw thant ngul, ³⁷ “In ngeeyiya! Nil wee'anganweya puk many inan minaman pi'ow nunang-a, puth nil puk manyan ngathar-a, an nil ke' ngayang ngangk minangam pi'an. A' putha nil wee'-nathweya ngangk minangam iiyow ngathar-a, an nil ke' pam anan piip ngatharam God.anta ngangk minangam iyan nungant thampa, nil puth piip ngatharamangana kuch ngayang aak iikanakan.”

³⁸ A' nil pam John anan thaw nungant, Jesus.antan, “Ayyang, Moom-ang, ngan pam thonam thathan nunang namp nungkaraman wich, a' anpalana nil oony way anangan kenth thanttam pam wanchantam. Ngan puth thawan nungant, ‘Ke' yimanangan thawāna, nil puth pam

anman ke'am iiy-iijan ngamparangana, ya'a.' ” ³⁹ A' nil puth Jesus.an thaw thant, “Niiy ke' wayathin nunang pam anana. Nil wee'ang nathweya namp ngatharaman wichow-a, puth anpalana an nil work pi'an yumpan-a, aak amanam ngulan-a, nil way ke' waa'iy ngayangan, ya'a. ⁴⁰ Than wee'-wee'anangweya ke'amana um thaampantan ngampangan-a, an puth than ke' ngamparang iiy-iijantan, ngurp ngamparam thana. ⁴¹ Ngay wik inangan kan-kanam waa'-waa'ang niiyanta: nil wee'anganweya ngak aathow niiyang niiyan puth ngayangan monkan-wakaniy-a, yaa, nil puth piip God.an kan-kanam minam paththam iiyow nungant.

⁴² “Nil wee'ang nathwey thaach-thaachiy thanang puk manyiy anangana way yumpanakan-a, an than puk manyiy al-alangan kon-ngathan thanang ngula ngayangwey-a, an way-wayam wampow nungant pam alantan nilan thaach-thaachan thanangana. Pam wiy al-alangan nathwey kunttow wuut pi'an manang kathiythan nungant a' anpalaniya wo'uw aakanakan kaliythan nunang-a, a' ngakang pek thee'iythan nunang-a, an way nungant. Puth nil pam alangan nathweya puk manyiy anangan thaach-thaachiy thanang ngayangan ke'-ngulan monkan-wak-wakayn-a, an way-wayam paththam wampow nungantaniya. ⁴³ Niiywey wayan yumpin-a, ma' niiyantam nalangan-a, yaa, niiya ma' niiyantamana thalokang umpāna! niiy ke' yipam way anangan yump-yumpāna. Nungkwaya niiy aak God.antamakan ma' ke'anang iiyinwey-a, yaa, an kan putha! Puth in ngeeyāna: niiy nath ma' kucham thamp aak wayakan iiyin-a, an puth way niiyanta, puth aak anana thum pam-wiy-ke' uthamanan, anman pench-penchana. ⁴⁵ Niiy tha'-tha'ang nath uw-uwin thanang kulakwey-a, yaa, tha' niiyantaman thalokang umpān,

niiy ke' yipam kulakan wenkân. Nungkway niiy aak God.antamakan tha' ke'anangan iiyinwey-a, yaa, an kan putha! Puth in ngeeyāna: nil God.ang aak way angan thee'iy niiyangana tha' kucham thamwey-a, an way niiyanta. ⁴⁷ Niiywey nath way thathin mee' niiyantamangan-a, a' amanamaniya niiy wayan yumpin ngulana, yaa, niiy mee' thiith niiyantamana thapathān, niiy yipam way anangana ke'-ngul thathāna. Nungkway niiy aak God.antamakan mee' ke'anangan iiyinwey-a, yaa, an kan putha! Puth in ngeeyāna: nil God.ang aak way angan thee'iy niiyangana mee' kucham thamwey-a, an way niiyanta. ⁴⁸ Aak angman-a, yuk panth-panth yotan wun-wuntan, ke'an uthamantan, than murkanim pam wanch anangana kemp mungk-mungkantan, putha thum karkanan murkanaman pench-penchan, ke'an uthamana, ya'a."

⁴⁹ A' nil Jesus.an thaw thant ngul, "In ngeeyāna! Niiy yuk saltan wunpaniy minhangan-a, an minhana min paththam yumpan mungkanakan; a' putha niiy minh thumangan kiingkaniy-a, an yimanang thamp minhan min yumpan mungkanakaniya. A' inan ngaantam-ngeeyān thampa: niiywey ke'-ngoongkam anman monkan-wak-wakin ngayangan-a, an than pam wanch wiyangana way thakan yumpayn niiyant. Puth niiy nath way inangan thaampinwey-a, an niiyan pam wanch min paththam iiy-iiyin.

⁵⁰ "In thamp ngeeyāna! Saltana mina, minhakana. Puth salt nath way ngulan wunow-a, niiy ngul saltan wanttaka koyaman min yumpāna? An ya'a! Puth niiya ngangk minangam iiy-iiyān pam wanch al-alantan, ke' pekwuna, puth niiya minam anman iiy-iiyān thon-thonantana, puth amanamana niiyaniya ke' salt min yimanangan iiy-iiyāna."

10

Nil Jesus.an Wik Thaw Thant Divorce.aman

¹ Ngul anpalaniya, nil Jesus.ang aak anan kan want, a' nil wo'uwayn pey River Jordan.ak aak Judea aakanakana. Pam wanch yot anangan putham wamp-wampin nungant, a' nil wikan waa' thant, puth aak nungant yimanangan wun.

² Amanamaniya, pam Pharisees wiy anangana wampin nungant. Than yaan thawin nungant nil wik want-wanttakan thawow thant, “Ayyang, ngul wik thayan ngamparamangan wanttak waa'an e? An ngul min ey? Pamang wanch thum nungantaman aak umpuyangaman wantowan ey?” ³ Nil puth Jesus.an thaw ngul thant, “Nil Moses.angan wik thayan ngeen waa' niyanta?” ⁴ Thanan thawin nungant, “Nil Moses.an wik inangan thaw, ‘Nil nath pam thum nungantamangan wanch-kunchan wantow nunang aak umpuyangaman-a, nil lat manyan thee'ow nungant wanch alantan divorce.akan, a' kuchow nunang ngula.’” ⁵ A' nil Jesus.an thaw ngul, “Nil Moses.ana wik inangan thaw, puth niy pam wayananga, kuchek thayan paththama, ya'angam nganiy ma'-aath-aathin niyanga. ⁶ Nil God.ang aak inan keenkanaman yump-a, anpalana nil kucham yump, pam a' wanch, puth lat ngench thayanangan kan waa' ngampar. ⁷ Nil God.an wik inangan thaw thampa, ‘Nil pam alangana kaath piip nungantam pulang too wantowa, a' pulan wanch-kunchang yipmam karpam ngul wun-wunowpula. Pul kucham ananganiya ke' thonam ngul weenowpula — ⁸ pulana pok-pokkapang ke' wun-wunowpul, pul ke' thonam anmana ngul weenowpul.’ ⁹ Nil piip God.ana yimanangan thaw, ‘Pam wanch ngentwaynan-a, karpam anman iiy-iiyayna — wiy al-alangan ke' wayathayn pulang pam wanch ananganiy, pul

thampaniya ke' wantwuwpul pulantakam, pulan ngangk minam pi'wuwpul pulantakam.' ”

¹⁰ Anpalan-a, thanan pek koyam ngulan ngoonchin aawuchangan, a' than ngurp nungantam anangana thawin nungant Jesus.ant wikan koochanathow thant.

¹¹ Nil Jesus.an thaw thant, “Nil pam wee'ang wanch thum nungantaman too wantiy-a, a' wanch thon ngulan maayiywey-a, yaa, an nilana way yumpan wanch thum nungantamant, nil puth maarich kee'-kee'ana wanch thon ngulan pi'-pi'ana. ¹² Thon inana, nil wanch wee' alangan pam thum nungantaman too wantow-a, a' pam thon ngul maayiywey-a, an nilana way yumpan pam thum nungantamant, nil puth maarich kee'-kee'ana, pam thon ngulan pi'-pi'ana, aakan yimanangan ke' wunowa.” Nil Jesus.an yimanangan wik thaw.

Wik Kath Inan Nil Jesus.an Kaangk Puk Manyiyan Wampayn Nungant

¹³ Ngul anpalaniy-a, pam wanch wiyangan-a, puk manyiy thanttaman wampathin nungant Jesus.antan nil yipam ma' wunpow thant; puth thanan ngurp nungantamanganiy-a, ya' kenthin thanang. ¹⁴ Nil Jesus.angan kaangk puk manyiy puth thanan wampin nungant, nil ke'-paal kaangk ke' thathow thanang kenth-kenthayn thanangan, a' nil wak thanang, ngurp nungantam anangan. “Ke'a! Niiy ke' kenthān thanangweya, puk manyiy inanganiya mak wampayn ngathara! puth nil God.angan kaangk ma' nungantang pi'-pi'ow thanang. Than wee'-wee'anangan ke' puk manyiy yimanangan ngangk minangaman wampayn nungant God.ant-a, an nil min-minakam ngul pi'ow thanang, than ma' nungantang ngul wunayn. ¹⁵ Than puth wee'-wee'anangan ke' puk

manyiy ngangk minangam ke'an wampiythan nungant-a, an nil God.angan min-minakam ke' pi'ow thanang ma' nungantang, ya'a." Jesus.aniy thaw. ¹⁶ Kan-ngulana, nil puk manyiy anangan maay thanang, a' ma' wunp thant a' thaw God.ant, "Nint thath-thathān thanang, min-minam pi'ān thanang, than yipam minaman iiyayna."

Pam Ma'mangkiyan Wamp Nungant Jesus.ant

¹⁷ Nil Jesus putham ngulan woyanang iiy-iyy-a, nil pam umang mo'-mo' nunganta, a' pungkang nyiinant, a' thaw nungant, "Moom-ang, nint mina. Nint kan inan waa'ara: ngay want-wanttak iiyānga, ngayan yipam God.antang aak umpuyaman wunāng e?" ¹⁸ Nil puth Jesus.an thaw nungant, "Nint puth pam min ngeenak waa'angan ngayang e? An nilam thonakam God.ana minaniya, wiy anangan ya'a. ¹⁹ Nint puth wik ngench thayan God.antaman mee'miya: niy pamana ke' mulathāna; niy wanch pam thon alantamana ke' maarich kee'athāna; niy yuk way min meekantamana ke' ma'-kuchathāna; niy pam wanch wiyana wik aak-ya'angan ke' waa'-waa'ān thanang; niy pam wanch anangana ke' mee'-thenchān thananga; a' putha niy kaath piip niyantamana wik ngeeyāna thananga."

²⁰ Nil puth paman thaw nungant Jesus.ant, "Moom-ang, aak anpalman ngay yippak puk manyan iyy-iyyangan-a, ngay wik ngench thayan inangan pi'-pi'ang thananga."

²¹ Nil puth Jesus.angan paman oth thath-thathan, nil कांग्क paththam wun nungant. Nilan puth thaw nunganta, "Nint inan yumpān thampa. Nint iiyāna, a' yuk way min nungkaram ma'mangkaman sellingpungāna, a' wukal thakan thee'ān thant pam wanch wukal ke'anang al-alantana. Anpalana, nint ngayang ngul monkan-wakāna. Ngulana, nil God.an min-minam paththam ngul

iiyow nungkar aak ing kenyana.” ²² Nil pam alangan wik inangan ngeey-a, nil kaa'wal wiy-wiyam weem, a' ngangk way wunanta, nilan puth pam ma'mangkiya.

²³ Ngul anpalaniya, nil Jesus.an weent a' ngurp nungantam anangan thath thanang a' thaw thant, “Than pam wanch ma'mangkiy anangan puth want-wanttak iiy-iiyiythan ma' God.antangan e? An ya' yaaka'a! Puth wukal a' way min anangan kee' nath enchayn thanta!” ²⁴ Than ngurp nungantaman thaa'am ikin wik Jesus.antaman ngeeyin, nil puth Jesus.an wik putham ngul thaw, “Niiyalang, ngurp ngatharam-ang, kan in ngeeyāna, than pam wanch puth want-wanttak ma' God.antangan iiy-iiyayn e? ²⁵ Nil camelan puth needle yuutampang wanttak ngoonchow e? An ya'a! Inan puth yimanangana. Pam wanch ma'mangkiy anangan puth want-wanttak ma' God.antangan iiy-iiyayn e? An ya', an thayan paththam wunow thantana, than woyan min God.antaman ke' nath uwiythan, ya'a.” ²⁶ Thanan wik inan ngeeyin-a, than ngurp nungantam anangan puy-puyam mee'am ikin, a' thanan thaw-thawin thanttakaman, “Nil God.angan wee' kaa'-piichanathow e? Nath pam wanch ya' yaaka'a!”

²⁷ Anpalana, nil Jesus.angan oth thath-thath thanang, a' thaw thant, “Pam wanchangan ke' kaa'-piichanathwiythan thanttakamana, an ya'a. God.ang thonakam ep pam wanchaniy kaa'-piichanathiya, nil pi'an a' thayan paththama, nilan ep ma'-min yumpiy way min thon-thon anangana.” ²⁸ Anpalana, nil Peter.an thaw Jesus.anta, “In ngeeya, ngan kampan nganttam a' aak nganttam wantan a' nintang puth ngul monkan-wak-wakanana.” ²⁹ Nil puth Jesus.an thawa, “Ee'a, a' ngay nungk inan waa'ānga: than pam wanch wiyangan aak thanttam a' kaath piipa, a' kuunch thanttam thakan

wantantan a' puk thanttam a' farm thakan wantantan, thanan yipam wik God.antaman waa'-waa'ayn thant pam wanch wiyantana, than puth kaangk paththam wuntan ngathar. ³⁰ Nil God.an ngangk min paththam ngul iyow thant pam wanch al-alantan. Thanan pam wanch yot thaa'-wantanam ngurp yumpayn thanang ke' kampan thanttam yimanangan ke' yapa, wiila, wunya, nhengka, otham thanttam yimanangana — a' nil God.angan aawuch-a, yuk way min yot-yotam thee'ow thant, a' puth aak fields thampa. Puth aak an-aniyangana, than pam puungk wiy al-alangan way yumpayn thant thama. Puth ngul-ngulana, than pam wanch anangan nungantang God.antang ngul wunayn aak umpuyam.”

³¹ Nil Jesus.angan wik thonangan inan thamp waa' thant, “Than pam wanch wiyangan ngaantam-ngeeyantan than ke' pam wanch pi'-pi'anam yimanangan iyantana, an puth ngulana than pam wanch many ngul iyayn. Than wiyangan pi'an ke'aman ngaantam-ngeeyantan thanttakamana — ngulana, nil God.angan moom pi'-pi'anam yumpow thanang.”

Nil Jesus.angan Putham Waa' Thant Nungamang Nil Uthamowana

³² Anpalaniy-a, Jesusa a' than ngurp nungantam wee'anang woyan wakan iyy-iiyin aak Jerusalem.ak. Nil Jesus.aniya, keenk iyy ngurp nungantam al-alantaman — puth than ngurp nungantam anangan ngangk ikin. Than puth pam wanch anangan kul-kulaman monkan-wak-wakin thanangan-a, winyngang mo'in. Anpalana, nil Jesus.angan ngurp nungantaman pokkap kiikath thanang a' waa'-waa' thant aak way ngulan wampow nungant. Nilan thaw thant, ³³ “In ngeeyiya, ngamp inan yiip ngul iyyāmp aak Jerusalem.aka. Than pam wiy al-alangan mamayn ngayanga, ngay pam inana nil God.angan

kuchanya, a' pam moom priests al-alantam a' putha pam wuut manth-thayan al-alantakan ma'am thee'ayn ngayanga. Thananiya, karpam yalmathwayn a' thawayn ngayan uthamāngana, a' amanama, thanan ngayang Jews ya' al-alantan ma'am thee'ayn ngula. ³⁴ Than pam Jews ya' al-alangan thaa'-thengkathayn ngayanga, thaa' theekang thak makayn ngayanga, a' whipang thak pi-ikayn ngayanga, a' amanamana mulathayn ngayang ngul, puth aak ma'-ko'alamang ngulan wantow-a, ngay mula-mana koyam ngul ekānga, a' anman man-yetham ngul iiy-iiyānga.” Wik inangan nil Jesus.an thaw thant.

Pul James-a, John.angan Wik Thawpul Jesus.antan

³⁵ Anpalaniya Jamesa a' Johna, puk nhengk pam Zebedee alantaman, wamppul nungant Jesus.ant, a' thaw-pul nungant, “Ayyang, Moom-ang, nint nath ee' thawana, nath ya'a.” ³⁶ Nil puth Jesus.an thaw pulanta, “Nip kaangk ngeenak e?” ³⁷ Pulaniy thawpul nunganta, “Aak an-aniyangan nint moom pi'an ngulan iiyān aak ing kenyan-a, nintan nganang ke' wunpin nungkarangan nyiinin ey? Nil thoniya, ma' malang nyiiniya, a' thoniya, ma' thakang ke' nyiiniy nungkarangan ey?” ³⁸ Ngul nil Jesus.an thaw pulant, “Nip ngul ngeenak yimanangan thawani e? nip ngatharangan nyiinow e? ke' moom pi'an yimanangan e? Than puth wiyangan way yumpayn ngathara, a' mulathayn ngayanga. Nip ngul kaangk ey? than way nipar thampayn yumpayn ey?” ³⁹ Pulan puth thawpul nunganta, “Ee'a, ngan kaangk than ngant thamp way yumpayna.” A' nil Jesus.an thaw pulant, “Thanan kan-kanam way yumpayn nipara; a' piikayn nipanga a' kul thak thawayn nipar. ⁴⁰ Puth ngayan ke' mi'ing nil wee'an nyiinow ngatharang ke' moom pi'an yimanangana. Nilam

God.an ngul thawow, nil keenkanaman kan mi' nil wee'an nyiinow ngatharanga.”

⁴¹ Than ngurp nungantam ten al-alangan wikan ngeeyin pulantam James-a, John.angan pul Jesus.antan thawpul-a, thanan-a, man kul wampin pulant. ⁴² Nil puth Jesus.anganiy-a, thanang yotaman karpam ump thanang a' thaw thanta, “Niiy mee'miy thanang moom aak thon-thonangan wuntan ey? Than pam wanch anangan ma' thayang pi'-pi'antan thananga, than thawantan thant work thantan iiyayn. Than ke' pam meek pi'an anman iiyantam. ⁴³ Puth niiyaniya, yimanangan ke' iiyān niyy-niiyantakamana. Niiywey nath kaangk pam pi'-pi'anaman iiyānwey-a, yaa, niyan putha pam wanch wiyan ma'-aath-aathān thanang a' minam pi'ān thanang. ⁴⁴ Niiywey nath kaangk ke' moom yimanangan iiyānwey-a, niyan puth pam wanch wiyan minam paththam pi'-pi'ān thanang. ⁴⁵ Ngay puth pam inan nil God.angan kuchanya, ngayan puth aak iikanakan ukangana ngayan yipam pam wanch anangan minakam pi'-pi'āng thanang. Ngay aak iikanakan ke'am ukangan than pam wanchangan yipam minam pi'-pi'ayn ngayang ke' moom yimanangana, ya'a. Ngay aak iikanakaniya ukangana ngay yipam chaapar ngatharam theetathāng pam wanch yotamant a' kaa'-piichanathāng thanang way thanttam anpalan.”

Nil Jesus.angan Pam Namp Bartimaeus.an Mee' Min Yump Nunang

⁴⁶ Anpalaniy-a, than Jesus wee'anangan aak Jericho.ak wampin. A' ngulan-a, Jesus-a, ngurp nungantam anangan a' pam wanch yot anangan thampa than aakan kan-ngulan wantayn-a, ngul nil pam ko'anchwey woyan wonkang nyiin-nyiin a' thaa' pent-pent mayaka a'

wukalakweya. Namp nungantaniy-a, Bartimaeus, nhengk Timaeus.antaman. ⁴⁷ A' nil wik ngeey Jesus.an woyan wakanan iyy-iyy, pam anman aak Nazareth amanaman. A' nil kan-ngul pech nungant, “Ayyang, Jesus ey! Kampan David.antam ey! Nint ngayang ngangk ke' mamin ey?”

⁴⁸ Pam wanch yot al-alangan wakın nunang, “Ayyang, nint appap nyiina!” Puth nil pamana puy-puyam othamayan ngul pech-pechwey, “Ayyang! Kampan David.antam-ang! Nint ngayang ngangk ke' mamin ey?”

⁴⁹ Nil Jesus.an than a' thaw thant, “Thawān nungant pal wampow ngathara.” Than puth umpin nunang pam ko'anchan, thawin nungant, “Kanweya! Ngangk min wunow nungka! Kan ekāna! Nil thawa nint iyyān nunganta.” ⁵⁰ A' nil pam ko'anch alangana coat nungantaman thapath, a' wur ek, a' iyy nungant Jesus.antan. ⁵¹ Nil Jesus.an thawant, “Nint ngeenaka?” Nil pam ko'anchan thaw Jesus.antan, “Ayyang, Moom-ang, ngay कांगk aak koyam thathāng ngula!”

⁵² A' nil Jesus.an thaw nungant, “Kan iyyāna! nint mee' min ngul iyyāna, nint puth kan-kanam ngaantam-ngeeyan ngayang ngay mee' min koyam ngulan yumpāng nintangana.” Anpalana, pam alangan aak ngul thath, a' nilana Jesus.an monkan-wak-wak nunang woyanangan iyy-iyy.

11

Nil Jesus.ana Ngangk Thayanam Iiy Jerusalem.akan

¹ Than Jesus-a, ngurp nungantam wee'anangan kan-ngul iyy-iyyin. Thananiy-a, aak Jerusalem thinth ngul wampin. A' thanan aak yoyk namp Olives angan wampin ngul. A' aak yoyk wonkang anganiy-a, village kucham thanpul, aak namp al-alantaniya Bethphage-a, a' Bethany. Nil Jesus.angan ngurp nungantam kucham

anangana keenk kuch pulang aak village aakanakan.
² Nilan thaw pulanta, “Nip village aakanakan iiyow. Nip angan wampowan-a, nip donkey many thathow kuuyang kathin nunang, than pam wiyangan ke'am yippakan matin nunang. Nip kuuyan thapathow, a' nip pal kalow nunang ngathara. ³ Nil wee'an thawow nipar, ‘Nip donkey many nanan ngeenak kalanip nunang e?’, nipan thawow nunganta, ‘Nil moom nganttamangan yaan matowana.’ Anpalan-a, nil palaman ngul kuchowan nungkar.”

⁴ Anpalan-a, pulan iiypul a' donkey manyan uwpul woyanang angman than-than, kuuyang kathin nunang aawuch thaa'ang angana. Pul kuuyan yippak thap-thapathpulan-a, ⁵ than pam wanch wiy anangan thinthan than-thaninan-a, thawin pulant, “Nip donkey many nalantaman kuuyan ngeenak thapathanip a?”

⁶ Pulan thawpul thant ke' wik anman nil Jesus.an thaw pulant, a' than pam anangan thawin pulant, “Ee'weya, nip kalowana!” ⁷ Anpalan-a, pul donkey manyan wampath-pul nunang Jesus.antan, a' ngook pulantaman kenyangk wunppul donkey manyantangan, a' nil Jesus.an kan-ngul pey man-mangk donkey many alantangan. ⁸ A' than pam wanch yotamangan ngula ngook thanntaman woyanangan wunp-wunpin. Than wiyanganiya yuk punth pip-pipin a' woyanang wunp-wunpin. ⁹ Nil Jesus.an kangulan iiy-iyy-a, than pam wanch yot thaa'-wantanaman umputh iiy-iyyin nungantanga, a' than pam wanch wiy ananganiya, kul-kulam iiy-iyyin nungant. Thanan wik pech-pechin, “Yeey! Yeey! Ngamp nunang God.an thaa'-kuumpãmpana! Nil puth God.ang pam inan kuchana, nil mak pi'anang yumpow nunanga! ¹⁰ Nil wuut mangk ngamparam anpalan wamp, King David.antama! Nil King David.an aak ingman yippakan wun-wun-a, nil pam wanch anangan ma' nungantangan pi'-pi' thanang, puth

nil pam ilangan yimanangan ma'ang pi'-pi'ow ngampangan! Ngamp God.an thaa'-kuump-kuumpāmp nunanga!”

¹¹ Anpalan-a, nil Jesus.an aak pi'an Jerusalem.ang kangul ngooncha, a' nil aawuch ngench thayanang ngoonch, a' pal-puy thath-thath. Puth aakan kinch-wayang ngul wuna, nilan ke'-paal aak Bethany aakanakan iiy, than ngurp nungantam anangan karpam iiyin nungantangan.

Nil Jesus.ang Yuk May Koman Konch

¹² Aak ngaa' thonang ngulaniy-a, than aak Bethany anpalan palam wampin, nil Jesus.an meeck ngul ween. ¹³ Nil yuk kom kecham thath, yukaniya kangkathiy, a' nilaniy puth iiy yukan thathow nath may thamp, nath ya'a; a' nil yuk aakanakan kanan wamp-a, nil yuk anan kangkam thonakam thath, puth aak yimananganiya yuk alangana may ke' yippak pi'iy. ¹⁴ Anpalaniya, nil Jesus.an yuk kom alantan thaw, “Pam wanchangana may nungkaramana ke'-ngul mungkayna, ya'a!” Than ngurp nungantam al-alangan wik inangan ngeeyin nunang nilan thaw.

Nil Jesus.an Aawuch Ngench Thayanakan Iiy

¹⁵ Anpalaniya, than kan-ngul iiyin aak Jerusalem.akan. Than kan-ngulan wampin-a, nil Jesus.an aawuch ngench thayanak iiy, a' nil thath thanang pam wanch anangan than minh bullocks thak piyy-piiyina a' sellimpung-pungin aawuch ngench thayan angana. A' nilan kenth thanang. Nil table thakan wew thee' thanttam pam al-alantaman wukalan pi'-pi'in, a' putha yuk chairs anangana, um pekam thee' ngul pam al-alantamana minh munkiyang anangana sellimpung-pungin. ¹⁶ A' puth nilan thaw thant pam wanch al-alantan yuk way min may thakan ke' kal-kalayn aawuch ngench thayan wakanana. ¹⁷ Amanamaniya nilan thaa'-aath-aath thanang pam wanch anangan, nil thaw thant, “Than keenkanamana

wik inangan God.antamana lat ngench thayanangan umpin, ‘Than aawuch ngench ngatharaman aak pam wanchantan mee'-wuthanamanakan waa'ayn, than pam wanch yot aak nath-nathan wuntan, angman puth yal-mathwayn thanttakaman mee'-wuthanamak,’ puth niy pam wanch il-ilangan aawuch iikanakan yalmathwuniy yipam wukal way min wiyantaman ma'-kuchathāna.”

¹⁸ Than pam pi'-pi'anam priests a' puth pam teachers anangan wik thayan anangan thaa'-aath-aathinan-a, thanan ngeeyin nunang wik anangan nil Jesus.an thaw-a, thanana kan-ngul ngaantam-ngeeyin thanttakaman Jesus.an mulathayn nunang. Puth thanana winyayang mo'-mo'in nungantam ngeenam putha than pam wanchangan wik nungantam anman kaangk ngeey-ngeeyayn wik min nilan waa'-waa' thant.

¹⁹ Aak ngaa' ngulan wun-a, Jesus-a, a' putha ngurp nungantam anangan, than aak pi'an Jerusalem.ana kan wantin.

Nil Jesus.angan Yuk Komantaman Thaa'-Aath Thanang

²⁰ Ngaa'thiyangam ngulaniy-a, than woyan wakanan iiy-iyyin-a, than yuk anman koman thathin kan-ngul utham, yuk punth-a, a' aakanakam pek tha' kumanakam.

²¹ A' nil Peter.angana erkam ngaantam-ngeey paththam ngeenamana yukan uthama a' thaw ngul Jesus.antan, “Ayyang, Moom-ang, in thath ee! wik nintan thawan yuk ilantana uthamow ngulana, an kan-kanam uthama, yukaniy.”

²²⁻²³ A' nil Jesus.an thaw thant ngul, “Niiy puth kan-kanam ngaantam-ngeeyān God.ana nilana min a' ma'-kunch, niiy ke' man-ngeeyān nunanga. Niiywey God.an kan-kanamwey ngangakang pi'-pi'in nunang-a, yaa, niiy yoyk ilantan thawinwey, ‘Eka! Puy ngakang thee'ān nungkamanga,’ an nil God.angan paththam yumpiya wik

niiy anangan thawana. ²⁴ Yaa, ngay in waa'āng niiyant: niiywey ngeenak nathanweya thawin God.antan-a, niiy kan-kanam ngaantam-ngeeyān nil thee'ow niiyant, a' anpalana, nil paththam thee'ow niiyant. ²⁵ A' niiy mee'an wuthanamān God.antan-a, way anangan kon-ngathow niiyang than wiyangan yump-yumpin niiyant, yaa, nil puth piip ngamparam God.angan-a, ke'-ngul ngaantam-ngeeyow way niiyan yump-yumpana. ²⁶ Niiyang ke'wey kon-ngathow than niiyantān way yump-yumpin-a, yaa, piip ngatharam in kenya ke' kon-ngathow nunang way niiyan yump-yumpan.”

Than Mepin Nunang Jesus.an

²⁷ Than Jesus wee'anangan putham ngul wampin aak Jerusalem.angan. Anpalan-a, nil Jesus.an aawuch ngench thayanangan ngoonch-a, a' pal-puy iyy-iiy, a' than moom priestsantam anangan-a, a' puth than pam teachers anangan wik thayan God.antaman thaa'-aath-aathin thanangan-a, a' puth than pam wuut manth-thayan anangan wampin nungant, ²⁸ a' thawin nungant, “Nungkar ngul wee' thaw work pi'an anangan yump-yumpān thananga? Nintang wee'ang kuch e?”

²⁹⁻³⁰ A' nil Jesus.an thaw thant, “Ngay kan in engkāng niiyanta, a' niiyan ngatha waa'ān, nil wee' thawant pam John alantan pam wanch kootr ngakangan kuungkuungkow thanang e? Nil God thawant ey? Nath pam wanch thawin nungant ey? Niiy nath waa'in ngatharan-a, ngay ngul waa'āng niiyant nil wee'angan kuch ngayan-gan.” ³¹ Thananiya kan-ngul thaw-thawin thanttakamana, “Ngamp ngul wanttak thawāmp e? Ngampwey yimanangan thawimp nunganta, ‘Nil God thaw nungant John.antan-a,’ nil puth Jesus.an thawow ngampar, ‘Ngul niiy John.an wanttak ke'am ngaantam-ngeeyan nunang

wik min God.antaman waa'-waa' niyant an a?' ³² Puth ngampwey thawimp yimanangana, 'Pam wanch thawin nungant John.antan-a,' an ngul wanttaka?" Thanan puth winyngang mo'in pam wanchantam, than pam wanch ma'mangkamangan puth ngaantam-ngeeyin John.an nil pam prophetan iyy-iiy.

³³ A' thanan thawin nungant Jesus.antan, "Ngan mee'miy ya'a." A' nil Jesus.an thaw thant, "Yaa, ngay puthangkana ke' waa'ing niyant nil wee'angan kuch ngayang aak iikanakana, ya'a."

12

Nil Jesus.angan Wik Kath Waa' Thant Nil Pam Thonaman- gan Nhengk-Kunchan Kuch

¹ Anpalana, nil Jesus.angan wik kath waa' thant, nil koochanam ke'am thaw thant, nil wik kath anman waa' thant. A' nil Jesus.an thaw ngul, "Ayyang, niiy wik kath inan ngeeyāna. Nil pam thonam alangana aak pi'an we'ar pi'-pi' nungantakaman, aak may kaampnakan, a' nil may kaangkantam kaanch yot kaamp-kaamp thanang garden nungantamang angana. A' nilana fence ngul yump, a' anpalaniya nil awar pi'an we', may kaangk menchan ngulan weemayn-a, than yipam angan wunpayn thanang a' tha'ang ngulan maak-makayn, may kaman yipam pich-pichathayn. A' amanamaniya nil aawuch achantang ngul kaach than yipam aak thath-thathayn anpal kenyan, than wiyangan ke' yipam may kaangk anangan ma'-kuchathayn.

"Anpalaniya, nilan thaw pam wiyantan aak gardenan thath-thathayn, minam pi'-pi'ayn nungantwey. A' nilan thaw thant, 'May kaangk nanangan kanan menchan weemayn-a, niyaniya yaarkathān thanang niyantakama,

puth puungk wiyiya ngathar pi'āna.' A' nil moom anan-a, kan-ngul iiy aak thonaka. ² Ngul-ngulana, aakan kan-ngul wamp thant may kaangk menchan anangan yalmathayna. Nil moom alangan pam nungantaman kuch nunang, aak garden nungantakamakan, may kaangk anangan uwow nungant. ³ Nil aak angan kanan wamp-a, than pam al-alangan gardenan pi'-pi'in-a, than mamin nunang, a' piik-piikin nunang, a' ma'-thaanch koyaman kuchin nunang. ⁴ Ngul-ngulana nil moom alangan pam nungantam thonangan ngul kuchan, puth than pam al-alanganiy-a, kuchek piik-piikin nunang, a' way paththam yumpin nungant. ⁵ Ngul anpalaniy-a, nil moom alangan pam thonangan ngul kuch nunang, puth than pam al-alangan mulathin nunang. Anpalaniy-a, nil pam wiy anangan kuch thanang, puth thanan way anman yumpin thant yotamant; wiy anangan-a, piik-piikin thanang, a' puth wiy anangan-a, mul-mulathin thanang. ⁶ Nil pam moom alangan pam wee'-nath kuchiy ngula? Nilan pam nungantam yotam anangan kanam kuch thanang, nhengk nungantam thonakaman ke'am yippak kuchan. Nil kaangk paththam wunant, nhengk-kunchantan puth nil thaw, 'Than ngul ngaantam-ngeeyayn puk nhengk ngatharamana, nil puth pam pi'an thama, ke' piikiythan nunang,' a' anpalana, nil kuch nunang. ⁷ Puth than pam al-alangan thathin nunangan wamp-wamp thantana, thanan thawin thanttakamana, 'Ayyang, pam inmana, puk nhengk moomantama! Ngamp mulathāmp nunang, a' ngampan aak garden inan ngamparakam ngul pi'āmpa! ⁸ A' thanan purpam mamin nunang a' mulathin nunang a' piw thee'in nunang yoon aak garden anpalan."

⁹ Nil Jesus.an engk ngul thant pam wanch al-alantan, "Niiy ngul wanttak ngaantam-ngeeyaniy wik kath inaniye? Nil piip-kuchan wanttak nath yumpow

thant pam al-alantana? An nil wampow, a' mulathow thanang, a' nilana pam wiyant ngul thawow aak garden nungantaman pi'ayna.”¹⁰ A' nil Jesus.an thaw ngul thant, “Niiy ngul lat ngench thayan anpalan ke'am wichan ey? wik inangan ey?

‘Than pamang aawuchan kaachantan-a, wiyiya than nath yuk pal pekkuwan aawuchantangan wunpantan-a, an piw thee'antan, puth thanan ngaantam-ngeeyantan ke' yuk waya.

Puth ya'a, yuk pal pekkuwan aawuchantangan an min paththama, aawuchan thayanam yipam thanow.

An puth ke' yimanangan pam wanch wiy al-alangan kaangk ke' ngayang, monkanam iiyantan ngath-aram.

Puth ngayana ke' yuk pal pekkuwan aawuchantangan anman thanan piw thee'ina.

¹¹ Puth ngul-ngulana nil God.angan pam wuut pi'an paththam yumpow ngayang!

Ina min paththam wunowa!’ ”

¹² Nil Jesus.angan wik kath inangan waa'-waa' thant-a, than pam pi'an Jews al-alangana ke' mamiythan nunang, puth than mee'miy nil thanangan waa'-waa', than pench ekin wik kath anpalan. Puth thanan winyinyang mo'in pam wanch yot al-alantaman, than wiy wantin nunang a' puyam iiyin.

Thananiya Jesus.an Putham Mepin Nunang

¹³ Than pam Pharisees al-alangan a' puth pam Herod.antam al-alangan karpam ngul wik yump-yumpin, a' thawin, “Ngamp putham mepāmp nunanga, yaan paathāmp nunang nil nath Jesus.an wik want-wanttakan thawow ngampar.” Thananiya pam thanttam wiy anangan kuchin nungant. ¹⁴ Than iiyin nungant Jesus.antana, a' thawin, “Ayyang, moom-ang, ngan kan

mee'miy nint wik kan-kanam anangan thaw-thawangana, puth woyan min God.antaman kan-kanam thaa'-aath-aathangan nganang. Nungkway than pam wanch wiyangan ngangk-wayangaman kal-kalantan nintang-a, puth nintana ke'am ngaantam-ngeeyangan, kon uth anman iyy-iiyangan. Puth nint pam pi'an al-alantaman ke'am winyngan mo'angan ya'a, nint ke'-ngoongkam wik kan-kanam anman waa'-waa'angan pam wanchantan. Yaa, nint puth wik waa'ān nganta nint wanttakan ngaantam-ngeeyangana. An ngul kan-kanam ey? ngan ngul wukal thee'in ey? ke' income tax yimanangan ey? pam moom pi'an alantan ey? aak Rome.angan wunan ey? nath ya'a, ke' thee'in nungant.”¹⁵ A' nil puth Jesus.angan kanam thiich thanang pam anangan than pam min ya'a, than yaan paath-paathin nunang, nil puth thaw thant, “Niiy ngul ngeenak thaachaniy ngayanga? ngay yipam way-wayak thawāng niiyant ey? An ya'a! Niiy wukal thonam pal kalānar, ngay kan thathānga!”¹⁶ Thanan wukal anana wampathin nungant, a' nil puth Jesus.an thaw thant, “Wukal ilangan kaa'wal wee'antam pi'an a? puth namp thamp wee'antam wukal ilantangan wun a?” Puth than pam anangan thawin nungant Jesus.antan, “Pam moom pi'an alantaman aak Rome.angan wunana.”¹⁷ Yaa, nil Jesus.an thaw thant, “Than wukal tax aakanakan thawayn niiyantana-a, pam pi'-pi'anam anangan-a, niiy wukal wiyana koyam thee'ān thantanweya. Puth nil God.angan ngampangan yumpa, ngampana ngangk ngamparamana koyaman thee'āmp nunganta.” Than wik inangan ngeeyinan-a, than thaa'am ikin ngul Jesus.antan.

¹⁸ Anpalan-a, pam puungkwiy Sadducees anangan wampin nungant. Than Sadducees il-ilangana, than ngaantam-ngeeyin pam wanch mulan wuntan-a, ke'

koyaman ke' ekiythan. Than thawin nungant Jesus.antan, ¹⁹ “Ayyang, Moom-ang, pam Moses.ang keenkanamana wik yimanangan ump, ‘Nil pamwey puk ke'anangan uthamiw-a, yaa, nil pont nungantam alangan wanch wukalongkan maayow nunanga, pul yipam puk uwow-pula, thanan yipam ngaantam-ngeeyayna puk anangana ke' pam mul alantamana.’ ²⁰ Puth nint kan wik kath inan ngeeyāna: aak keenkanamana, than ma'-kuuncham pam seven wunina. Wuny thanttamangan ka'atham wanch maay — ngul-ngulaniya, nil puk ke'anang utham ngul. ²¹ Pam kuunch nungantam thon alangan ngul maay nunang wanch wukalongkana, a' nil tham ngul puk ke'anang utham. A' pam kuunch nungantam thon alangan ngul maay nunang wanch wukalongkana, a' nil yinang puk ke'anang tham utham. ²² Pam kuunch nungantam ma'mangkam al-alangan maay-maayin nunang, wanch wukalongkana, a' than ma'mangkamana puk ke'anang anman uth-uthamin. Ngul-ngulaniya, wanch wukalongk anman utham. ²³ Kan in ngeeyiya! Aak ngulan wampowan-a, than pam wanch mulaman koyaman ngulan ekayn-a, man-yetham koyaman iiyayn-a, nil wanch wukalongkana wanch thum pam wee'antam ngul iiyowa? Puth nil wanch alangana pam ma'-kuuncham seven anangaman maay thananga!”

²⁴ A' nil Jesus.an thaw ngul thant, “Niiy wik way-way thawaniya! An puth niiy ke'am wik min God.antum anangana min-minam ngaantam-ngeeyaniya, wik lat ngench thayanangana a' putha niiy min-minam ke'am thiichaniy nil piip God.an pam wuut pi'an paththamana! ²⁵ Than pam wanch yotamana mulaman ekayn-a, a' man-yetham koyam ngulan iiy-iiyayn-a, an thananiya ke' ngaantiy-ongk anman iiy-iiyayn ing kenya, ke'-ngul ngentwayn, ya'a. ²⁶ Niiyiy wik anman thaw-thawaniy than pam

wanch mulaman ke' yaaka' ekayna. Niiy ngul wik kath Moses alantaman kanam ngeeyan ey? lat ngench thayan anpalan ey? nilan thum nganthen thath yuk waakamangan, puth yukana ke'am pench-pencha. Nil puth God.an wik inangan Moses.antan thaw, 'Ngayiia God inman, thanttam pam Abraham-a, puth Isaac-a, a' Jacob wee'anang al-alantamana.' ²⁷ Nil God.ana God thanttam pam wanch man-yethaman iyy-iiyantana, pam wanch mul al-alantaman ya'a. Niiy wik way-way thawaniya!"

Wik Thayan Kucham Inangan Min Paththam

²⁸ Nil pam thonamaniy-a, angman than-than than-tang, ngeey-ngeey thanang wikan thaw-thawin. Nil pam ilangan-a, pam wanchan thaa'-aath-aath thanang wik ngench thayanan. Nil ngeey nunang Jesus.an wik minan thaw thant Sadducees al-alantan, nil puth iyy nungant a' thawant, "Ayyang, lat ngench thayanangan-a, wik thayan God.antaman yot ngampar ngeeyanakana! Nint ke' mi'in wik thayan thonam min paththaman ey?" ²⁹ Nil puth Jesus.an thaw nungant, "Wik inangan kan-kanam min paththam niiyant ngeeyanakan. 'Niiyala, niiy pam wanch aak Israel.angan wunaniya, kan in ngeeyāna: nil piip God ngamparaman-a, nilam thonam anman moom pi'an ngamparama, wiy ya'a, nilam thonakama. ³⁰ Niiy ngangk minangam anman iyy-iiyān nungant, koochanam iiyān, man-kuchaman ya'a, a' wik nungantaman ngangkangam pi'-pi'ān, wik ma'mangkam anangan ngeeyāna.' ³¹ A' thon inan ngeeyāna: 'Niiy paththam kaangk wunān pam wanch puk wiyantana. Ke' niiyan min-minam pi'-pi'wuniy niiyantakaman-a, yaa, niiyiya yimanangan pam wanch wiy al-alantan ngangk minangam iyy-iiyān thant.' Wik thayan kucham inangan karp wunanpul, an min-minam paththama!"

³² Nil pam alangan wik Jesus.antaman ngeey-ngeey-a, a' thawant Jesus.antan, "Ayyang, Moom-ang, nint minam thawana. Nint kan-kanam thawana nil Lord ngamparaman God thonam anman, nilam thonakaman, wiy ya'a; ³³ a' ngamp kan-kanam ngangk minangam anman iyy-iiyāmp nunganta, koochanam iyyāmpa, man-kuchaman ya'a, a' ngamp wik nungantaman ngangkangama pi'-pi'āmp wik ma'mangkam anangan ngeeyāmpa! A' ngamp pam wanch wiy al-alantan kan-kanam kaangk wunāmp thant, a' minam pi'-pi'āmp thanang ke' ngamp ngamparakaman pi'-pi'wunamp. Wik kucham inangan kan-kanam min paththam ngampar ngeeyanakan. Ngamp nath minh thonakaman kalimp nungant God alantan-a, altarangan wunpimp nungant-a, puth ke'wey wik nungantam inangan ngeeyimpwey-a, an way ngampar."

³⁴ Nil Jesus.angan ngeey nunang wik minan thaw-a, nil puth thaw nungant, "Nint wanttaka? Nint kan ngathar ngangk thee'ān ey? Nint God.antan thinth-thinth kangul wamp-wampangan, nil yipam ma' nungantang pi'ow nintang." Anpalman ngulan-a, thananiya winyngang ngul mo'-mo'in nungantam Jesus.antamana, thananiya ke'-ngul wikak thakan engkin nungant, ya' anman.

Nil Jesus.anganiya Wik David.antaman Waa'

³⁵ Anpalaniy-a, nil Jesus.angan pam wanch thaa'-aath-aath thanang aawuch ngench thayanangan. Nil thaw thant, "Than pam anangan wik ngench thayan thaa'-aath-aathantan-a, thananiy thawantana nil David.ana wuut mangk nungantamaniya, pam alantaman nil God.angan kaa'ngak kuchowan ngampar. Than ngeenam yimanangan thawantana? ³⁶ Nil puth Ngeen-Wiy Min God.antaman thaw nungant David.ant wik inangan waa'owa:

'Nil Lord God.ana moom ngatharamant thawa:

Nintaniya moom pi'an ngatharang iyy-iiyāna;
a' ngay ngul maalathāng thanang than nintangan
ngangk-wayangaman kal-kalayn.

Nintaniya moom karangk paththam iyy-iiyān thantana.'

³⁷ Wik iniya David.angan waa'. Niliya Christ.ana moom
nungantam waa' nunang. Puth nil David.ana wanttak
Christ.antaman wuut mangk weem a!" Nil Jesus.angan
yimanangan mep thanang.

*Nil Jesus.angan Wuut Manth-Thayan Anangan Waa'
Thanang Than Min Ya'a*

Anpalan-a, pam wanch yotangan ngangk minangam
ngeeyin nunang, Jesus.an. ³⁸ Nil thaa'-aath-aath thanang,
a' thaw thant, "Niiy kan thathān thanang, pam wuut
manth-thayan anangana, than min ya'a! Thanan ke'
mEEK yimanangan kaangk iyy-iiyayn. Than kaangk ngook onk
ngoonch-ngoongchayn, than wiyangan yipam thathayn
thanang, a' thanan kaangka pam wanch anangan umang
iiyayn thant aak town wakanana. ³⁹ A' putha, than aak
churchakan iiyayn-a, thanan kaangk umputh nyiinayna,
thanan yipmam pam wanchangan thathayn thanang,
a' putha than may party.akan iiyayn-a, thanan kaangk
aak min-minangam nyiinayna. ⁴⁰ Than yuk way min
wukalongk al-alantaman maayantan thak, puth-a, than
aawuch thanttamangana than ngul ngoonchantan, ke'
aawuch thanttam yimanangan ngula, a' thanana yaam
anman mee'-wuthanamantan pam wanchangan yipam
ngeeyayn thanang. Nil God.angan kan-kanam paththam
wayathow thananga! ke' wiy ya'a!"

*Inan Wik Kath Wanch Wukalongkantam Wukalan Thee'
God.antan*

⁴¹ Anpalan-a, nil Jesus.an aak churchangan nyiin-nyiin,
nil yuk ik wukalak thinth angan nyiin-nyiin, thath-thath

thanang wukal God.antan wunp-wunpin, pam wanch yotangan. Pam wiyaniy-a, ma'mangkiy, than ep wukal pi'an wunp-wunpin mee' yotantang. ⁴² Anpalana, nil wanch wukalongk anan ngoonch, wanch inaniya, nil wukal ke'angwey, a' nilan wukal manyiy kucham ke' two cents yimanangan ikangan wunp. ⁴³ Anpalana, nil Jesus.angan ngurp nungantam anangan ump thanang a' thaw thant, “Niiy kan thathan thanang ey? Than wiyangan ep wukal pi'-pi'anam ikangan wunp-wunpin aa! Nungkway nil wanch wukalongk ilangan wukal many wunp ikangan-a, an min mee' God.antangana, an nil God.angan ke' wukal pi'an thath-thathan mee' nungantangana. ⁴⁴ Than puth wiy ananganiya min ya'a, puth nungkway than wukal pi'anan wunp-wunpin-a, an min ya' mee' God.antangan, puth thanan ke' wukal many thee'in, thanan puth wukal tha'iy thanttakam pi'-pi'antan, ma'mangkiy iiy-iiyantana. Puth nil wanch wukalongk alanganiiy-a, wukal nungantam ma'mangkam wunp ikangan, wukal anan nil ke' may piyanakan pi'-pi'wey-a, anan wunp.” Wik inan nil Jesus.angan waa'.

13

Nil Jesus.angan Wik Inan Waa' Thant Aak Way Paththam Ngulan Wampow

¹ Anpalaniy-a, nil Jesus.angan aawuch ngench thayan kanan want-a, ngurp nungantam thonam anan thaw nungant, “Ayyang, moom-ang, an thath a! Aawuch ngench thayanan min-minam paththam a! a' wuut pi'an thampa! Puth kunttow anangana achantanga, pi'an thampa!” ² Nil puth Jesus.an thaw nungant, “Ee'a, nint aawuch pi'-pi'anam inangan thath-thathangan ey? Aak

ngul-ngulana than pamangan aawuch min-minam anangana ngul wayathayn, a' puth kunttow wuut pi'-pi'anam anangana aakang ngul keek-keekathayn.”

³ Ngul-ngulana than Jesus wee'anangana kaawam ngul iyyin aak achantangak aak namp alantaniya yoyk Olives, a' angman nyiinin um aawuch ngench thayan aakanakan. Peter-a, James-a, John-a, putha Andrew than wampin nungant Jesus.antan a' thanama pokkang pang thawin nungant, ⁴ “Ayyang, than ngul aawuch ngench thayanan aak ngeen ngul keekathayn a? Nil puth God.angan ngeen meenathow ngant aakan kankanangan wampowa?” ⁵ Nil puth Jesus.an thaw thant, “Niiy mee' yanth-yanth ngul iyyān a! Than pam wanch wiyangan ke' muukamathayn niiyang a! ⁶ Than yot thon-thonam ngul wamp-wampayna, thananiya yaan wik uuy-uuyamayn, muukamayn than ke' ngay yimanangana, waa'-waa'ayn thanttakama, yimanangan thawayn, 'Ngay Jesus Christa, God.angan kuchanya,' puth ya'a. Pam wanch wiyanganiya ep wik ngeeyayn thanang. Puth wiyanganiya ya'a, wik ke' ngeeyiythan thanang ya'a. ⁷ Niiy wik wolmp ngul ngeeyān kul karkanakan pekwayn niiyantang thinth, a' niiyiya wik thoo' ngul ngeeyān aak nath-nathan pekwayn. Puth niiyana ke' winyayang mo'āna. Nungkway than nath kul pi'anapan pek-pekwythan-a, aakan ke' yippak minchowa. ⁸ Than moom pi'an a' pam thanttam aak thon-thonaman anman pek-pekwayn; than pam wiy anangan thaa'nganth thon al-alantan ngul iyyayn a' than pekwayn. A' aakan thamp nath-nathan wunyathow, earthquake.anga. A' putha aak puungk wiyangana may ke'anang wunayn. An puth wayan chil-chil yippaka, puth ngul-ngulana ep way pi'an paththam wampow. Aak inana aak yimanangan wunow ke' wanchang pukan uwow yimanangana. Ka'athamana

nila many-many uwana iimpan pek-pekanan nunang, amanamana pi'anang ngul uwan nunang pukan kalow. Aakana yimanangan wunow.”

⁹ Nil puth Jesus.angana wik thayanath thanang, nilan thaw ngurp nungantam al-alantan, “Niiy mee' yanth-yanth iiyān puth thanana mamayn niiyanga a' courtak kalayn niiyang. Thananiya piikayn niiyang churches Jews.antam angana; a' putha than thanathayn niiyang umang pam pi'-pi'anam al-alantangan, puth niiy ngayang monkan-wak-wakaniya anpalana. Than maka puth niiyaniy-a, wik min ngatharaman anman waa'-waa'an thanta. ¹⁰ Pam wanch ngatharamangana wik min ngatharamana waa'-waa'ayn pam wanch yotantan aak nath-nathan wuntan, yaa, anpalaniya aak inan kangul minchow. ¹¹ Than mamayn niiyang-a, a' umang thanathayn niiyang courtangan-a, niiyaniya ke' kuchek wayamāna, niiy ke' ngaantam-ngeeyāna niiy wanttakan thawāna, ya'a. Nil piip God.angan ngul meenathow niiyant niiy wik ngeenan thawān thant. Niiy ke' wik kuchek waap niiyantam anpalaan thawān ya'a; nil Ngeen-Wiy God.antam alangana ngul meenathow niiyant, niiy wik ngeen nathan thawān thant. ¹² Aak an-aniyangan-a, pam wiy al-alangan-a, pam kuunch thanttam anangan ma'am thee'ayn thananga pam wiyangan mulathayn thanang; putha piipiy wiyanganiya ma'am thee'ayn puk thanttam anangan wiyangan mulathayn thanang; a' puk nhengk wiy al-alangana kaath piip thanttam ngangk-wayangam kalayn thanang a' ma'am thee'ayn thanang wiyangan yipam mulathayn thanang. ¹³ Pam wanch yotangan ngangk-wayangam kal-kalayn niiyang, puth anpalaan niiy ngayangan monkan-wak-wakaniya. Nil wee'anganweya murkanam anman monkanan-wak-wakow ngayang anman-a, ke'an eenchow-a, nilaniya

ngangk aak umpuyangam wunow piip God.antangan.

Pam Way-Wayam Paththam Wampow

¹⁴ “In ngeeyiya! Ngulan-a, pam thonamana, way-wayam paththam wampow, aakan wakow. Nil yuk way thanathow aak ngenchangana. Niiy min-minam ngaantam-ngeey-ngeeyān wik anangan ngayan waa'-waa'angan niiyant. Aak way inan wampowan-a, niiy aak Judea punchan nanangan-a, nath mo'ān aak yoykaka. ¹⁵ Niiywey aawuch yoonan nyiin-nyininwey-a, niiyan putha koyamana pek ke' ngoonchān aawuch niiyantamangan, way minan ke' maayān thanang — an niiyana puy-puyam ngeetān paththam yoykakana. ¹⁶ Niiy nathwey aak kangkangan wuninwey-a, niiy aawuchangana koyam ke' ngoonchān yipam way min niiyantaman maayāna, an ya'a. ¹⁷ Aak inan ngulan wampow-a, an aak way wun-wunow thant wanch iimpanang al-alantana a' putha wanch pul-many al-alantan ma' puk manyangana. ¹⁸ Niiy mee'-wuthanamān piip God.anta aak inana aak kaapan ke' yipam wampowa, ¹⁹ an puth aak way-wayam paththam wampowa. Aak keenkanam nathpalman nil God.angan aak inan yump-a, a' aak in-inman ngula, aak ka'athaman yimanang ke'am wamp way-wayam paththaman. Ngul-ngulaniy-a, aak wayan kan-ngulan minchow-a, aak wayan chil-chil ngul wampow. ²⁰ Aak wayan wampow-a, an yaamana ke' wunow an erkama ngul minchow a' amanamana nil piip God.angan ke'-ngul wayaniy kuch-kuchow aakan minam ngul wunow. Puth aak yaamwey wayan than-thaniw-a, an puth pam wanch ma'mangkaman uthamiythan. Nil God.angana ngaantam-ngeey pam wanch nungantam anangan nilan mi' thanang, puth anpalana nilan ngaantam-ngeey aak wayan yaam ke' wuniy.”

²¹ A' nil Jesus.an thaw thant, “Than pam wanch nath thawiythan niyant, ‘Niiyalang, pam nilan nanana God.angan kaa'ngakan ngamparan kuchowa!’ Nath thawiythana, ‘Ayyang, nil anana!’ — puth niyana ke' wik ngeeyān thanttaman. ²² Puth pam wiy anangana wampayn a' waa'ayn thanttakaman than ke' pam anan nil God.angan kuchan, wiyangiya ke' pam prophets anangan waa'ayn thanttakam, puth ya'a, than yaan muukamathayn niyang. Thanan work pi'-pi'anaman ngul yumpayn thanan yipam yaan muukamathayn pam wanch God.antam anangan. ²³ Niiy mee' yanth-yanth iyyān thanttama. Ngay inan keenk-keenk wik thay-thayanathang niyang.”

Nil Jesus.angan Wik Inan Waa' Nungamang Nil Palam Ngulan Wampow

²⁴ “Ngul-ngulana aak wayan ke'-ngul than-thanow, an ya'-ngul, anpalana, kinchana ngotan ngul wunow, a' putha kepana ke'-ngul park-parkow aak ngutangana, an ya'-ngul, ²⁵ thunp anangana keekayn ngul aak anpal keny, a' kinch-a, kep-a, a' putha thunp anangan pal-puyan wunayn. ²⁶ A' than pam wanchangana ngul thathayn ngayang pal uk-ukāng yuwangana, ngay pam inman God.angan kuchanya. Ngay pam pi'an a' karangk ukānga, min-minam paththama! ²⁷ Ngayana ngaantiy-ongk ngatharam anangan ngul kuchāng thanang nath-nathan iiyayn, kungkam-a, yiipam-a, kaawam-a, kuuwam iiyayn, a' thananiya pam wanch God.antam anangan yalmathayn thanang nilan mi' thanang, aak thon-thon nath-nathpalan yalmathayn thanang pam wanch anangan.”

Nil Jesus.angan Yuk Komantaman Thaa'-Aath Thanang

²⁸ A' nil Jesus.angana wik kath ngul waa' thant. Nilan thaw, “Niiy ngaantam-ngeeyāna yuk kom anangan.

Yiikanan pentantan kangk nyiinganaman-a, yaa, niy mee'miy aak kayamanana kan-kanang wampan. ²⁹ A' niy kinch ngulan thathān ngaa'an wunow-a, putha thunp anangan keekayn thakan-a, yaa, niyana mee'miy weenān aakan thinth ngul wampan ngathar ngay palaman wampānga. ³⁰ A' niy inan thamp ngaantam-ngeeyāna: aak anan wampowan-a, puungk wiy inanganiy niya man-yetham yippak iyy-iiyānweya. ³¹ Ngul-ngulana aak inana putha aak in kenyan minchow ngula. Puth wik ngatharamana ke' minchow ya'a, an anman wunow aak umpuyangam.

³² “Pam wanch yotama mee'miy ya'a, aakan ngeen nathan wampow ngay palaman wampāng. Ngaantiy-ongk aak in kenyan wuntan-a, than thamp mee'miy ya'a, aak ngeen nathana wampow, ngay thama mee'miy ya'a. Nilam anman thonakam epa piip God.an mee'miya. ³³ Yaa, niyaniya minam anman woyan God.antaman wak-wakāna, mel ke' enchān woyan min anpalana, ya'a. Puth niyaniya mee'miy ya'a aak ngeen nathan wampow nilam thonakam piip God.an epa mee'miy. ³⁴⁻³⁶ In ke' yimanangan wunowa. Nil pam pi'anān kan-ngul mo'ow tripaka. A' nil pam nungantam al-alantan thawan thant, 'Ayyang, niyalang, niy aawucha, way min anangana min-minam pi'-pi'āna ngathara. Ngay work thakan ma' niyantang wantānga.' A' nil moom alangana pam thon-thonantana work pok-pokkapang thee'an thant, a' nil pam alantan thawan thaa'an pi'-pi'an aawuchakana, 'Nint aawuch inan min-min thath-thathāna, — puth ngathara thamp aak thath-thathān ngay palam ngulan wampānga.' Nil pam moomana kinch-wayang nath palam wampowa, ya'amiya, ngaa'-menhang nath wampowa, ya'amiya, aak paanthanang nath wampow, aak paanthanang ya'weya, kinch kanaman penta, an-aniyangan nath wampow.

Than pam nungantam anangan than mee'miy ya'a moom thanntaman aak ngeen nathan palaman wampowa, puth nilan thaw, 'Niiy aak thath-thathān ngathara.' An puth ke' ngay yimanangan wampāng niiyant. Ngay wampāngan-a, an puth ngay ngul ma'-pil-wayathang ni-iyang, ngay nath weepang uwāng niiyang. Puth ngay yimanangan ke' uwāng niiyang a! An puth way wuniy niiyanta. Yaa, niiy wik kan ngeeyan ey? Niiy mee'miy ya'a ngay aak ngeen nath palaman wampāng, puth ngay inan thawang niiyant niiyaniya min-minam iiy-iiyāna, a' woyan ngatharam anman wak-wakāna. ³⁷ Ngay niiyant thawangan a' puth than yotamant tham thawangan: niiy aak thath-thathān ngathar.”

14

Than Wik Yumpin Jesus.an Mulathayn Nunang

¹ Aak thinth kan wampan may pi'an yumpanakan. Kinch kuchamang kanan wantow-a, aak anan-a, may pi'anan mungkeyn Passover.an waa'antan, thanan may bread pamp anman mungk-mungkeyn, soda ke'ang. Than pam pi'an priests anangan a' puth-a, pam anangan wik thayanan thaa'an-aath-aathin-a, than wik thawin thanntakaman than want-wanttakan Jesus.an thenchanam mamayn nunang, a' mulathayn nunang thamp. ² Puth thanan thawina, “Ngamp ke' mamimp nunang yippak may pi'anan mungk-mungkanampa, ya'a, puth than pam wanch yot anangan ngul kul yumpin ngampar nungantam peeyanang, a' puth wik thaa' pech-pechiythana ngampar kul thampana.”

Nil Wanchang Opar Awal Min Yeech Kuchek Jesus.antamangan

³ Anpalaniy-a, nil Jesus.ana aak Bethany angan wamp, aak pam Simon alantamangan, nil pam Simon inmana

nil ka'athamana weech-weechan nunang, penchiyang mak nunang. A' nil Jesus.an nyiin ngul may mungkw. Nil mayan yippak mungk-mungk-a, nil wanch thonam wamp nungant, nga'alangk ma'ang kal-kal opar awal min thampa, puth than pam wanchanganiya oparana wukal pi'anang piy-piiyin. Nil wanch alangana opar awal min paththam anangan kal nungant. A' nil nga'alangk thaa'an tha' a' oparana kuchek Jesus.antang pi'anam yeech. ⁴ Puth than pam wanch wiy al-alangan wanchan thathin nunang-a, a' man kul paththam wamp thant, a' thawin ngul, “Nil ngul oparan ngeenak yeech nungantang e? ⁵ Ngampan sellimpungimp oparana, wukal tha'iy uwimpa, three hundred dollarsaka, a' ngampaniya wukal thant pam wanch wiy al-alantan thee'impa thant wukal ke'anang al-alantana.” A' thanan wanchan wak-wakin nunang.

⁶ Nil puth Jesus.an thaw thant, “Ke' wakān nunangweya! Niiy wantān nunangweya! Nil wanch inana min-minam paththam iyan ngathara. ⁷ Than pam wanch wukal ke'anang anangan-a, murkanam aak ingman wuntan niiyantang, kaangk niiy nathwey ma'-aathān thanang-a, niiy ma'-aathān thanangwey, puth ngay ep yaam ingan ke' wuning niiyantang aak inganiya, ya'a. ⁸ Nil wanch inana min iiy ngathar. Nil opar awal minan yeech kemp ngatharangan-a, an ke' pam mulantangan oparana yeechantana yimanangana. An ke' aak yimanangan wuna, nilaniya oparan ump-umputh yeechana kemp ngatharangana, a' ngul-ngulaniya ngayaniya uthamāng ngul, a' kaampayn ngayangan ngul. ⁹ A' ngay inan waa'āng niiyant thamp: aak want-wantting nathana waa'ayn wik min God.antaman pam wanchantan-a, thananiya wanch inana waa'-waa'ayn nunanga nil inana min iiy ngathara, than yipam pam wanch wiyangan

ngaantam-ngeeyayn nunanga nil minan iiy ngathara.”

Nil Judas.an Thaw Jesus.an Ngul Theetathowan

¹⁰ A' ngurp nungantam thonamana, pam namp nungantaniya, Judas Iscariot, nil iiy pam pi'an priests alalantan a' thaw thant nil Jesus.an theetathowan thant.

¹¹ Ngangk min paththam wun thant wik nungantaman ngeeyin, a' thanan kaa'ngakin nunang Judas.an than wukalan thee'ayn nungant. A' aak amanam ngulana nil Judas.angan ngaantam-ngeey-ngeey, “Ngay Jesus.an want-wanttak theetathāng nunang thantana?”

Nil Jesus.ang May Mungk Ngurp Nungantam Al-Alantang, May Pi'an Passover.an

¹² Aak anan may pi'an mungkanakan kan wamp thant Jews al-alantan, Passover.an waa'antan. Than aak ka'athamaniy-a, minh lambs anangan mulathayn thanang. Anpalana, than mungkayn, a' putha may bread pamp soda ke'anang mungk-mungkayn. Ka'athamaniy-a, than may ke'aman yippak yumpin-a, than ngurp Jesus.antam anangan thawin nungant, “Ngan aak wanttinak iiyān may minha keenk yumpān ngampara?”

¹³ Nil Jesus.angan pam kucham keenk kuch pulang. Nil thaw pulant, “Ayyang, nip inan ngeeyowa. Nip aak Jerusalem.angan ngoonchow a' anpalana nipiya pam uwow nunang ngak kal-kalana juganga. Nipiy-a, monkan-wakow nunanga. ¹⁴ Nil aawuch wanttingan ngoonchow-a, nipaniya karpam ngoonchow nungantangan. A' nipana thawow ngul aawuch-kunch alantan, ‘Ayyang, moom nganttamang wik inan kucha, nint aakan meenathān ngant ngan aak want-wanttingan minh lamban mungkāna puth may bread pamp anangan thamp mungkāna, ngan Jesus-a, a' puth ngurp nganttam wiy al-alangan.’ ¹⁵ Amanamaniya nil pam alangan keny

matathow nipang ngul a' aakana meenathow nipar pi'an we'arana, table-a, puth chairs anangan thama. Nipaniya minh-a, may thakan keenk wunpow thanang table.angan yipam ngaman may mungkāmpa.”

¹⁶ A' pam kuchamana iiypul ngul, aak pi'an Jerusalem.angan ngoonchpul, a' aakana kan-ngul uwpul ke' Jesus anman wik thaw. Yaa, pulana may minh keenk ngul pi'-pi'pul thant. ¹⁷ Aak ngutang ngulan-a, nil Jesus-a, a' ngurp nungantam wiy anangan kan wampin. ¹⁸ Than table.ang nyiinin a' may mungkin. Than mayan yippak mungk-mungkin-a, nil Jesus.an thaw thant, “Ngay niiyant kan-kanam thaw-thawang; nil pam thonam-a, nil yamam nyiin-nyiiinan may mungk-mungkinan ngatharangan-a, nil ngayangan theetathow pam way al-alantan.”

¹⁹ Ngurp nungantam al-alantan-a, ngangk way wun thant, a' than thon-thonaman kan-ngul thaw-thawin nungant, “Ayyang, nint wee' waa'-waa'angan e? Ngay ya' ey?” ²⁰ Nil puth Jesus.an thaw, “Niiy inangan nyiin-nyiiinany-a, nil thonamang theetathow ngayangana. Nil wee'angan may breadan punchathow may kam sauce.angan ngatharanganwey-a, nil pam alangana. ²¹ Ngayaniy-a, pam inman nil God.angan kuch. Ngay ngul uthamāng, lat ngench thayanangan waa'an. Puth nil pam wee'ang theetathow ngayanga pam way al-alantan-a, an aak way-wayam paththam wampow nungant! An min wuniy nungant nil ke'wey aak-ngeeyiy aak inganiy.”

Nil Jesus.angan May Bread A' May Wine Thee'-Thee' Thant

²² Than mayan yippak mungk-mungkin-a, nil Jesus.angana may bread many maay, a' thankyou thaw God.antana, a' pip-pip ngul breadan a' ngurp nungantam al-alantan thee'-thee' ngul thant. Nilan thaw thant, “Niiy may bread inan mamāna a' mungkān ngul, may bread

inana ke' kemp ngatharam yimanangan.”²³ A' anpalaniya nil Jesus.angan cup ngul maay wine thampan, a' nil thankyou thaw God.antan, a' kan-ngul thee'-thee' thant ngurp nungantam al-alantan, a' than yotam al-alangan mungkin.²⁴ Nil Jesus.an thaw thant, “Inana ke' chaapar ngatharam yimanangan uk-ukow niyant, nil God.angan yipam kaa'-piichanathow niyang ke' nilan keenkanaman kaa'ngak niyang.”²⁵ Ngay inan waa'āng niyanta: ngay wine inana ke'-ngul mungkāng, ya'a. Ngul-ngulaniya ngampaniya karpam ngul wunāmp aak piip ngatharamantang God.antangan, a' ngayaniya wine wiy-wiyam ngul mungkāng niyantangana.”

²⁶ Anpalan-a, than aak pathin God.antan, a' kan-ngul iiyin yoyk Olives aakanakan.

Nil Jesus.an Peter.ant Thaw Nil Ngulan Wik Uuyamow Thant Nil Ke' Mee'miy Nunanga, Ya'ana

²⁷ Nil Jesus.an thaw thant, “Ngay inan thawang niyant. Niiy yotaman ngul mo'ān ngatharam a' too wantān ngayang, puth lat ngench thayanang wik inangan thawan, ‘Nil piip God.angan-a, pam moom minh sheepan pi'-pi'ana, anan mulathowan ngula, a' minh sheep yotam nungantam anangan-a, paa we'aramayn.’²⁸ Puth anpalan-a, ngay mulaman kanan ekāng-a, ngay aak Galilee.ak keenk iiyāng. Niiyiya pal ngul iiyān.”²⁹ Nil Peter.an thawant, “Ayyang, ngay ke' wantāng nintangal! Than wiy al-alangan nath ep wantayn nintanga, puth ngay ke' wanting nintang, ya' paththamal!”

³⁰ Nil Jesus.an thaw Peter alantan, “Ngay inan kananam thawang nungk, inman ngutangan-a, nil minh rooster ma'-kucham ke'an yippak pechow-a, nint ma'-ko'alaman-a, wik uuyamān thant nint ngayang ke'an mee'miya.”³¹ Nil Peter.an wik thayanam thawant, “Ya'a,

ngay kan-kanam thaw-thawanga! Nungkway than nath mulathiythan ngayang nungkarangan-a, ngay ke' wik uuyaming thant, ya'a." Than ngurp nungantam wiy anangan wik anman thawin Jesus alantan ke' Peter anman thaw.

Nil Jesus.an Mee'-Wuthanama Aak Gethsemene Angan

³² Nil Jesus-a, a' putha ngurp nungantam anangan than aak-aakanakan iiyin Gethsemene.aka, a' nil Jesus.an thaw thant, "Niiy ing nyiināna, a' kuupān ngathara, ngay kan mee'-wuthanamānga." ³³ A' nil Peter-a, James-a, a' putha John karpam kal thanang wal kecham iiyin. A' Jesus.antan-a, ngangk way-wayam paththam wunanta, ³⁴ a' nilan thaw thant, "Ngayan ngangk way-wayam paththama ngeechanang ke' uth-uthamanak yimangan-gana. Niiy ingman nyiināna a' aak thath-thathāna."

³⁵ A' manyam ngul kech ke'anam iiya, a' aakang ngul wun-wun, mee'-wuth-wuthanama piip nungantamak God.anta wayanang anangana nath ke' yipam wampow nunganta. ³⁶ Nilana wik inangan thaw God.antana, "Piip-ang, piip ngatharam-ang, nintiya wuut pi'an paththam, ma'-kuncha, nintaniya ma'-minangam way min thon-thon anangan yumpangana. Ayyang, piipa, nint ke' wayathin thanang ey? Ke' thawin thant ey? Wayan ke' yumpayn ngatharan ey? Puth ngayan ke' thawing, ya'a, nint kaangk yaaka' kuchān ngayangweya, yaa, puth wayan mak yumpayn ngathara, ngay ke' weeking ngath-arakamana."

³⁷ A' nilana kan-ngul ek, a' koyam ngul iiy ngurp nungantam al-alantan, a' thath thanang weepan wun-wunin. A' nil Peter alantan thaw, "Simon-ang, nint weep wunangan ey? Nint ke' mee'-thayanamin ey? Mee' weep pip-pipan nintang ey? Nint aak ke' manyam thathin ey? hour thonamak ey?" ³⁸ A' nil Jesus.an thaw ngul thant,

“Niiy aak thath-thathāna. Mee'-wuthanamān God.anta, niiy ke' yipmam ngeeyān nunang oony wayana, way ke' yipam yumpān. Niiyan minaman kaangk iiyāna puth thaa'-puyan kan-ngul eenchaniya a' way iiy-iyaniya.”

³⁹ A' nil Jesus.ana putham ngul iiy mee'-wuthanamanak, wik anmanim thaw God.antan, wik nil ka'athaman thaw nunganta. ⁴⁰ A' nil palam ngul wamp thant ngurp nungantam al-alantan a' thath thanang weep thayan wun-wunina; thanana mee'an ya'angam thayanamin, mee' weepang pip-pip thanang. Than wik min-min ke'am ngaantam-ngeeyin wanttakan wik thawayn nungant.

⁴¹ A' nil Jesus.ana putham ngul iiy mee'-wuthanamow piip-kunchantan God.anta. A' nil koyam wamp thant a' nil putham ngul thath thanang weep thayan anman wun-wunin. A' nilan thaw thant, “Niiy inman weep-weenthiy ey? Yaa, an kana! Aakan kan wampana ngathar ngay pam inmana nil God.angan kuchanya! Nil pam way alangan kan-ngul ma'am thee'ow ngayang pam way al-alantana! ⁴² Erkam ekiya, ngamp kan-ngul iiyāmp a! A' thathiya, paman inpala nilan ma'am thee'owanya pam way al-alantana.”

Than Mamin Nunang Jesus.an

⁴³ Nil Jesus.an wikan yippak thaw-thaw-a, nil ngurp nungantam Judas.an wamp. Nilan pam yot anangan karpam kal thanang, than puth pam pi'an al-alangan kuchin thanang, pam pi'an priests al-alangan-a, a' puth pam pi'an wiy al-alangan wik thayanan thaa'-aath-aathin-a, a' puth pam wuut manth-thayan al-alangan. Than pam anangan Judas.antang wampin-a, than nhengk-peempan a' yuk muurkan thak kal-kalin.

⁴⁴ Nil Judas.an pam anman nil Jesus.an theetathowana nil

puth keenkaman kan thaw thant, “Ngay pam thonaman wal piintāng nunanga, an nilamana! Niiy mamān nunang, a' puy kalān nunang, pam thapangumpān al-alangan yipam ma'angam pi'-pi'ayn nunang.”

⁴⁵ Nil Judas.an wamp-a, nil thintham iiy nungant Jesus.ant, a' thawant, “Ayyang, Moom-ang!” A' wal piint nunang. ⁴⁶ Puth anpalan-a, than pam yotangan mamin nunang Jesus.an a' thayanam pi'-pi'in nunang. ⁴⁷ Puth nil pam thonaman angman than-than, nil nhengk-peempan nungantaman erkam paththam wich, a' pam thonaman kon thalokang umpān. Pam ananiy-a, kon munth ngul iiy-iyy, nilwey pam work iiy-iyy pam pi'an alantan, moom priestsantam alantan. ⁴⁸ Ngul nil Jesus.an thaw thant, “Niiy nhengk-peempan a' yuk muurkan thakan kalaniy ngayang yipam mamān ey? Ngay ke' pam way yimanan-gan ey? ⁴⁹ Ngay puth aak ingam wunanam ey! A' ngaa' thon-thonangana aawuch ngench thayanang thaa'-aath-aathangan niiyang ey! puth niiy ke'am maman ngayang ya'a. Puth kana, niiy mak mamān ngayanga, inan yipam meenathow niiyant pam wanchantan than keenkanaman lat ngench thayanangan umpin ngatharamana an kan-kanam paththamwey umpin latangana.”

⁵⁰ Anpalan-a, than ngurp nungantam yotam al-alangan-a, wantin nunang, a' ya' mo'in nungantam.

⁵¹ Pam komp thonamana koy-koyuw iiy-iyy thant-tang pam wanch yotantang. Nil ngook thonamang kath nungamang. Than ke' nunang thampang mamiythan-a, ⁵² puth nilanweya kamp mo'-mo' thanttamana, a' ma'llip mo'a, puth ngook nungantam lopam thuuchantamwey, a' angman wanta.

Than Jesus.an Umang Thanathin Nunang Pam Pi'anantang

⁵³ Than pam al-alangan Jesus.an kalin nunang aawuch pam pi'an alantamakan, moom priestsantam

al-alantamakan. Than pam pi'an priests anangan-a, a' puth pam wuut manth-thayan anangan-a, a' puth than pam pi'-pi'anaman wik thayanan thaa'-aath-aathin-a, aak angman yalmathwin thanttakaman. ⁵⁴ Nil Peter.aniy-a, kecham koy-koyyuw iyy-iiy thanttang, a' nilan aak angan wamp, aak pam pi'anantam angman, puth ke'am ngoonch, yoon angman than-than. Nilana soldiersantang nyiin-nyiin, thumang park-park. ⁵⁵ Than pam pi'an priests anangana puth pam councillors anangana wenk-wenkin pal-puy pam wanchakan than yipam waa'ayn nunang Jesus.ana, nil ke' kan-kanam pam waya, way yot yump-yump mee' thanttangan. Than puth pam pi'-pi'anam al-alangan kaangkweya than pam wanchangan waa'ayn nunang aak courtang angan, than yipam kuchayn nunang mulan wunow. ⁵⁶ Than pam wanch yotangan aak-ya'angan waa'-waa'in nunang, an puth than-thanam wik ngunchina, puth thananiya wik thon-thon kuyam waa'-waa'in nunangana.

⁵⁷ Anpalaniya, pam wiy anangan thanin, a' wik uuyamin, wik inangan thawin, ⁵⁸ "Ngan ngeeyan nunang wik inangan thaw, 'Aawuch ngench thayan God.antaman-a, pamangan kaachin. Ngayaniy-a, ngul wayathāng, a' kinch ko'alamangan kanan wantow-a, ngay aawuch ngench thayan thonangan ngul kaachāng, pamang ke'a-man kaachin, ya'an.'" ⁵⁹ Puth than pam inangan tham-pang karpam ke'am thawin, than wik thon-thon waa'-waa'in nunang.

⁶⁰ A' nil pam moom priest al-alantam thanttam-a, wur ek a' thaw ngul Jesus.antan, "Ayyang, than waa'-waa'antan nintang, nint wanttak wikaniy ngul thawān e?" ⁶¹ Puth nil Jesus.ana popam anman than-than, nil wik koyaman ke'am thaw thant, ya'a. A' pam moom alangan putham ngul mep nunang, "Nint kan waa'ān nganta! Nint

ngul pam inan God.angan keenkaman kaa'ngak ey? kucchowān nintang ey? Pam nhengk nungantaman God min paththam alantaman ey?" ⁶² Nil Jesus.an thaw nungant, "Ee'a, ngay pam inmana. Puth ngay yotamant niyant thawānga; niy ngul thathān ngayang, wuny niyantam inan moom pi'an God.antangan nyiin-nyiināng. A' niy tham ngul thathān ngayang palaman uk-ukāng yuwan-gan aak inpal kenyana." ⁶³ A' nil moom priestsantam alangan ngook nungantaman war ikath, a' nil thaw, "Ngan wik way nungantaman kan ngeeyana. Wiyangan ke' waa'iythan nunang ngamparaniya ya'a! ⁶⁴ Niy nyiingkinan wik kan ngeeyan ey? nil God.an waa'an nungamang ey? Niy wanttak ngaantam-ngeeyaniya?" Than yotaman karpam thawin, "Nilan wik way-wayam paththam thaw, mak mulathayn nunanga."

⁶⁵ Anpalan-a, than wiy al-alangana thaa' theekang makin nunang, a' than mee'an ngook manyang kathin nunang ke' yipam aak thathow a' piikin nunang. Than thawin nungant, "Ayyang, nint kan waa'an nganta wee'angan piik nintanga." A' than pam thapangumpān al-alangan kalin nunang a' piik-piikin nunang.

Nil Peter.an Thaw Thant Nil Ke' Mee'miy Nunang Jesus.an Ya'a

⁶⁶ Nil Peter.an aawuch yoon angman nyiin-nyiin, thaa' thinth. A' nil wanchan wamp, nil workan iiy-iiy pam pi'an alantan, moom priests al-alantamakan. ⁶⁷ Nil thath nunang Peter.an thumangan park-park, a' mee' paththam thath nunang a' thaw nungant, "Nint ngurp nungantam, Jesus.antam ey? pam aak Nazareth anpalan ey?" ⁶⁸ Puth nil Peter.an wik uuyam, a' thawant, "Pam wee'a? Ngay ngoongk-ngoongkam nunang." A' nilan pent ngul, thaa' thinth angman than-thana, a' yaam ke'anama minh roosteran pech-pech. ⁶⁹ A' wanch thon ngulan wamp,

workan iiy-iiy pam pi'an alantana, nilana thath nunang angman than-than a' nilan pam wanch wiyantan thaw, "Ayyang, nil pam inman ngurp Jesus.antamana." ⁷⁰ Puth nil Peter.an putham wik uuyam, "Appang, ngay ngurp nungantam, ya'a," thaw.

A' than pam wanch anangan putham ngul thawin nungant, Peter.antan, "Nint ke' wik uuyamāna. Nint kan-kanam ngurp nungantama, puth nint thamp aak Galilee anpalan wampana." ⁷¹ Nil puth Peter.an thaw, "Ngay kan-kanam thaw-thawang niyant, ngay ke' wik uuyaminga, ya'a. Ngay nath wik uuyamingan-a, nil God.angan mak wayathow ngayang. Ngay pam anan ke' mee'miy nunang ya'a niy anan waa'-waa'aniy nunang."

⁷² Anpalan-a, minh roosteran putham pech-pech, a' konang wamp nungant Peter alantan wik nil Jesus.an thawant, "Ngay inan kan-kanam thawang nungk, inman ngutangan-a, nil minh roosteran ke'an yippak ma'-kuchaman pechow-a, nint ma'-ko'alamana, ngul wik uuyamān thantweya pam wanch wiyantana, nint ngayangan ke' mee'miy ya'a." A' Peter.antan ngangk way paththam wun nungant a' nil peey-peey ngul.

15

Than Jesus.an Kalin Nunang Pilate.ant

¹ Anpalan-a, ngaa' thonan wamp-a, than pam pi'an anangan ngaa'thiyangam yalmathwin, than pam pi'an priests anangan, a' puth than pam wuut manth-thayan anangan, a' puth than pam pi'an anangan wik thayan anangan thaa'-aath-aathin, a' puth than councillors yot anangan. Than wik yumpin thanntakaman. A' than Jesus.an chol many kung-makanang kathin nunang, a' puy kalin nunang, a' ma'am thee'in nunang pam moom pi'an Pilate alantan. ² Nil Pilate.an thaw nungant, "Nint

ina moom king Jews al-alantaman ey?” Nil Jesus.an thawant, “Nint wik nanan thawangan-a, an kan-kanama.”

³ Than pam pi'an priests al-alangana waa'-waa'in nunang Jesus.an ke' nil way yot-yotaman yump-yump.

⁴ A' nil Pilate.an thawant, “Nint koyaman ke' wik thawin thant ey? Nint kan ngeey-ngeeyangan thanang waa'-waa'antanan nintang aa?” ⁵ Puth nil Jesus.an popam than, koyaman ke' wik thaw thant ya'a. Nil Pilate.aniy-a, mee'am ik.

Than Kuchin Nunang Jesus.an Mul Yipam Wunow

⁶ Kaap thon-thonangan-a, may pi'anan kiingkantan Passover.an-a, nil Pilate.angan pam thon-thonam kuch-kuch thant Jews al-alantan aak jailam anpalan — than pam wee'antan kaangk nil kuchowan-a, yaa, nil Pilate.angan pam ananim kuch thant. ⁷ Aak an-aniyangan-a, pam namp Barabbas a' pam wiy thampan aak jailang wunin, than puth pam pi'an Government.an thaampin, kul yumpin thant, a' pam wanch wiy anangan mulathin thanang. ⁸ A' than pam wanch Jews thaa'-wantanaman yalmathwin aak Pilate.antamakan. Thanan thawin Pilate.antan pam thonam kuchow thant jail anpalan. ⁹ Nil puth Pilate.an thaw thant, “Ngay pam inana moom wuut pi'an niyantam Jews al-alantaman kuchāng ey?” ¹⁰ Nil Pilate.angan mee'miy thanang paththam pam pi'an priests anangan puth than mee'-wunin nungantam Jesus.antam thanan ke'-paal ma'am thee'in nunang.

¹¹ Puth than pam pi'an priests al-alangan kul yumpin thant pam wanch yot al-alantan than yipmam thawayn nungant Pilate.ant Barabbas.an kuchow thant. ¹² Nil Pilate.an thaw thant pam wanchant, “Ngul pam inan wanttake? Niiy puth moom pi'an niyantaman waa'aniy

nunanga!” ¹³ Than pech-pechin nungant, “Yuk wu-
 uyanang waanchān nunanga! A' mulathān nunanga!”
¹⁴ Nil puth Pilate.an thaw thant, “Nil way ngeen yumpe?”
 Puth thanan othamayan pechin nungant, “Yuk wu-
 uyanang waanchān nunanga! A' mulathān nunanga!”

¹⁵ Nil Pilate.angan kaangk pam wanch ngangk min
 yumpow thanang, ke'-paal nil Barabbas.an kuch thant
 aak jail anpalan. A' nilan thaw thant soldiers al-alantan
 puy kalayn nunang Jesus.ana, a' piikayn nunang kuuy
 alangan, a' nil thaw thant ngul, “Yaa, niy kalān nunang
 yuk wuuyanakana, nailang mak pungān nunangweya.”

*Than Soldiers Al-Alangan Thaa'-Thengkathin Nunang Je-
 sus.an*

¹⁶ Anpalana, than soldiers al-alangan Jesus.an
 matathin nunang aak aawuch pam pi'an alantamakana
 a' pek ngoonchathin nunang. A' than soldiers al-
 alangan soldiers wiy anangan palam umpin thanang.
¹⁷ Anpalan-a, than soldiers al-alangan yaan yumpin
 nunang ke' moom king yimanangan, than yipam thaa'-
 thengkathayn nunang. Than yuk waakamam yumpin
 nungant ke' yuk crown yimanangan kuchekangan
 ngoonchow a' kuchekangan wunpin nungantang. A'
 than ngook ongk ke' chaapar yimanang ngoonchathin
 nunang. ¹⁸ A' thanana man-aath-aathin nunang, a' puth
 salute.impungin nunang. A' than man-kee'anang thaw-
 thawin nungant, “Ayyang, nint moom pi'an ey? King Jews
 al-alantaman ey? Nint king min paththam aa! Nint man-
 yetham ngul-ngulakam iiy-iiyān ey?” ¹⁹ A' than kuchekan
 piik-piikin nunang yukangan a' thaa' theekang makin
 nunang, a' yaan pungkang thuchin um nungantang.
²⁰ Than kanan thaa'-thengk-thengkathin nunang-a, than
 ngook ke' chaapar yimanangan thapathin nungantam,
 a' ngook nungantaman koyaman ngoonchathin nunang

ngul. A' anpalana, than yoon kan-ngul kalin nunang yipam nailang pungayn nunang yuk wuuyanangan, mulakaman.

Than Jesus.an Waanchin Nunang Yuk Wuuyanangan

²¹ Than kanan iiy-iiyin-a, than pam namp Simon uwin nunang. Nil aak kangkam wamp aak pi'anakan, a' than soldiers al-alangana thaachin nunang yuk wuuyan Jesus.antaman kalow. (Nil Simon.ana aak Cyrene punchan, nilana piip pulantam Alexander a' puth Rufus pulantam.) ²² Than Jesus.ana kan-ngul kalin nunang aak Golgotha aakanakan, wik ngamparamangan waa'anampa, "Aak kuchek kaancha." ²³ Ang-ngulaniya, thanan wine opar myrrh thamp nenchanathin a' thee'in nungant, puth nil Jesus.angan ke'am mungk ya'a. ²⁴⁻²⁵ Anpalana, than nailang pungin nunang yuk wuuyanangan, a' waanchin nunang ngul, mul yipam wunow. Aak ananiyangan-a, nine o'clock ngaa'thiyangan wun. A' than pam soldiers al-alangan ngook nungantam thakan thonthonam aath-aathwin thanttakam, than puth yuk dice kee'-kee'in yipmam wee'angan nath uwowa. ²⁶ Than lat thampan wunpin yuk wuuyanangana, wik inangan umpin, waa'inan nunang: "Nil pam inan moom King Jews.antama." ²⁷ Than pam soldiers al-alangana pam kucham thamp waanchin pulang Jesus.antang mulathayn pulanga, pulan way-wayam iiy-iypul. Nil Jesus.aniy-a, menhang pulantang waanchin nunang.

²⁹ Pam wanch wiy anangan woyan wakanan iiy-iiyin. Thananiy-a, um keny thath-thathin a' kuchek wuny-wunyathin man-aath-aathin nunang Jesus.ana a' wik way-wayak thawin nungant, "Ayyang! Nint ke' aawuch ngench thayan God.antaman wayathin ey? A' kinch ko'alamang kanan wantow-a, ke' koyam ngulan kaachin

ey? Puth ya' ey! ³⁰ Nint kan yuk wuuyan nanpala ukāna, a' nungkarakama kaa'-piichanathāna!”

³¹ Than pam pi'an priests al-alangana a' puth than pam pi'an anangan wik thayanana thaa'an-aath-aathina, than thampang thaa'-thengkathin nunang Jesus.ana. Than thawin thanntakama, “Nil thanang wiy ep kaa'-piichanathan ey? nil puth nungamang thamp kaa'-piichanathow ee! ³² Nil nath pam inman aak keenkan nil God.angan mi'ana, aak iikanakaniy ukow kaa'-piichanathow ngampanga. Nath nilamwey-a, yaa, puth nila yuk wuuyanama anpala ukowa! A' anpala ngamp yipam kan-kanama ngaantama-ngeeyāmp nunanga!”

A' pul pam kuchama anangan-a, karpama waanchin pulang Jesus.antangan-a, pul thampa wik wayanang thak thaw-thawpul Jesus.antana.

Nil Jesus.an Utham Ngul, Ya'-Ngul

³³ Anpalana, kinch kenya ngulana, aak pal-puyama ngaa' paththama wun, ngaa' anama wun three o'clockakama.

³⁴ Three o'clockama wamp-a, nil Jesus.an wik othamayan pech, wik thaa'nganth nungantama thaw, “Eloi, Eloi, lema sabachthani?” Wik ngamparamang yimanangan thawanamp, “God ngatharam-ang! God ngatharam-ang! Nint ngeenaka too wantanga ngayanga?”

³⁵ Pam wanch wiy anangan angama than-thanina, ngeeyin nunanga, a' thawin, “Ayyang! Niiy kan ngeeyān nunanga, nil Elijah alanta pech-pechana!” ³⁶ Nil pam thonama mo'a a' nil ngook manyama may wine pochanga punchath, a' ngook manyama, yuk ongkang kath, a' yuk ongkama kenya maay nunganta, a' thaa'ang wunp Jesus.ang. Nil pama thaw, “Kuupāmpa! Nil Elijah.an ngul nath wampow yipama yuk wuuyama anpala ukathow nunanga. Ngamp ngul nath thathāmpa!”

³⁷ Anpalan-a, nil Jesus.an wik othamayan pech, a' nil utham ngul, ya'-ngul.

³⁸ Aak an-aniyangan-a, ngook kee'an kaachin aawuch ngench thayanangan uk-uk-a, keny anpalan-a, pekakam um-menhang ya' ik. ³⁹ Pam moom soldiers al-alantamana angman than-than, um nungant Jesus.ant, a' nil thath nunang nil want-wanttak uthaman. Nilan thaw, "Nil pam inana nhengk God.antama, an kan-kanama!"

⁴⁰ Wanch wiy anangan angman than-thanin thamp, kecham thathin, Mary Magdalene, a' putha Mary thonon, nilan kaath-kunch James.antama (James komp alantaman), a' Joseph.antama, a' puth Salome, a' wiy anangan thamp. ⁴¹ Nil Jesus.an aak Galilee.angan wunwun-a, thanan monkan-wak-wakin nunang a' ma'-aath-aathin nunang. Wanch wiy anangan aak Jerusalem.akan wampin nungantangan, than thampang angman than-thanin, thath-thathin nunang.

Than Pam Mul Jesus.an Kaampin Nunang

⁴² Aak ngutang ngulan-a, nil pam namp Joseph.an wamp, pam aak Arimathea anpalana. ⁴³ Nilan pam councillor, a' than yotangan min waa'in nunang. Nilana aak min aakanakan kuup-kuup, nil God.angan pam wanch yot anangan ma' nungantang ngulan pi'ow thanang. Aak an-aniyangan-a, Friday.an wun puth aak ngench thayan Jews al-alantamana ngaa' thonang ngulan wampow. (Than Fridays.an ep work iiyin, yipam Saturday.ana work ke'angang nyiinayn.) Nil puth Joseph.ana Pilate.ant wamp nungant, ngangk thayanam, winynyang ke'am mo', a' thawant, "Ngay pam mulan ke' kaling ey?" ⁴⁴ Nil Pilate.angan wik inan ngeey-a, nilana thaa' ik, nil puth Jesus.an kanam utham, erkaman. Nil Pilate.angan pam soldieran ump nunang, a' engk nungant, "Nil Jesus kan-ngul utham

ey?” ⁴⁵ Nil pam soldierangan waa'ant nil Jesus kanaman utham, a' anpalana nil Pilate.an thawant Joseph.ang pam mulan kalowana. ⁴⁶ Nil Joseph.angan ngook ongk min piyy, a' pam mulan ukath nunang yuk wuuyan anpalaan, a' kath nunang ngul ngook min ongk alangan, a' nil aak awarangan pek ngoonchath nunang — aak awar inana, than kunttow thayan anpalaan yumpin. A' nil kunttow wuut pi'anan poo tha' thaa'ang angman yipam wunow, ananiy-a, thaa' kanam ngath pam mul alantan. ⁴⁷ Pul Mary Magdalene putha, Mary thonana nil kaath nun-gantam Joseph.antamana, pulan thathpul aak wanttingan wunpin nunang pam mulana.

16

Nil Jesus Mulam Kanaman Ek

¹ Aak Saturday.an kanan minch-a, than wanch ko'alam anangana, Mary Magdalene-a, putha Mary-a, nilan kaath James.antamana, a' putha Salome, than wanch al-alangan opar awal min anangan kalin, than kempan yipam mamayn nunang Jesus.an opar awal min alangan. ² Aak Sunday ngaa'-ngaa'thiyangaman-a, kinchan kan-ngulan mat-mat-a, than wanch ko'alam anangana kan-ngul iiyin aak awarakan. ³ Than woyan wakan kanan iiy-iiyin-a, thanan thaw-thawin thanttakaman, “Nil wee'anga kunttow pi'anan thaa'aman tha'ow ngampara?” ⁴ (An puth kunttow wuut pi'an anhan thampa.) A' than wampin ngulan-a, a' mee' keny thathin aak awar aakanakan, puth awaran thaa' pa'ant thathin. ⁵ A' thanana aak awarangana pek ngoonchin, a' thathin pam komp nyiin-nyiin malanga. Ngook pach-pacham ngooncha. Puth thananiya ngangk akangam than-thanina, winyinyang mo'in.

⁶ A' nil pam kompan thaw thant, “Niiy ke' winyngang mo'āna. Ngay kan mee'miya niiy Jesus.antan wenk-wenkaniya, pam aak Nazareth anpalana, than nailangan pungin nunang yuk wuuyanangana. Nil in ya'a, nil kanam ek mulamana! In thathiya! Aakan inana pam mul Jesus.an wunpin nunang, in aak ya'-ya'am ngula, —
⁷ yaa, niiy iiyāna a' wik inan waa'ān ngurp nungantam al-alantana, puth Peter.ant, ‘Nil Jesus.ana keenk iiyowa aak Galilee.akana, niiyaniya aak angan thathān nunanga, ke' nilaman thaw niiyanta.’”

⁸ A' thanana aak awar anpalana pol pentin ngul a' koyam kamp ngul mo'-mo'in, puth thanana ngangk akangam than-thanin, winyngang mo'-mo'in. Thananiya ke'am wik waa'in wiyantan ya'a, puth than winyngang mo'ina.

Nil Jesus.an Mary Magdalene Alantan Wamp

⁹ Anpalaan-a, nil Jesus.an mulaman kanaman ek-a, Sunday ngaa'thiyangaman-a, nilan Mary Magdalene.ant ka'athangam wamp. Wanch ilantaman-a, nil Jesus.angan keenkan oony way seven anangan kenth thanang ngangk nungantam anpalaan. ¹⁰ Nil Mary.an-a, iiy a' ngurp nungantam al-alantan waa' nil Jesus.an kanaman ek. Nil Mary wampan thant-a, nil uw thanang ngangk way paththam nyiin-nyiin a' peey-peeyin. ¹¹ Than ngeeyin nunang waa' thant nil Jesus.an mulaman ek, a' puth nil Mary.angan-a, kan thath nunang, puth thanan ke'-ngoongkam nyiin, wik nungantamana ke'am min-minan ngaantam-ngeeyina!

Anpalana, Nil Jesus.an Pam Kuchamant Wamp

¹² Anpalaan-a, nil Jesus.an ngurp nungantam kucham al-alantan wamp pulant. Pul aak kangkakan iiy-iypulana, a' nil Jesus.an wamp pulant, puth ka'athangamana pul

ke'am thiichpul nunang, puth ngulan ep thichpul nunang.
¹³ Pul koyaman iypul ngurp Jesus.antam wiy al-alantan a'
 waa'pul thant puth thanan wik pulantam min-min ke'am
 ngaantam-ngeeyina, man-ngeeyin pulanga.

*Nil Jesus.ana Ngurp Nungantam Eleven Al-Alantan Wamp
 Thant*

¹⁴ Ngul-ngulana, nil Jesus.an wamp thant ngurp nun-
 gantam eleven al-alantan mayan mungk-mungkin. Nil
 wak-wak thanang, than puth minam ke'am ngaantam-
 ngeeyin nunang, a' puth than kuchek thayan iyy-iiyin,
 kan-kanam ke'am wik ngeeyin thanttam than wik nunan-
 gan waa'-waa'in nil koyam kan-ngulan man-yetham
 ween. ¹⁵ Nil thaw thant, "Ngay inan thawang niyanta.
 Niiy aak nath-nathan iyy-iiyān pam wanchantan, wik
 min ngatharamana waa'-waa'ān thant. ¹⁶ Than wee'-
 wee'anangan ngangkangan pi'-pi'ayn ngayangan-a, a'
 putha than wiy al-alangan kuchekan kuungkayn thanang
 ngakangan-a, ngay kaa'-piichanathāng thanang way
 thanttam anpalan. Puth than wee'-wee'anangan ngayang
 ngangkangan ke'an pi'-pi'ayn-a, an ngay wayathāng
 thanang. ¹⁷ Than wee'-wee'anangan ngangkang pi'-
 pi'ayn ngayangan-a, an ngay ma'-kunch ngul yumpāng
 thanang work pi'an yipam meenathayn pam wanchanta,
 a' puth ngay thayan paththam yumpāng thanang than
 yipam oony way anangan kenthayn thanang ngangk
 pam wanchantam anpalan, a' puth than thaa'nganth
 wik wiy-wiyam Ngeen-Wiy Min God.antaman thawayn.
¹⁸ Than nath thuuk maaiythanwey-a, nath yuk opar way
 mungkiythanwey-a, an than ke' uthamiythan ya'a, kemp
 min anman iiyayn; a' puth than ma' wunpiythan thant-
 tang pam wanch weechanan thanang-a, an thananiy-a,
 miyal ngul weeniythan paththama."

Nil God.angan Jesus.an Keny Matath

¹⁹ Nil Lord Jesus.an wik kanan thaw thant-a, nil God.angan keny matath nunang a' nyiinath nunang ma' mal nungantang angan. ²⁰ Anpalaniy-a, ngurp nungantam anangan-a, aak nath-nathan iiyin, a' wik Christ.antam waa'-waa'in thant pam wanch yot alalantan. Nil Lord.angan ngangk thayanath thanang a' ma'-kunch yump thanang work pi'an yipam meenathayn thant. Than pam wanchangana thathin work pi'an thanttaman-a, an than ngaantam-ngeeyin wik thanan waa'-waa'in-a, an kan-kanamana.

Wik Inangan Kan-Kanam God.antama
The New Testament in the Wik-Mungkan language of Cape York,
Australia

copyright © 1984 Wycliffe Bible Translators

Language: Wik-Mungkan

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 14 Jun 2022 from source files dated 28 May 2022

034de520-6788-5805-9b17-b658084b38e2